

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं ॥

कृष्ण यजुर्वेदीय तैत्तिरीय संहिता

द्वितीयं काण्डं

Note: Please refer to the book, TS Kandam 1 for notes and conventions used in this Compilation.

Version Notes:

This is now the current Version 1.2 dated October 31, 2022.

1. This replaces the earlier version 1.1 dated Aug 31, 2020.
2. This version has been updated with the errors found and reported till Oct 31, 2022.
3. Required convention, style and presentation improvements or standardisations has been done wherever applicable.
4. In this Compilation the Samita Vaakyams have been suitably aligned, synchronised and refurbished in line with “Pada Paatam”.

Earlier Versions

1st	Version Number	0.1 dated 30th June 2019
2nd	Version Number	1.0 dated 30th April 2020
3rd	Version Number	1.1 dated 31st Aug 2020

Contents

2 कृष्ण यजुर्वेदीय तैत्तिरीय संहितायां द्वितीयं काण्डं	4
2.1 द्वितीयकाण्डे प्रथमः प्रश्नः – पशुविधानं	4
2.1.1 Appendix.....	34
2.2 द्वितीयकाण्डे द्वितीयः प्रश्नः – इष्टिविधानं.....	36
2.2.1 Appendix.....	69
2.3 द्वितीयकाण्डे तृतीयः प्रश्नः – इष्टिविधानं.....	72
2.3.1 Appendix.....	99
2.4 द्वितीयकाण्डे चतुर्थः प्रश्नः – इष्टिविधानं.....	102
2.4.1 Appendix.....	125
2.5 द्वितीयकाण्डे पञ्चमः प्रश्नः – इष्टिविधानं.....	126
2.5.1 Appendix.....	160
2.6 द्वितीयकाण्डे षष्ठः प्रश्नः – अवशिष्टकर्माभिधानं.....	166
2.6.1 Appendix.....	199

ओं नमः परमात्मने, श्री महागणपतये नमः, श्री गुरुभ्यो नमः

हरिःओं

2 कृष्ण यजुर्वेदीय तैत्तिरीय संहितायां द्वितीयं काण्डं

2.1 द्वितीयकाण्डे प्रथमः प्रश्नः – पशुविधानं

TS 2.1.1.1

वा॒यव्य॑ ऽ श्वेत॑मा ल॒भेत॑ भू॒तिकामो॑ वा॒युर्वै क्षे॑पिष्ठा दे॒वता॑ वा॒युमे॒व
स्वेन॑ भा॒गधे॒येनो॑प धावति॒ स ए॒वैनं॑ भू॒तिं गम॑यति॒ भव॑त्ये॒वा-ति॑क्षिप्रा
दे॒वते॒त्याहुः॑ सैन॑मीश्वरा प्र॒दह॑ इत्ये॒तमे॒व सन्तं॑ वा॒यवे॑ नि॒युत्व॑त
आ ल॒भेत॑ नि॒युद्धा॑ अ॒स्य धृ॑तिर्दधृ॒त ए॒व भू॒तिमु॒पैत्य॑प्र॒दाहा॒य
भव॑त्ये॒व – [] 1

TS 2.1.1.2

वा॒यवे॑ नि॒युत्व॑त आ ल॒भेत॑ ग्रा॒मकामो॑ वा॒युर्वा इ॒माः प्र॒जा न॑स्यो॒ता
ने॒नीय॑ते वा॒युमे॒व नि॒युत्व॑न्त॒ ऽ स्वेन॑ भा॒गधे॒येनो॑प धावति॒ स ए॒वास्मै॑
प्र॒जा न॑स्यो॒ता नि॒यच्छ॑ति ग्रा॒म्ये॒व भव॑ति नि॒युत्व॑ते भवति ध्रु॒वा
ए॒वास्मा॑ अन॒पगाः॑ करोति वा॒यवे॑ नि॒युत्व॑त आ ल॒भेत॑ प्र॒जाका॑मः

प्रा॒णो वै वा॒युरपा॒नो नि॒युत् प्रा॒णापा॒नौ खलु॒ वा ए॒तस्य॑

प्र॒जाया- [] 2

TS 2.1.1.3

अप॑ क्रा॒मतो॒ यो ऽलं॑ प्र॒जायै॑ सन् प्र॒जां न वि॒न्दते॑ वा॒युमे॒व नि॒युत्वन्त॑ ७
स्वेन॑ भा॒गधे॒येनो॑प॒ धाव॑ति स ए॒वास्मै॑ प्रा॒णापा॒नाभ्यां॑ प्र॒जां प्र॑ ज॒नय॑ति
वि॒न्दते॑ प्र॒जां वा॒यवे॑ नि॒युत्वत् आ ल॑भेत ज्यो॒गाम॑यावी प्रा॒णो वै
वा॒युरपा॒नो नि॒युत् प्रा॒णापा॒नौ खलु॒ वा ए॒तस्मा॒दप॑ क्रा॒मतो॒ यस्य॑
ज्यो॒गाम॑यति वा॒युमे॒व नि॒युत्वन्त॑ ७ स्वेन॑ भा॒गधे॒येनो॑प - [] 3

TS 2.1.1.4

धाव॑ति स ए॒वास्मिन्॑ प्रा॒णापा॒नौ द॑धात्यु॒त यदी॒तासु॑र्भव॑ति जी॒वत्ये॒व
प्र॒जाप॑तिर्वा इ॒दमे॑क आसी॒त् सो ऽका॑मय॒त प्र॒जाः प॒शून् सृ॑जे॒येति॑
स आ॒त्मनो॑ व॒पामु॑दक्खि॒दत्ता॑म॒ग्नौ प्रा॑गृह्णा॒त् ततो॑ ऽज॒स्तूप॑रः
सम॑भव॒त् त ७ स्वा॒यै दे॒वता॑या आ ऽल॑भत॒ ततो॑ वै स प्र॒जाः
प॒शून्सृ॑ज॒त यः प्र॒जाका॑मः - [] 4

TS 2.1.1.5

प॒शु॒का॒मः॑ स्या॒त् स ए॒तं प्रा॒जाप॒त्यम॒जं तू॒पर॒मा ल॒भेत॑ प्र॒जाप॒तिमे॒व
स्वेन॑ भा॒ग॒धे॒येनो॒प धा॒वति॑ स ए॒वास्मै॑ प्र॒जां प॒शून् प्र॑ ज॒नय॒ति
यच्-छ॑म॒श्रुण-स्तत्॑ पु॒रुषा॒णां रू॒पं य॑त् तू॒पर॒स्तद॑श्वा॒नां य॑दन्यतो॒दन्
तद् ग॒वां य॑द॒व्या इ॒व श॒फास्त॑द॒वीनां॑ य॑द॒ज-स्त॑द॒जाना॑-मे॒ताव॑न्तो
वै ग्रा॒म्याः प॒शव॑स्तान् - [] 5

TS 2.1.1.6

रू॒पेणै॒वाव॑ रु॒न्धे सो॒मापौ॒ष्णं त्रै॒तमा ल॒भेत॑ प॒शुका॑मो॒द्वौ वा अ॒जायै॑
स्तनौ॑ ना॒नैव॑ द्वा॒वभि॑ जा॒येते॒ ऊ॒र्जं पु॒ष्टिं तृ॒तीयः॑ सो॒मापू॒षणा॑वे॒व स्वेन॑
भा॒ग॒धे॒येनो॒प धा॒वति॑ ता॒वेवा॒स्मै प॒शून् प्र॑ ज॒नय॒तः सो॒मो वै रे॒तोधाः॑
पू॒षा प॒शूनां॑ प्र॒ज॒नयि॒ता सो॒म ए॒वास्मै॑ रे॒तो द॑धाति पू॒षा प॒शून्
प्र॑ ज॒नय॒त्यौदु॑म्बरो॒ यूपो॑ () भ॒व॒त्यूर्वा॑ उ॒दुम्ब॒र ऊ॒र्क् प॒शव॑
ऊ॒र्जैवा॒स्मा ऊ॒र्जं प॒शून्व॑ रु॒न्धे ॥ 6 (अ॒प्र॒दा॒हाय॑ भ॒व॒त्ये॒व - प्र॒जाया॑
- आ॒मय॑ति वा॒युमे॒व नि॒यु॒त्वन्त॑ स्वेन॑ भा॒ग॒धे॒येनो॒प - प्र॒जाका॑म -
स्तान् - यूप - स्त्र॒योद॑श च) (A1)

TS 2.1.2.1

प्र॒जाप॑तिः प्र॒जा अ॑सृज॒त ता॑ अ॒स्मात् सृ॑ष्टाः परा॑चीरायन् ता॑
वरु॑णमगच्छन् ता॑ अ॒न्वैत् ताः पुन॑रयाच॒त ता॑ अ॒स्मै न पुन॑रददा॒त्
सो ऽब्र॑वीद्-वरं॑ वृ॒णीष्व॑ाथ मे पुन॑र्दे॒हीति॑ तासां॑ वर॒मा ऽल॑भत स
कृ॒ष्ण एक॑शितिपा-दभवद्-यो वरु॑णगृहीतः स्यात् स ए॒तं वा॑रुणं
कृ॒ष्ण-मेक॑शितिपादमा ल॒भेत॑ वरु॑ण - [] 7

TS 2.1.2.2

-मे॒व स्वे॑न भा॒गधे॑येनोप॑ धावति स ए॒वैनं॑ वरु॑णपा॒शान् मुञ्च॑ति
कृ॒ष्ण एक॑शितिपाद् भवति वा॒रुणो ह्ये॑ष दे॒वतया॑ समृ॒द्ध्यै
सुव॑र्भानु-रासु॒रः सूर्यं॑ तमसा॑ ऽवि॒द्ध्यत॑ तस्मै॑ दे॒वाः प्रायश्चि॑त्ति-मैच्छन्
तस्य॑ यत् प्र॒थमं॑ तमो॑ ऽपा॒घ्नन्त्सा॑ कृ॒ष्णा ऽवि॑-रभवद्-यद् द्वि॒तीयञ्
सा फ॑ल्गुनी॒ यत् तृ॒तीयञ् सा॑ बल॒क्षी यद॑द्ध्य॒स्था-दपा॑कृ॒न्तन्त्सा॑
ऽवि॑र्वशा - [] 8

TS 2.1.2.3

सम॑भवत् ते दे॒वा अ॑ब्रुवन् दे॒वप॒शुर्वा अ॒यञ् सम॑भूत् कस्मा॑ इ॒ममा
ल॑प्स्यामह॒ इत्यथ॑ वै तर्ह्य॑ल्पा पृथि॒व्यासी॑दजा॒ता ओष॑धयस्तामविं

ँव॒शामा॑दि॒त्येभ्यः॑ का॒मायाऽऽ *ल॒भन्त॑ ततो॒ वा अ॒प्रथ॑त पृथि॒व्य-
जा॒यन्तौ॑ष॒धयो॑ यः का॒मये॑त प्रथे॒य प॒शुभिः॑ प्र प्र॒जया॑ जा॒येयेति॑ स
ए॒तामविं॑ ँव॒शामा॑दि॒त्येभ्यः॑ का॒मायाऽऽ - [] 9

TS 2.1.2.4

*ल॒भेताऽऽदि॒त्याने॒व का॒मः॑ स्वे॒न भा॒गधे॑ये॒नोप॑ धावति॒ त ए॒वैनं॑
प्रथ॑यन्ति प॒शुभिः॑ प्र प्र॒जया॑ जन॒यन्त्य॑सा॒वादित्यो॑ न व्य॒रोच॑त तस्मै
दे॒वाः प्रा॒यश्चि॑त्ति॒मैच्छन्॑ तस्मा॑ ए॒ता म॒लु॒हा आ ल॑भन्ताऽऽग्ने॒यीं
कृ॒ष्णाग्री॒वीꣳ सꣳहि॒तामै॒न्द्रीꣳ श्वे॒तां बा॒र्ह॒स्पत्यां॑ ताभि॒रेवा॒स्मिन्
रुच॑मदधु॒र्यो ब्र॑ह्मवर्च॒सका॒मः स्या॑त् तस्मा॑ ए॒ता म॒लु॒हा
आ ल॑भेता - [] 10

TS 2.1.2.5

ऽऽग्ने॒यीं कृ॒ष्णाग्री॒वीꣳ सꣳहि॒तामै॒न्द्रीꣳ श्वे॒तां बा॒र्ह॒स्पत्यामे॒ता
ए॒व दे॒वताः॑ स्वे॒न भा॒गधे॑ये॒नोप॑ धावति॒ ता ए॒वास्मिन्॑ ब्रह्मवर्च॒सं
द॒धति॑ ब्रह्मवर्च॒स्ये॒व भ॑वति व॒सन्ता॑ प्रा॒तरा॑ग्ने॒यीं कृ॒ष्णा ग्री॒वीमा॑ ल॒भेत
ग्री॒ष्मे म॒द्ध्यन्दि॑ने सꣳहि॒तामै॒न्द्रीꣳ श॒रद्य॑परा॒ह्णे श्वे॒तां बा॒र्ह॒स्पत्यां

त्रीणि वा आदित्यस्य तेजा॒ऽसि वसन्ता॑ प्रा॒तर्ग्री॒ष्मे म॒द्ध्यन्दि॑ने
शर॒द्यपरा॒ह्णे याव॑न्त्ये॒व तेजा॒ऽसि तान्ये॒वा - [] 11

TS 2.1.2.6

-व रुन्धे सँव॑थ्स॒रं पर्या॑लभ्यन्ते सँव॑थ्स॒रो वै ब्र॑ह्मवर्च॒सस्य॑ प्रदा॒ता
सँव॑थ्स॒र ए॒वास्मै॑ ब्र॒ह्मवर्च॑सं प्र यच्छति ब्र॒ह्मवर्च॑स्ये॒व भव॑ति
गर्भि॑णयो भवन्तीन्द्रि॒यं वै गर्भ॑ इन्द्रि॒यमे॒वास्मिन् द॑धति सा॒रस्वतीं॑
मेषी॑मा ल॒भेत॑ य ई॒श्वरो वा॒चो व॑दि॒तोः सन् वाचं॑ न वदेद्-वा॒ग्वै
सा॒रस्वती॑ सा॒रस्वती॑मे॒व स्वेन॑ भा॒गधे॒येनो॑प धावति सै॒वास्मिन्- [] 12

TS 2.1.2.7

वाचं॑ दधाति प्रवदि॒ता वा॒चो भव॑त्यप॒न्नदती॑ भवति तस्मा॑न् म॒नुष्याः॑
सर्वा॑ वाचं॑ वदन्त्याग्ने॒यं कृ॑ष्णा॒ग्रीव॑मा ल॒भेत॑ सौ॒म्यं ब॒भ्रुं
ज्यो॒गामया॑व्यग्निं वा ए॒तस्य॑ शरी॒रं गच्छ॑ति सोम॒ऽरसो॑ यस्य
ज्यो॒गामय॑त्यग्ने॒रेवा॑स्य शरी॒रं निष्क्री॑णाति सोमा॒द् रस॑मु॒त
यदी॒तासु॑र्भवति जी॒वत्ये॒व सौ॒म्यं ब॒भ्रुमा॑ ल॒भेताऽऽग्ने॒यं कृ॑ष्णा॒ग्रीवं
प्र॒जाका॑मः सोमो॑ - [] 13

TS 2.1.2.8

वै॑ रे॒तो॒धा अ॒ग्निः प्र॒जानां॑ प्र॒जनयि॑ता सोम॑ ए॒वास्मै॑ रे॒तो द॑धात्य॒ग्निः
 प्र॒जां प्र॑ ज॒नयति॑ वि॒न्दते॑ प्र॒जामा॑ग्नेयं कृ॒ष्णाग्री॑वमा ल॒भेत॑ सौ॒म्यं ब॒भ्रुं
 यो ब्रा॑ह्म॒णो वि॒द्याम॒नूच्य॑ न वि॒रोचे॑त यदा॒ग्नेयो भ॑वति तेज॑ ए॒वास्मिन्
 तेन॑ दधाति॒ यथ् सौ॒म्यो ब्र॑ह्मवर्च॒सं तेन॑ कृ॒ष्णाग्री॑व आ॒ग्नेयो भ॑वति
 तम॑ ए॒वास्मा॑दप॒ हन्ति॑ श्वेतो॑ भवति – [] 14

TS 2.1.2.9

रुच॑मे॒वास्मिन् द॑धाति ब॒भ्रुः सौ॒म्यो भ॑वति ब्र॒ह्मवर्च॑समे॒वास्मिन् त्विषि॑
 द॑धात्या॒ग्नेयं कृ॒ष्णाग्री॑वमा ल॒भेत॑ सौ॒म्यं ब॒भ्रुमा॑ग्नेयं कृ॒ष्णाग्री॑व
 पु॒रोधा॒याऽस्पर्द्ध॑मान आ॒ग्नेयो वै ब्रा॑ह्म॒णः सौ॒म्यो रा॒जन्यो ऽभि॑तः
 सौ॒म्यमा॑ग्नेयौ भ॑वत॒स्तेज॑सैव ब्र॒ह्मणो॑भ॒यतो॑ रा॒ष्ट्रं परि॑ गृ॒ह्णात्ये॒कधा॑
 स॒मा वृ॑ङ्क्ते पु॒र ए॒नं द॑धते ॥ 15

(ल॒भेत॑ वरु॒णं – वँ॒शौ – ताम॑विँ वँ॒शामा॑दि॒त्येभ्यः॑ का॒माय॑ –

मल्॒हा आ ल॑भेत – तान्ये॒व – सै॒वास्मिन् – सोमः॑ – स्वे॒तो

भ॑वति – त्रि॒च॒त्वारि॑ञ्च) (A2)

TS 2.1.3.1

दे॒वा॒सु॒रा ए॒षु लो॒केष्व॑स्पर्द्धन्त॒ स ए॒तं वि॒ष्णु॑र्वा॒मन॑मपश्यत्
त॒ स्वा॒यै दे॒वता॑या आ ऽल॑भत॒ ततो॒ वै स इ॒मान् लो॒कान॑भ्यजयद्
वैष्ण॑वं वा॒मन॑मा ल॒भेत॒ स्पर्द्ध॑मानो वि॒ष्णु॑रेव भू॒त्वेमा॑न् लो॒कान॑भि
जय॑ति वि॒षम॒ आ ल॒भेत॒ विष॑मा इ॒व ही॒मे लो॒काः समृ॑द्ध्य॒ इन्द्रा॑य
मन्यु॑मते॒ मन॑स्वते ल॒लामं॑ प्राशृङ्ग॒मा ल॒भेत॒ संग्रा॑मे – [] 16

TS 2.1.3.2

सँय॑त्त इन्द्रि॒येण॒ वै म॒न्युना॒ मन॑सा संग्रा॒मं जय॑तीन्द्र॒मेव म॒न्युम॑न्तं
मन॑स्वन्त॒ स्वेन॑ भा॒गधे॑येनोप॒ धाव॑ति स ए॒वास्मि॑न्निन्द्रि॒यं म॒न्युं मनो॑
दधा॑ति जय॑ति त॒ संग्रा॑ममिन्द्रा॒य मरु॑त्वते पृ॒श्नि॒सक्थ॑मा ल॒भेत॒
ग्रा॒मका॑म इन्द्र॒मेव मरु॑त्वन्त॒ स्वेन॑ भा॒गधे॑येनोप॒ धाव॑ति स ए॒वास्मै॑
सजा॑तान् प्र यच्छति ग्रा॒म्ये॒व भव॑ति यदृष॒भस्ते॒नै – [] 17

TS 2.1.3.3

–न्द्रो॑ यत् पृ॒श्नि॒स्तेन॑ मा॒रुतः॑ समृ॑द्ध्यै प॒श्चात् पृ॒श्नि॒सक्थो॑ भवति
पश्चा॑दन्ववसा॒यिनी॑–मे॒वास्मै॑ वि॒शं करो॑ति सौ॒म्यं ब॒भ्रु॒मा
ल॒भेता॑न्नका॒मः सौ॒म्यं वा॒ अन्न॑ सोम॒मेव॑ स्वेन॑ भा॒गधे॑येनोप॒ धाव॑ति

स ए॒वास्मा॑ अ॒न्नं प्र॑ य॒च्छत्य॑न्ना॒द ए॒व भ॑वति ब॒भ्रुर्भ॑वत्ये॒तद्वा अ॒न्नस्य॑
रूप॑ꣳ स॒मृद्ध्यै॑ सौ॒म्यं ब॒भ्रुमा॑ ल॒भेत॑ यमल॑ꣳ – [] 18

TS 2.1.3.4

रा॒ज्याय॑ स॒न्तꣳ रा॒ज्यं नो॑प॒नमे॑त् सौ॒म्यं वै रा॒ज्यꣳ सोम॑मे॒व स्वेन॑
भा॒गधे॑ये॒नोप॑ धावति स ए॒वास्मै॑ रा॒ज्यं प्र॑ य॒च्छत्यु॑पै॒नꣳ रा॒ज्यं न॑मति
ब॒भ्रुर्भ॑वत्ये॒तद् वै सोम॑स्य रूप॑ꣳ स॒मृद्ध्य॑ इन्द्रा॒य वृ॒त्रतु॑रे ल॒लामं॑
प्राशृ॑ङ्ग॒मा ल॒भेत॑ ग॒तश्रीः॑ प्र॒तिष्ठा॑कामः पा॒प्मान॑मे॒व वृ॒त्रं ती॒र्त्वा प्र॒तिष्ठां॑
ग॒च्छती॑न्द्रा॒याभि॑माति॒घ्ने ल॒लामं॑ प्राशृ॑ङ्ग॒मा – [] 19

TS 2.1.3.5

ल॒भेत॑ यः पा॒प्मना॑ गृही॒तः स्या॑त् पा॒प्मा वा अ॒भिमा॑ति—
रिन्द्र॑मे॒वाभि॑माति॒हनꣳ स्वेन॑ भा॒गधे॑ये॒नोप॑ धावति स ए॒वास्मा॑त्
पा॒प्मान॑म॒भिमा॑तिं प्र॑ णु॒दत॑ इन्द्रा॒य व॒ज्रिणे॑ ल॒लामं॑ प्राशृ॑ङ्ग॒मा ल॒भेत॑
यमल॑ꣳ रा॒ज्याय॑ स॒न्तꣳ रा॒ज्यं नो॑प॒नमे॑दिन्द्र॑मे॒व व॒ज्रिणꣳ स्वेन॑
भा॒गधे॑ये॒नोप॑ धावति स ए॒वास्मै॑ व॒ज्रं प्र॑ य॒च्छति॑ स ए॒नं () वै॒ज्रो
भू॒त्या इ॒न्ध उपै॑नꣳ रा॒ज्यं न॑मति ल॒लामः॑ प्राशृ॑ङ्गो भ॑वत्ये॒तद्-वै
व॒ज्रस्य॑ रूप॑ꣳ स॒मृद्ध्यै॑ ॥ 20

(संग्रामे - तेना - ल - मभिमातिघ्ने ललामं प्राशृङ्गमै - नं -
पञ्चदश च) (A3)

TS 2.1.4.1

असावा॑दित्यो न व्य॑रोचत॒ तस्मै॑ दे॒वाः प्राय॑श्चित्तिमै॒च्छन् तस्मा॑ ए॒तां
दश॑र्षभा॒मा ऽल॑भन्त॒ तयै॑वास्मिन् रुच॑मदधुर्यो ब्र॑ह्मवर्च॒सका॑मः स्यात्
तस्मा॑ ए॒तां दश॑र्षभा॒मा ऽल॑भेता॒मुमे॒वाऽऽदि॒त्यञ् स्वेन॑ भा॒गधे॒येनो॑प
धा॒वति॒ स ए॒वास्मिन् ब्र॑ह्मवर्च॒सं द॑धाति ब्र॑ह्मवर्च॒स्येव॑ भ॒वति॒ वस॑न्ता॒
प्रा॒तस्त्रीन् ल॑लामा॒ना ल॑भेत ग्री॒ष्मे म॒द्ध्यन्दि॑ने - [] 21

TS 2.1.4.2

त्री॒ञ्छि॒तिपृ॒ष्ठाञ्छर॑द्यपरा॒ह्णे त्री॒ञ्छि॒तिवा॒रान् त्री॒णि वा आ॑दि॒त्यस्य॑
तेजा॑ऽसि वस॑न्ता॒ प्रा॒तर्ग्री॒ष्मे म॒द्ध्यन्दि॑ने शर॑द्यपरा॒ह्णे याव॑न्त्ये॒व
तेजा॑ऽसि तान्ये॒वाव रु॑न्धे त्रय॑स्त्रय॒ आ ल॑भ्यन्ते-ऽभि॒पूर्व॑मे॒वास्मिन्
तेजो॑ दधाति सँव॑त्सरं पर्या॒लभ्य॑न्ते सँव॑त्सरो वै ब्र॑ह्मवर्च॒सस्य॑
प्र॒दा॒ता सँव॑त्सर ए॒वास्मै ब्र॑ह्मवर्च॒सं प्र य॑च्छति ब्र॑ह्मवर्च॒स्येव॑ भ॒वति॒
सँव॑त्सर॒स्य पर॑स्तात् प्रा॒जाप॑त्यं क॒द्रु - [] 22

TS 2.1.4.3

–मा ल॒भेत॑ प्र॒जाप॑तिः सर्वा॑ दे॒वता॑ दे॒वता॑स्वे॒व प्र॑ति तिष्ठति॒ यदि॑
बि॒भीयाद् दु॒श्चर्मा॑ भविष्यामीति॑ सोमापौष्ण॑ ७ श्याममा ल॒भेत॑ सौम्यो
वै दे॒वतया॑ पु॒रुषः॑ पौष्णाः॑ प॒शवः॑ स्वयै॒वास्मै॑ दे॒वतया॑ प॒शुभि॑स्त्वचं
करोति॒ न दु॒श्चर्मा॑ भवति॒ देवाश्च॑ वै यमश्चास्मिन् ँलोके॑ ऽस्प॒र्द्धन्त॑ स
यमो॑ दे॒वाना॑मिन्द्रि॒यं वी॒र्य॑मयुवत॒ तद् यम॑स्य – [] 23

TS 2.1.4.4

यम॒त्वं ते॑ दे॒वा अ॑मन्यन्त॒ यमो॑ वा इ॒दम॑भूद्–यद्–वय॑ ७ स्म इति॒
ते प्र॒जाप॑तिमुपा॒धाव॑न्थ् स ए॒तौ प्र॒जाप॑तिरा॒त्मन॑ उक्षव॒शौ नि॑रमिमीत॒
ते दे॒वा वैष्णा॑वरु॒णीं व॒शामा॑–ऽल॒भन्तै॒न्द्रमु॒क्षाण॑तं व॒रुणे॑नैव
ग्राह॑यित्वा विष्णु॒ना य॒ज्ञेन॑ प्राणुदन्तै॒न्द्रेणै॑–वा॒स्येन्द्रि॒यम॑–वृ॒ज्जत॑ यो
भ्रातृ॑व्यवा॒न्थ् स्याथ्॑ स स्पर्द्ध॑मानो वैष्णावरु॒णीं – [] 24

TS 2.1.4.5

व॒शामा॑ ल॒भेतै॒न्द्रमु॒क्षाण॑ व॒रुणे॑नैव भ्रातृ॑व्यं ग्राह॑यित्वा विष्णु॒ना
य॒ज्ञेन॑ प्र णुदत ऐ॒न्द्रेणै॑वा॒स्येन्द्रि॒यं वृ॒द्धे भव॑त्यात्मना॒ परा॑ ऽस्य
भ्रातृ॑व्यो भव॒तीन्द्रो॑ वृ॒त्रम॑हन् तं वृ॒त्रो ह॑तः षोड॒शभि॑–भो॒गैर॑सिनात्

तस्य वृत्रस्य शीर्षतो गाव उदायन् ता वैदेह्यो ऽभवन् तासामृषभो
जघने ऽनूदैत् तमिन्द्रो – [] 25

TS 2.1.4.6

ऽचायथ् सो ऽमन्यत यो वा इममालभेत मुच्येतास्मात् पाप्मन इति
स आग्नेयं कृष्णग्रीवमा लभेतैन्द्रमृषभं तस्याग्निरेव स्वेन
भागधेयेनोप सृतः षोडशधा वृत्रस्य भोगानप्यदहदैन्द्रेणैन्द्रिय-
मात्मन्नधत्त यः पाप्मना गृहीतः स्याथ् स आग्नेयं कृष्णग्रीवमा
लभेतैन्द्रमृषभ-मग्निरेवास्य स्वेन भागधेयेनोपसृतः – [] 26

TS 2.1.4.7

पाप्मानमपि दहत्यैन्द्रेणैन्द्रियमात्मन् धत्ते मुच्यते पाप्मनो
भवत्येव द्यावापृथिव्यां धेनुमा लभेत ज्योगपरुद्धो ऽनयोर्. हि वा
एषो ऽप्रतिष्ठितो ऽथैष ज्योगपरुद्धो द्यावापृथिवी एव स्वेन भागधेयेनोप
धावति ते एवैनं प्रतिष्ठां गमयतः प्रत्येव तिष्ठति पर्यारिणी भवति
पर्यारीव ह्येतस्य राष्ट्रं यो ज्योगपरुद्धः समृद्ध्यै वायव्यं – [] 27

TS 2.1.4.8

व॑त्स॒मा ल॒भेत वा॒युर्वा॑ अन॒योर्व॑त्स इ॒मे वा ए॒तस्मै॑ लो॒का अप॑शुष्का
विड॑पशुष्का ऽथै॒ष ज्यो॑गप॒रुद्धो वा॒युमे॒व स्वेन॑ भा॒गधे॒येनो॑प धावति
स ए॒वास्मा॑ इ॒मान् लो॒कान् वि॒शं प्र दा॑पयति प्रा॒स्मा इ॒मे लो॒काः
स्नु॑वन्तिभुञ्जत्ये॒नं वि॒डुप॑तिष्ठते ॥ 28

(म॒द्ध्यन्दि॑ने - क॒द्रं - य॑मस्य - स्पर्ध॑मानो वैष्णा॒वरु॒णीं - तमिन्द्रो॑
- ऽस्य॑ स्वेन॑ भा॒गधे॒येनो॑पसृ॒तो - वा॒यव्यं॑ -
द्वि॒चत्वारि॑ञ्शच्च) (A4)

TS 2.1.5.1

इन्द्रो॑ वल॒स्य बिल॑मपौर्णो॒थ स य उत्त॑मः प॒शुरासी॑त् तं पृ॒ष्ठं प्रति॑
संगृ॑ह्योदक्खि॒दत् तं सह॑स्रं प॒शवो॑ ऽनू॒दाय॑न्थ स उ॒न्नतो॑ ऽभव॒द् यः
प॒शुकामः॑ स्याथ् स ए॒तमै॒न्द्रमु॒न्नत॑मा ल॒भेते॒न्द्रमे॒व स्वेन॑ भा॒गधे॒येनो॑प
धावति॑ स ए॒वास्मै॑ प॒शून् प्र य॑च्छति प॒शुमा॒नेव॑ भवत्यु॒न्नतो॑ -[] 29

TS 2.1.5.2

भवति॑ सा॒हस्री॑ वा ए॒षा ल॒क्ष्मी यदु॒न्नतो॑ ल॒क्ष्मियै॒व प॒शून॑व रुन्धे
यदा॑ सह॑स्रं प॒शून् प्राप्नु॑यादथ वैष्णा॒वं वा॒मन॑मा ल॒भेतै॒तस्मिन्

वै तथ् स॒हस्र॒मद्ध्यतिष्ठत् तस्मा॑दे॒ष वा॒मनः॑ स॒मीषितः॑ प॒शुभ्य॑ ए॒व
प्रजा॑तेभ्यः प्रति॒ष्ठां द॑धाति को ऽ॒हति स॒हस्रं॑ प॒शून् प्राप्नु॑मित्याहु-
रहो॒रात्रा॒ण्येव स॒हस्रं॑ सम्पा॒द्याऽऽ ल॑भेत प॒शवो॑ - [] 30

TS 2.1.5.3

वा अ॒होरा॒त्राणि॑ प॒शूने॒व प्रजा॑तान् प्रति॒ष्ठां ग॑मय॒त्योष॑धीभ्यो वे॒हत॒मा
ल॑भेत प्र॒जाका॒म ओष॑धयो वा ए॒तं प्रजा॑यै परि बा॒धन्ते॒ यो ऽलं॑ प्रजा॑यै
सन् प्रजां॑ न वि॒न्दत॒ ओष॑धयः खलु वा ए॒तस्यै॑ सू॒तुम॑पि घ्नन्ति॒ या
वे॒हद्-भ॑व॒त्योष॑धीरे॒व स्वेन॑ भा॒गधे॑येनोप॑ धावति॒ ता ए॒वास्मै॑
स्वा॒द्योनेः॑ प्रजां॑ प्र॒ जन॑यन्ति वि॒न्दते॑ - [] 31

TS 2.1.5.4

प्र॒जामा॑पो वा ओष॑धयो ऽस॒त् पुरु॑ष आप॑ ए॒वास्मा॑ अ॒सतः॑ स॒द्ददति॑
तस्मा॑दाहु॒र्यश्चै॒वं वे॒द यश्च॑ नाप॒स्त्वावा॑सतः स॒द्दद॑तीत्यै॒न्द्रीं
सू॒तव॑शा॒मा ल॑भेत॒ भूति॑का॒मो ऽजा॑तो वा ए॒ष यो ऽलं॑ भू॒त्यै सन्॑ भूतिं॒
न प्रा॒प्नोती॑न्द्रं खलु वा ए॒षा सू॒त्वा व॑शा ऽभ॒व - [] 32

TS 2.1.5.5

–दिन्द्रमे॒व स्वेन॑ भा॒ग॒धेये॒नोप॑ धावति॒ स ए॒वैनं॑ भूतिं॑ गमयति॒
 भव॑त्ये॒व यꣳ सू॒त्वा व॒शा स्यात् तमै॒न्द्रमे॒वाऽऽ ल॑भेतै॒तद् वाव॑
 तदिन्द्रि॒यꣳ सा॒क्षादे॒वेन्द्रि॒यम॑व रुन्ध ऐन्द्रा॒ग्नं पु॑नरुथ् सृष्ट॒मा ल॑भेत
 य आ तृतीया॒त् पुरु॑षाथ् सोमं॑ न पिबेद्–विच्छि॒न्नो वा ए॒तस्य॑
 सोमपी॒थो यो ब्रा॑ह्मणः सन्नाऽऽ – [] 33

TS 2.1.5.6

तृतीया॒त् पुरु॑षाथ् सोमं॑ न पिबेतीन्द्रा॒ग्नी ए॒व स्वेन॑ भा॒ग॒धेये॒नोप॑
 धावति॒ तावे॒वास्मै॑ सोमपी॒थं प्र य॑च्छत॒ उपै॑नꣳ सोमपी॒थो न॑मति
 यदैन्द्रो॑ भवतीन्द्रि॒यं वै सो॑मपी॒थ इन्द्रि॒यमे॒व सो॑मपी॒थम॑व रुन्धे
 यदा॒ग्नेयो॑ भवत्या॒ग्नेयो॑ वै ब्रा॑ह्मणः स्वा॒मे॒व दे॒वता॑मनु॒ सम् त॑नोति
 पुनरुथ्सृष्टो॑ भवति पुनरुथ्सृष्ट इ॒व ह्ये॒तस्य॑ – [] 34

TS 2.1.5.7

सोमपी॒थः समृ॑द्ध्यै ब्राह्मणस्प॒त्यं तू॒पर॑मा ल॑भेता–भि॒चर॑न्
 ब्रह्म॑णस्पतिमे॒व स्वेन॑ भा॒ग॒धेये॒नोप॑ धावति॒ तस्मा॑ ए॒वैन॑मा वृश्चति
 ताज॒गार्ति॑–माच्छति॒ तू॒पो भ॑वति क्षुरपवि॒र्वा ए॒षा ल॒क्ष्मी यत् तू॒परः॑

समृद्ध्यै स्फ्यो यूपो भवति वज्रो वै स्फ्यो वज्रमेवास्मै प्र हरति
शरमयं बर्हिः शृणात्येवैनं वैभीदक इद्धमो () भिनत्येवैनं ॥ 35

(भवत्युन्नतः - पशवो - जनयन्ति विन्दते - ऽभवत् - सन्नै -
तस्ये - धम - स्त्रीणि च) (A5)

TS 2.1.6.1

बार्हस्पत्यं शितिपृष्ठमा लभेत ग्रामकामो यः कामयेत पृष्ठं
समानानां स्यामिति बृहस्पतिमेव स्वेन भागधेयेनोप धावति स एवैनं
पृष्ठं समानानां करोति ग्राम्येव भवति शितिपृष्ठो भवति बार्हस्पत्यो
ह्येष देवतया समृद्ध्यै पौष्णं श्याममा लभेतान्नकामो ऽन्नं वै पूषा
पूषणमेव स्वेन भागधेयेनोप धावति स एवास्मा - [] 36

TS 2.1.6.2

अन्नं प्र यच्छत्यन्नाद एव भवति श्यामो भवत्येतद् वा अन्नस्य रूपं
समृद्ध्यै मारुतं पृश्निमा लभेतान्नकामो ऽन्नं वै मरुतो मरुत एव
स्वेन भागधेयेनोप धावति त एवास्मा अन्नं प्र यच्छन्त्यन्नाद एव
भवति पृश्नि भवत्येतद् वा अन्नस्य रूपं समृद्ध्यै ऐन्द्रमरुणमा
लभेतेन्द्रियकाम इन्द्रमेव - [] 37

TS 2.1.6.3

स्वेन॑ भा॒ग॒धे॒ये॒नो॒प॑ धावति॑ स ए॒वास्मि॑न्निन्द्रि॒यं द॑धातीन्द्रि॒याव्ये॑व
 भव॑त्य॒रु॒णो भ्रू॑मान् भवत्ये॒तद् वा इन्द्र॑स्य रू॒पꣳ स॒मृद्ध्यै॑
 सावि॒त्रमु॒प॒ध्व॒स्त॒मा ल॑भेत स॒निका॑मः स॒विता॑ वै प्र॒स॒वाना॑मीशे
 स॒वि॒ता॒रमे॒व स्वेन॑ भा॒ग॒धे॒ये॒नो॒प॑ धावति॑ स ए॒वास्मै॑ स॒निं प्र॑ सु॒वति॑
 दा॒न॒का॒मा अ॒स्मै प्र॒जा भ॑वन्त्यु॒प॒ध्व॒स्तो भ॑वति

सावि॒त्रो ह्ये॒ष- [] 38

TS 2.1.6.4

दे॒व॒त॒या स॒मृद्ध्यै॑ वैश्व॒दे॒वं बहु॑रू॒प॒मा ल॑भेता॒न्नका॑मोवैश्व॒दे॒वं वा
 अ॒न्नं वि॒श्वा॒ने॒व दे॒वान्थ् स्वेन॑ भा॒ग॒धे॒ये॒नो॒प॑ धावति॑ ए॒वास्मा॑ अ॒न्नं
 प्र॒ यच्छ॑न्त्य॒न्नाद॑ ए॒व भ॑वति बहु॒रूपो॑ भ॒वति॑ बहु॒रूपꣳ ह्य॒न्नꣳ स॒मृद्ध्यै॑
 वैश्व॒दे॒वं बहु॑रू॒प॒मा ल॑भेत ग्रा॒म॒का॒मो वैश्व॒दे॒वा वै स॒जा॒ता वि॒श्वा॒ने॒व
 दे॒वान्थ् स्वेन॑ भा॒ग॒धे॒ये॒नो॒प॑ धावति॑ त ए॒वास्मै॑ - [] 39

TS 2.1.6.5

स॒जा॒तान् प्र॒ यच्छ॑न्ति ग्रा॒म्ये॑व भ॒वति॑ बहु॒रूपो॑ भ॒वति॑
 बहु॑दे॒व॒त्यो(ओ॑१) ह्ये॒ष स॒मृद्ध्यै॑ प्रा॒जाप॑त्यं तू॒पर॑मा ल॑भेत

यस्यानाज्ञातमिव ज्योगामयेत् प्राजापत्यो वै पुरुषः प्रजापतिः खलु वै
तस्य वेद यस्यानाज्ञातमिव ज्योगामयति प्रजापतिमेव स्वेन
भागधेयेनोप धावति स एवैनं तस्मात् सामान्-मुञ्चति तूपरो भवति
प्राजापत्यो ह्ये () -ष देवतया समृद्ध्यै ॥ 40

(अस्मा - इन्द्रमेवै - ष - सजाता विश्वानेव देवान् स्वेन
भागधेयेनोप धावति त एवास्मै - प्राजापत्यो हि - त्रीणि च) (A6)

TS 2.1.7.1

वषट्कारो वै गायत्रियै शिरो ऽच्छिनत् तस्यै रसः परापतत् तं
बृहस्पतिरूपा ऽगृह्णाथ्सा शितिपृष्ठा वशा ऽभवद् यो द्वितीयः
परा ऽपतत् तं मित्रावरुणा-वुपागृह्णीता सा द्विरूपा वशा ऽभवद्-
यस्तृतीयः परापतत् तं विश्वे देवा उपागृह्णन्थ सा बहुरूपा वशा
ऽभवद्य-श्चतुर्थः परापतत् स पृथिवीं प्राविशत् तं
बृहस्पतिरभ्य - [] 41

TS 2.1.7.2

-गृह्णादस्त्वेवायं भोगायेति स उक्षवशः समभवद्-यल्लोहितं
परापतत् तद्-रुद्र उपागृह्णाथ् सा रौद्री रोहिणी वशा ऽभवद्-

बार्हस्पत्या॑ शिति॑पृ॒ष्ठामा॑ ल॒भेत॑ ब्र॒ह्मव॑र्चस॒कामो॑ बृ॒हस्प॑तिमे॒व
स्वेन॑ भा॒गधे॑येनोप॑ धावति॒ स ए॒वास्मिन्॑ ब्र॒ह्मव॑र्चसं॒ दधा॑ति
ब्र॒ह्मव॑र्चस्ये॒व भव॑ति छ॒न्दसां॑ ँ॒वा ए॒ष रसो॑ यद् व॒शा रस॑

इ॒व ख॒लु – [] 42

TS 2.1.7.3

वै ब्र॒ह्मव॑र्चसं॒ छन्द॑सामे॒व रसे॑न॒ रसं॑ ब्र॒ह्मव॑र्चसम॒व रु॒न्धे मै॑त्राव॒रुणीं॑
द्वि॒रूपा॑मा ल॒भेत॑ वृ॒ष्टि॒कामो॑ मै॒त्रं ँ॒वा अ॒हर्वा॑रु॒णी रा॒त्रिर॑हो॒रात्रा॑भ्यां
ख॒लु वै प॑र्जन्यो व॒र्षति॑ मि॒त्राव॑रुणावे॒व स्वेन॑ भा॒गधे॑येनोप॑ धावति॒
तावे॒वास्मा॑ अ॒होरा॑त्राभ्यां॑ प॒र्जन्यं॑ ँ॒वर्ष॑यतः छ॒न्दसां॑ ँ॒वा ए॒ष रसो॑
यद् व॒शा रस॑ इ॒व ख॒लु वै वृ॒ष्टिः छ॒न्दसा॑मे॒व रसे॑न – [] 43

TS 2.1.7.4

रसं॑ ँ॒वृष्टि॑म॒व रु॒न्धे मै॑त्राव॒रुणीं॑ द्वि॒रूपा॑मा ल॒भेत॑ प्र॒जाका॑मो
मै॒त्रं ँ॒वा अ॒हर्वा॑रु॒णी रा॒त्रिर॑हो॒रात्रा॑भ्यां॑ ख॒लु वै प्र॒जाः प्र॑ जा॒यन्ते॑
मि॒त्राव॑रुणावे॒व स्वेन॑ भा॒गधे॑येनोप॑ धावति॒ तावे॒वास्मा॑ अ॒होरा॑त्राभ्यां॑
प्र॒जां प्र॑ ज॒नय॑तः छ॒न्दसां॑ ँ॒वा ए॒ष रसो॑ यद् व॒शा रस॑ इ॒व ख॒लु वै
प्र॒जा छ॒न्दसा॑मे॒व रसे॑न॒ रसं॑ प्र॒जाम॑व – [] 44

TS 2.1.7.5

रुन्धे वैश्वदेवीं बहुरूपामा लभेतान्नकामो वैश्वदेवं वा अन्नं
 विश्वानेव देवान्त् स्वेन भागधेयेनोप धावति त एवास्मा अन्नं
 प्र यच्छन्त्यन्नाद एव भवति छन्दसां वा एष रसो यद् वशा रस इव
 खलु वा अन्नं छन्दसामेव रसेन रसमन्नमव रुन्धे वैश्वदेवीं
 बहुरूपामा लभेत ग्रामकामो वैश्वदेवा वै – [] 45

TS 2.1.7.6

सजाता विश्वानेव देवान्त् स्वेन भागधेयेनोप धावति त एवास्मै
 सजातान् प्र यच्छन्ति ग्राम्येव भवति छन्दसां वा एष रसो यद् वशा
 रस इव खलु वै सजाता छन्दसामेव रसेन रसं सजातानव रुन्धे
 बार्हस्पत्य- मुक्षवशमा लभेत ब्रह्मवर्चसकामो बृहस्पतिमेव स्वेन
 भागधेयेनोप धावति स एवास्मिन् ब्रह्मवर्चसं – [] 46

TS 2.1.7.7

दधाति ब्रह्मवर्चस्येव भवति वशं वा एष चरति यदुक्षावश इव खलु
 वै ब्रह्मवर्चसं वशनैव वशं ब्रह्मवर्चसमव रुन्धेरौद्रीः रोहिणीमा
 लभेताभिचरन् रुद्रमेव स्वेन भागधेयेनोप धावति तस्मा एवैनमा

वृ॒श्चति॑ ता॒जगा॑र्ति॒माच्छ॑ति॒ रोहि॑णी भवति॒ रौद्री॑ ह्येषा॒ देव॑तया॒ समृ॑द्ध्यै
स्फ्यो॑ यू॒पो () भव॑ति॒ वज्रो॑ वै स्फ्यो॑ वज्र॒मेवास्मै॑ प्र॒ हर॑ति शर॒मयं॑
बर्॒हिः शृ॑णात्ये॒वैनं॑ वैभी॒दक॑ इ॒द्ध्मो भि॑नत्ये॒वैनं॑ ॥ 47

(अ॒भि - ख॒लु - वृ॒ष्टि र॒छन्द॑सामे॒व रस॑न - प्र॒जाम॑व - वै॒श्वदे॑वा
वै - ब्र॒ह्मव॑र्चसं - यू॒प - एका॒न्नवि॑शतिश्च) (A7)

TS 2.1.8.1

अ॒सावा॑दि॒त्यो न॑ व्य॒रोच॑त॒ तस्मै॑ दे॒वाः प्रा॑यश्चि॒त्तिमै॑च्छन् तस्मा॑ ए॒ताꣳ
सौ॒रीꣳ श्वे॒तां व॑शामा॒ ऽल॑भन्त॒ तयै॑वास्मिन् रुच॑मदधुर्यो
ब्र॒ह्मव॑र्चस॒कामः॑ स्यात् तस्मा॑ ए॒ताꣳ सौ॒रीꣳ श्वे॒तां व॑शामा
ल॒भेता॑मु॒मेवाऽऽदि॒त्यꣳ स्वे॑न॒ भाग॑धेये॒नोप॑ धावति॒ स ए॒वास्मिन्॑
ब्र॒ह्मव॑र्चसं दधाति॒ ब्र॒ह्मव॑र्चस्यै॒व भव॑ति॒ बैलु॒वो यू॒पो

भवत्यसौ-[] 48

TS 2.1.8.2

वा आ॒दि॒त्यो य॑तो॒ ऽजा॑यत॒ ततो॑ बि॒ल्व उ॑दतिष्ठथ् स॒योन्ये॑व ब्र॒ह्मव॑र्चसम॒व
रु॒न्धे ब्रा॑ह्मणस्प॒त्यां ब॑भ्रुक॒र्णीमा॑ ल॒भेता॑भिचरन् वारु॒णं द॑शकपालं
पु॒रस्ता॑न् निर्व॒पेद् वरु॑णेनै॒व भ्रा॑तृव्यं ग्राहयित्वा ब्र॒ह्मणा॑ स्तृणुते

बभ्रुक॒र्णी भव॑त्येतद्-वै ब्र॒ह्म॒णो रू॒पꣳ स॒मृद्ध्यै॑ स्फ्यो॒ यूपो॑ भवति
वज्रो॒ वै स्फ्यो॑ वज्र॒मेवास्मै॑ प्र हरति श॒रम॑यं ब॒र्हिः शृ॒णा - [] 49

TS 2.1.8.3

-त्ये॒वैनं॑ वैभी॒दक॑ इ॒द्ध्मो भि॒नत्ये॒वैनं॑ वैष्ण॒वं वा॒मन॑मा ल॒भेत॑
यं य॒ज्ञो नो॒पन॑मेद्-विष्णु॒र्वै य॒ज्ञो विष्णु॑मेव स्वेन भा॒गधे॒येनो॒प
धाव॑ति स ए॒वास्मै॑ य॒ज्ञं प्र य॑च्छत्यु॒पैनं॑ य॒ज्ञो न॑मति वा॒मनो॑ भवति
वैष्ण॒वो ह्ये॒ष दे॒वत॑या स॒मृद्ध्यै॑ त्वाष्ट्रं॑ व॒डब॑मा ल॒भेत॑ प॒शुकाम॑स्त्वष्टा
वै प॒शूनां॑ मि॒थुना॑नां - [] 50

TS 2.1.8.4

प्र॒जन॒यिता॑ त्वष्टा॒रमे॒व स्वेन॑ भा॒गधे॒येनो॒प धाव॑ति स ए॒वास्मै॑
प॒शून् मि॒थुना॑न् प्र ज॒नय॑ति प्र॒जा हि वा ए॒तस्मिन्॑ प॒शवः॑ प्रविष्टा
अथै॒ष पु॒मान्त्सन्॑ व॒डबः॑ सा॒क्षादे॒व प्र॒जां प॒शून्व॑ रुन्धे मै॒त्रꣳ
श्वे॒तमा॑ ल॒भेत॑ सं॒ग्रामे॑ सँय॒त्ते स॒मय॑कामो मि॒त्रमे॒व स्वेन॑ भा॒गधे॒येनो॒प
धाव॑ति स ए॒वैनं॑ मि॒त्रेण॑ सं न॒यति॑ - [] 51

TS 2.1.8.5

वि॒शा॒लो भ॒वति॑ व्य॒वसा॑ययत्ये॒वैनं॑ प्रा॒जाप॑त्यं कृ॒ष्णमा॑ ल॒भेत॑
वृ॒ष्टि॒कामः॑ प्र॒जाप॑तिर्वै वृ॒ष्ट्या ई॒शे प्र॒जाप॑तिमे॒व स्वेन॑ भा॒गधे॑ये॒नोप॑
धा॒वति॑ स ए॒वास्मै॑ पर्ज॒न्यं ँव॑र्षयति कृ॒ष्णो भ॑वत्ये॒ तद् वै वृ॒ष्ट्यै
रूप॑ꣳ रू॒पेणै॒व वृ॒ष्टि॒मव॑ रुन्धे श॒बलो॑ भ॒वति॑ वि॒द्युत॑मे॒वास्मै॑ ज॒नयि॑त्वा
वर्ष॑यत्यवाशृ॒ङ्गो भ॑वति वृ॒ष्टि॒मेवा॒स्मै नि॑ यच्छति () ॥ 52

(अ॒सौ – शृ॒णाति॑ – मि॒थुना॑नां – न॒यति॑ – यच्छति) (A8)

TS 2.1.9.1

वरु॑णꣳ सुषु॒वाण॑म॒न्नाद्यं॑ नो॒पान॑म॒थ् स ए॒तां वा॑रु॒णीं कृ॒ष्णां
वा॒शाम॑पश्यत् ताꣳ स्वा॒यै दे॒वता॑या आ ऽल॑भत॒ ततो॑ वै
तम॑न्नाद्य॒-मु॒पान॑म॒द्-यम॑लम॒न्नाद्या॑य स॒न्तम॑न्नाद्यं नो॒पन॑मे॒थ् स ए॒तां
वा॑रु॒णीं कृ॒ष्णां वा॒शामा॑ ल॒भेत॑ वरु॒णमे॒व स्वेन॑ भा॒गधे॑ये॒नोप॑ धा॒वति॑
स ए॒वास्मा॑ अ॒न्नं प्र॑ यच्छत्यन्नाद – [] 53

TS 2.1.9.2

ए॒व भ॑वति कृ॒ष्णा भ॑वति वा॒रुणी॑ ह्येषा दे॒वता॑या स॒मृद्ध्यै॑
मै॒त्रꣳ श्वे॒तमा॑ ल॒भेत॑ वा॒रुणं॑ कृ॒ष्णम॑पां चोष॒धीनां॑ च स॒न्धाव॑न्न॒कामो॑

मै॒त्री॒र्वा ओष॑धयो॒ वारु॑णीरापो॒ ऽपां च॒ खलु॑ वा ओष॑धीनां च॒ रस॑मुप
जी॒वामो मि॒त्रावरु॑णावे॒व स्वेन॑ भा॒गधे॑येनोप॒ धाव॑ति तावे॒वास्मा॒ अन्नं॑
प्र य॑च्छतो॒ ऽन्नाद॑ ए॒व भव॑ - [] 54

TS 2.1.9.3

-त्य॒पां चौष॑धीनां च॒ सन्धा॑वा ल॒भत॑ उ॒भय॑स्याव॒रुद्ध्यै॑ वि॒शाखो॑
यू॒पो भव॑ति द्वे ह्ये॒ते दे॒वते॒ समृ॑द्ध्यै॒ मैत्र॑श्चे॒तमा ल॑भेत॒ वारु॑णं
कृ॒ष्णं ज्यो॑गामयावी॒ यन् मै॒त्रो भव॑ति मि॒त्रेणै॒वास्मै॒ वरु॑णश्च॒ शम॑यति
यद्-वा॒रुणः॑ सा॒क्षादे॒वैनं॑ वरु॒णपा॒शान् मुञ्च॑त्यु॒त यदी॒तासु॑र्भव॑ति
जी॒वत्ये॒व दे॒वा वै पु॒ष्टिं नावि॑न्दन् - [] 55

TS 2.1.9.4

तां मि॒थुने॑ ऽप॒श्यन् तस्यां॑ न॒ सम॑राधयन् ताव॒श्चिना॑-व॒ब्रूता॑मा॒वयो॒र्वा
ए॒षा मैत॑स्यां॑ वद॒ध्वमि॒ति सा॑ ऽश्चि॒नोरे॒वाभव॑द्यः पु॒ष्टि॒कामः॑ स्याथ् स
ए॒तामा॑श्चि॒नीं य॒मीं व॒शामा॑ ल॒भेता॑श्चि॒नावे॒व स्वेन॑ भा॒गधे॑येनोप॒
धाव॑ति तावे॒वास्मिन् पु॒ष्टिं ध॑त्तः पु॒ष्यति॑ प्र॒जया॑ प॒शुभिः॑ ॥ 56

(अ॒न्नादो॑ - ऽन्नाद॑ ए॒व भव॑त्य - वि॒न्दन् - पञ्च॑चत्वारि॒ंशच्च॑)

(A9)

TS 2.1.10.1

आ॒श्विनं॑ धू॒म्रल॑लाम॒मा ल॑भेत॒ यो दु॒र्ब्रा॑ह्मणः॑ सोमं॑ पिपा॑सेद॒श्विनौ॑ वै
दे॒वाना॑-मसो॑मपावास्तां॒ तौ प॒श्चा सो॑मपी॒थं प्रा॑प्नुता-म॒श्विना॑वेतस्य॒
दे॒वता॑ यो दु॒र्ब्रा॑ह्मणः॑ सोमं॑ पिपा॑सत्य॒श्विना॑वेव॒ स्वेन॑ भा॒गधे॑येनोप॒
धाव॑तितावेवास्मै॑ सोमपी॒थं प्र य॑च्छत॒ उपै॑नꣳ सोमपी॒थो न॑मति॒
यद्-धू॒म्रो भ॑वति॒ धूम्रि॑माण-मे॒वास्मा॑दप॒ हन्ति॑ ल॒लामो॑ - [] 57

TS 2.1.10.2

भ॑वति॒ मुख॑त ए॒वास्मिन्॑ तेजो॑ दधाति॒ वाय॑व्यं गोमृ॒गमा ल॑भेत॒
यम॑ज॒घ्निवाꣳस॑-म॒भि॒शꣳसै॑यु-र॒पू॒ता वा ए॒तं वा॑गृच्छति॒
यम॑ज॒घ्निवाꣳस॑-म॒भि॒शꣳसन्ति॑ नैष॒ ग्राम्यः॑ प॒शुर्नार॑ण्यो यद्-गोमृ॒गो
ने॒वैष॑ ग्रामे॒ नार॑ण्ये॒ यम॑ज॒घ्निवाꣳस॑-म॒भि॒शꣳसन्ति॑ वा॒युर्वै॑ दे॒वानां॑
प॒वि॒त्रं वा॑युमे॒व स्वेन॑ भा॒गधे॑येनोप॒ धाव॑ति॒ स ए॒वै - [] 58

TS 2.1.10.3

-नं॑ पवयति॒ प॒राची॑ वा ए॒तस्मै॑ व्युच्छन्ती॒ व्युच्छ॑ति॒ तमः॑ पा॒प्मानं॑
प्र वि॑शति॒ यस्या॑श्विने॒ शस्य॑माने॒ सूर्यो॑ नाऽऽविर्भवति॒ सौर्यं॑
ब॒हुरू॒पमा ल॑भेतामुमे॒वादित्यꣳ स्वेन॑ भा॒गधे॑येनोप॒ धाव॑ति॒ स

ए॒वास्मा॒त् तमः॑ पा॒प्मान॒मप॑ ह॒न्ति प्र॒तीच्य॑स्मै व्यु॒च्छन्ती॑ व्यु॒च्छत्य॑प॒
तमः॑ पा॒प्मान॑ ह॒ते ॥ 59

(ल॒लामः॑ – स ए॒व – षट्च॑त्वारि॒ंशच्च॑) (A10)

TS 2.1.11.1

इन्द्रं॑ वो वि॒श्वत॒स्परी॑ >[1], न्द्रं॑ नरो॒ >[2],
मरु॑तो यद्ध॒ वो दि॒वो >[3], या वः॑ शर्म॒ >[4] ॥
भरे॑ष्विन्द्रं॒ सु॒हव॑ हवामहे ऽहो॒मुच॑ सु॒कृतं॑ दै॒व्यं ज॑नं ॥
अ॒ग्निं मि॒त्रं व॑रुणं॒ सा॒तये॑ भगं॒ द्यावा॑पृथि॒वी म॒रुतः॑ स्व॒स्तये॑ ॥
म॒मत्तु॑ नः॒ परि॑ज्मा वस॒रुहा॑ म॒मत्तु॑ वा॒तो अ॒पां वृ॑षण्वान् ।
शि॒शीत॑मिन्द्रा॒पर्व॑ता यु॒वं न॒स्तन्नो॑ वि॒श्वे व॑रिवस्यन्तु दे॒वाः ॥
प्रि॒या वो॒ नाम॑ – [] 60

TS 2.1.11.2

हु॒वे तु॒राणां॑ ।
आ यत् तृ॒पन्म॑रुतो वाव॒शानाः॑ ॥
श्रि॒यसे॒ कं भा॒नुभिः॑ सं मि॒मिक्षि॑रे ते र॒श्मिभि॑स्त ऋ॒क्वभिः॑ सु॒खाद॑यः ।
ते वा॒शीम॑न्त इ॒ष्मिणो॑ अ॒भीर॑वो वि॒द्रे प्रि॒यस्य॑ मा॒रुत॑स्य धा॒मनः॑ ॥

अ॒ग्निः प्र॒थमो वसु॑भिर्नो अ॒व्याथ् सोमो रु॒द्रेभि॑रभि रक्षतु त्मना ॥
 इन्द्रो मरु॒द्धिर् ऋ॒तुधा कृ॑णोत्वादित्यैर्नो वरु॒णः सꣳ शि॑शातु ॥
 सं नो दे॒वो वसु॑भिरग्निः सꣳ – [] 61

TS 2.1.11.3

सोम॑स्तनू॒भी रु॒द्रिया॑भिः ।
 समिन्द्रो मरु॒द्धिर्य॒ज्ञियैः समा॑दित्यैर्नो वरु॒णो अ॒जिज्ञि॑पत् ॥
 यथा ऽऽदि॒त्या वसु॑भिः सं॒बभू॑वुर्मरु॒द्धी रु॒द्राः सम॑जानताभि ।
 ए॒वा त्रि॑णामन्नहणीयमाना विश्वे दे॒वाः सम॑नसो भवन्तु ॥
 कु॒त्रा चि॒द्यस्य॑ समृ॒तौ र॒ण्वा नरो॑ नृष॒दने॑ ।
 अ॒र्हन्त॑श्चिद्-यमि॒न्धते॑ सञ्ज॒नय॑न्ति जन्त॒वः ॥
 सं य॑दिषो वनामहे सꣳ ह॒व्या मा॑नुषाणां ।

उ॒त द्यु॒म्नस्य॑ शव॒स – [] 62

TS 2.1.11.4

ऋ॒तस्य॑ र॒श्मिमा॑ ददे ॥
 य॒ज्ञो दे॒वाना॑म् प्रत्येति सु॒म्नमा॑दि॒त्यासो भ॑वता मृड॒यन्तः॑ ।
 आ वो ऽर्वा॑ची सु॒मति॑र्वृ॒त्यादꣳहो॑ शि॒द् या वरि॑वो॒वित्तरा॑ ऽस॒त् ॥

शुचिरपः सूयवसा अदब्ध उप क्षेति वृद्धवयाः सुवीरः ।
 नकिष्टं घनन्त्यन्तितो न दूराद् य आदित्यानां भवति प्रणीतौ ॥
 धारयन्त आदित्यासो जगत्स्था देवा विश्वस्य भुवनस्य गोपाः ।
 दीर्घाधियो रक्षमाणा-[] 63

TS 2.1.11.5

असुर्यमृतावान-श्चयमाना ऋणानि ॥
 तिस्रो भूमीर्धारयन् त्रीं रुत द्यून् त्रीणि व्रता विदथे अन्तरेषां ।
 ऋतेनाऽऽदित्या महि वो महित्वं तदर्यमन् वरुण मित्र चारु ॥
 त्यान्तु क्षत्रियां अव आदित्यान् याचिषामहे ।
 सुमृडीकां अभिष्टये ॥
 न दक्षिणा वि चिकिते न सव्या न प्राचीनमादित्या नोत पश्चा ।
 पाक्या चिद्-वसवो धीर्या चिद् - [] 64

TS 2.1.11.6

-युष्मानीतो अभयं ज्योतिरश्यां ॥
 आदित्यानामवसा नूतनेन सक्षीमहि शर्मणा शन्तमेन ।
 अनागास्त्वे अदितित्वे तुरास इमं यज्ञं दधतु श्रोषमाणाः ॥

इ॒मं मे॑ वरु॒ण श्रु॒धी हव॑म॒द्या च॑ मृ॒डय॑ ।

त्वा॒मव॑स्यु॒रा च॑के ॥

तत्त्वा॑ या॒मि ब्र॑ह्म॒णा व॑न्द॒मान॑-स्तदाशा॑स्ते यज॑मानो ह॒विर्भिः॑ ।

अहे॑ड॒मानो॑ वरु॒णेह॑ बो॒द्ध्यु॑रु॒शः स॒ मा न॒ आयुः॑ प्र मो॒षीः ॥ 65

(ना॒मा - ऽग्निः॑ सः - श॒व॑सो - रक्ष॑मा॒णा - धी॒र्या॑ चि॒दे -
का॒न्नप॑ञ्चा॒शच्च॑) (A11)

Prasna Korvai with starting Padams of 1 to 11 Anuvaakams :-

(वा॒य॒व्यं॑ – प्रा॒ज॒प॒ति॒स्ता॑ वरु॒णं॑ – दे॒वा॒सु॒रा ए॒ष्व – सा॒वा॒दि॒त्यो॑
द॒श॒र्ष॒भा-मि॒न्द्रो॑ व॒ल॒स्य॑ – बा॒र्ह॒स्प॒त्यं॑ – ँ॒व॒ष॒ट्का॒रो॑ – ऽसौ॒सौ॒रीं॑
– ँ॒व॒रु॒ण – मा॒श्वि॒न – मि॒न्द्रं॑ ँ॒वो॒ न॒र – ए॒का॒द॒श)

Korvai with starting Padams of 1, 11, 21 Series of Panchaatis :-

(वा॒य॒व्य॑ – मा॒ग्ने॒यीं॑ कृ॒ष्ण॒ग्री॒वी – म॒सा॒वा॒दि॒त्यो॑ – वा अ॒हो॒रा॒त्रा॒णि –
व॒ष॒ट्का॒रः – प्र॒ज॒न॒यि॒ता – हु॒वे॑ तु॒रा॒णां॑ – पञ्च॑षष्टिः)

First and Last Padam of First Prasnam of Kandam 2:-

(वा॒य॒व्यं॑ – प्र॒मो॒षीः॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां द्वितीयकाण्डे प्रथमः प्रश्नः समाप्तः ॥

=====

2.1.1 Appendix

2.1.11.1 – इन्द्रं॑ वो॒ विश्व॑तस्परि॒ >[1]

इन्द्रं॑ वो॒ विश्व॑तस्परि॒ हवाम॑हे जने॑भ्यः ।

अस्माक॑मस्तु॒ केवलः॑ ॥ (Appearing in TS 1.6.12.1)

2.1.11.1 – न्द्रं॑ नरो॒ >[2]

इन्द्रं॑ नरो॒ नेम॑धिता हवन्ते॒ यत्पार्या॑ युनज॑ते धियस्ताः ।

शूरो॑ नृषा॑ता शव॑सश्चकान॒ आ गोम॑ति व्रजे॒ भजा॑ त्वन्नः॑ ॥

(Appearing in TS 1.6.12.1)

2.1.11.1 - मरु॑तो यद्ध॒ वो दि॒वो >[3]

मरु॑तो यद्ध॒ वो दि॒वः सु॒म्ना यन्तो॑ हवाम॑हे ।

आ तू॒ न उप॑ गन्त॒न ॥ (Appearing in TS 1.5.11.4)

2.1.11.1 – या वः शर्म>⁴

या वः शर्म शशमानाय सन्ति त्रिधातूनि दाशुषे यच्छताधि ।
अस्मभ्यं तानि मरुतो वि यन्त रयिं नो धत्त वृषणः सुवीरं ॥

(Appearing in TS 1.5.11.5)

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

2.2द्वितीयकाण्डे द्वितीयः प्रश्नः – इष्टिविधानं

TS 2.2.1.1

प्र॒जाप॑तिः प्र॒जा अ॑सृज॒त ताः सृ॒ष्टा इ॑न्द्रा॒ग्नी अ॑पा॒गू॒हता॑ꣳ सो ऽचा॑यत्
प्र॒जाप॑तिरिन्द्रा॒ग्नी वै मे॑ प्र॒जा अ॑पा॒घुक्ष॑ता॒मिति॑ स ए॒तमै॑न्द्रा॒ग्न-
मेका॑दशकपाल-मपश्यत् तं निरवपत् तावस्मै प्रजाः प्रासाधयता-
मिन्द्रा॒ग्नी वा ए॒तस्य॑ प्र॒जाम॑प गू॒हतो॑ यो ऽलं प्र॒जायै॑ सन् प्र॒जां न
वि॒न्दत॑ ऐन्द्रा॒ग्न-मेका॑दशकपालं निर्वपेत् प्रजाकाम इन्द्रा॒ग्नी-[] 1

TS 2.2.1.2

ए॒व स्वे॑न भा॒ग॒धे॒ये॒नोप॑ धावति तावेवास्मै प्रजां प्र साधयतो विन्दते
प्र॒जा-मै॑न्द्रा॒ग्न-मेका॑दशकपालं निर्वपेथ् स्पर्द्धमानः क्षेत्रे वा
सजा॑तेषु वेन्द्रा॒ग्नी ए॒व स्वे॑न भा॒ग॒धे॒ये॒नोप॑ धावति ताभ्यामेवेन्द्रियं
वी॒र्यं॑ भ्रातृव्यस्य वृद्धे वि पाप्मना भ्रातृव्येण जयते ऽप वा
ए॒तस्मा॑दिन्द्रियं वी॒र्यं॑ क्रामति यः संग्राम-मुपप्रयात्यैन्द्रा॒ग्न-
मेका॑दशकपालं नि - [] 2

TS 2.2.1.3

–र्व॒पेथ् सं॒ग्राम॑–मु॒पप्र॒यास्य॑न्नि॒न्द्राग्नी॑ ए॒व स्वेन॑ भा॒गधे॒येनो॒प धा॑वति
तावे॒वास्मि॑न्नि॒न्द्रियं॑ वी॒र्यं॑ धत्तः स॒हेन्द्रि॒येण॑ वी॒र्ये॒णोप॑ प्र या॒ति
जय॑ति त॒ꣳ सं॒ग्रामं॑ वि॒ वा ए॒ष इन्द्रि॒येण॑ वी॒र्ये॒णर्द्ध्यते॑ यः सं॒ग्रामं॑
जय॑त्यै॒न्द्राग्न॑–मे॒काद॑श॒कपालं॑ निर्व॒पेथ् सं॒ग्रामं॑ जि॒त्वेन्द्रा॒ग्नी ए॒व
स्वेन॑ भा॒गधे॒येनो॒प धा॑वति तावे॒वास्मि॑न्नि॒न्द्रियं॑ वी॒र्यं॑ – [] 3

TS 2.2.1.4

धत्तो॑ नेन्द्रि॒येण॑ वी॒र्ये॒ण व्यृ॑द्ध्यते ऽप॒ वा ए॒तस्मा॑दिन्द्रि॒यं वी॒र्यं॑ क्रा॒मति॑
य ए॒ति जन॑ता॒मैन्द्रा॒ग्न–मे॒काद॑श॒कपालं॑ निर्व॒पे–ज्जन॑ता॒मेष्य॑न्नि॒न्द्राग्नी॑
ए॒व स्वेन॑ भा॒गधे॒येनो॒प धा॑वति तावे॒वास्मि॑न्नि॒न्द्रियं॑ वी॒र्यं॑ धत्तः
स॒हेन्द्रि॒येण॑ वी॒र्ये॒ण जन॑ता॒मेति॑ पौ॒ष्णं च॒रुम॑नु निर्व॒पेत् पू॒षा वा
इन्द्रि॒यस्य॑ वी॒र्यस्या॑नुप्र॒दाता॑ पू॒षण॑मे॒व – [] 4

TS 2.2.1.5

स्वेन॑ भा॒गधे॒येनो॒प धा॑वति स ए॒वास्मा॑ इन्द्रि॒यं वी॒र्यम॑नु प्र य॒च्छति॑
क्षै॒त्रप॒त्यं च॒रुं निर्व॑पे–ज्जन॑ता॒माग॑त्ये॒यं वै क्षे॑त्र॒स्य पति॑र॒स्यामे॒व प्रति॑
तिष्ठ॑त्यै॒न्द्राग्न॑–मे॒काद॑श॒कपाल॑–मु॒परि॑ष्टान्–निर्व॒पेद॒स्यामे॒व

प्रति॑ष्ठाये॑न्द्रि॒यं वी॒र्यमु॑परि॒ष्टा-दा॒त्मन् ध॑त्ते ॥ 5

(प्र॒जाका॑म इन्द्रा॒ग्नी - उप॑प्रयात्यै॒न्द्राग्नमेका॑दशकपालं नि- वी॒र्यं -
पू॒षण॑मे वै - कान्नच॑त्वारि॒ंशच्च॑) (A1)

TS 2.2.2.1

अ॒ग्नये॑ पथि॒कृते॑ पु॒रोडा॑श-म॒ष्टाक॑पालं निर्व॑पेद्-यो द॑र्.शपूर्णमासया॒जी
सन्न॑मावास्यां वा पौ॒र्णमा॒सीं वा ऽति॑पादयेत् पथो वा ए॒षो
ऽध्य॑पथेनैति यो द॑र्.शपूर्णमासया॒जी सन्न॑मावास्यां वा पौ॒र्णमा॒सीं
वा ऽति॑पादयत्यग्निमेव पथि॒कृत॑ स्वेन॑ भा॒गधे॑येनोप॑ धावति॒ स
ए॒वैन॑मपथात् पन्था॒मपि॑ नयत्यन॒ड्वान् दक्षि॑णा व॒ही ह्ये॑ष समृ॒द्ध्य
अ॒ग्नये॑ व्रत॑पतये - [] 6

TS 2.2.2.2

पु॒रोडा॑शम॒ष्टाक॑पालं निर्व॑पेद्-य आहि॑ताग्निः सन्न॑व्रत्यमिव॒ चरे॑दग्निमेव
व्रत॑पति॒ स्वेन॑ भा॒गधे॑येनोप॑ धावति॒ स ए॒वैनं॑ व्रत॑मा लं॒भयति॑ व्रत्यो
भव॑त्य॒ग्नये॑ रक्षो॒घ्ने पु॒रोडा॑शम॒ष्टाक॑पालं निर्व॑पेद्-य रक्षा॑सि
सचे॑रन्नग्निमेव रक्षो॒हण॑ स्वेन॑ भा॒गधे॑येनोप॑ धावति॒ स
ए॒वास्मा॑द्-रक्षा॑स्यप॒ हन्ति॑ नि॒शिता॑यां निर्व॑पेन् - [] 7

TS 2.2.2.3

नि॒शि॒ता॒या॒॒ हि॒ र॒क्षा॒॒॒ सि॒ प्रे॒रते॑ सं॒प्रे॒र्णान्ये॑वै॒नानि॑ ह॒न्ति॒
 परि॑श्रि॒ते या॒जये॑द्-र॒क्ष॒सा-म॒न॒न्व॒व॒चा॒राय॑ र॒क्षो॒घ्नी॑ या॒ज्यानु॒वा॒क्ये॑
 भव॑तो र॒क्ष॒सा॒॒ स्तृ॒त्या अ॒ग्नये॑ रु॒द्र॒व॒ते पु॒रो॒डा॒श॒म॒ष्टाक॑पा॒लं
 निर्व॑पे॒दभि॒चर॑न्ने॒षा वा अ॒स्य॒ घो॒रा त॒नूर्य॑द्-रु॒द्र॒स्त॒स्मा
 ए॒वैन॒मावृ॑श्च॒ति ता॒ज॒गा॒र्ति-मा॒च्छ॑त्य॒ग्नये॑ सु॒रभि॑म॒ते
 पु॒रो॒डा॒श॒म॒ष्टाक॑पा॒लं निर्व॑पे॒द्-य॒स्य॒ गा॒वो वा पु॒रु॒षा - [] 8

TS 2.2.2.4

वा प्र॒मीये॑रन् यो वा बि॒भी॒या॒दे॒षा वा अ॒स्य॒ भे॒ष॒ज्या त॒नूर्य॑थ्
 सु॒रभि॑म॒ती॒तयै॑वा॒स्मै भे॒ष॒जं क॑रोति सु॒रभि॑म॒ते भव॑ति पू॒ती॒ग॒न्ध॒स्या-
 प॒ह॒त्या अ॒ग्नये॑ क्षा॒म॒व॒ते पु॒रो॒डा॒श॒म॒ष्टाक॑पा॒लं निर्व॑पे॒थ् सं॒ग्रा॒मे सँ॑य॒त्ते
 भा॒ग॒धे॒ये॒नै॒वैन॒॑ श॒म॒यि॒त्वा प॒रा॒न॒भि नि॒दि॒श॒ति य॒म॒व॒रे॒षां वि॒द्ध्य॑न्ति
 जी॒व॒ति स॒ यं प॑रे॒षां प्र॒ स मी॑य॒ते ज॑य॒ति त॒ सं॒ग्रा॒म - [] 9

TS 2.2.2.5

-म॒भि वा ए॒ष ए॒तानु॑च्यति॒ येषां॑ पू॒र्वा॒प॒रा अ॒न्व॒ञ्चः॑ प्र॒मी॑य॒न्ते
 पु॒रु॒षाहु॑ति॒र्ह्यस्य॑ प्रि॒य॒त॒मा॒ग्नये॑ क्षा॒म॒व॒ते पु॒रो॒डा॒श॒म॒ष्टाक॑पा॒लं

निर्व॑पेद्-भा॒ग॒धे॒ये॒नै॒वैन॑ꣳ श॒म॒य॒ति॒ नैषां॑ पु॒रा ऽऽयु॑षो ऽप॒रः
 प्र मी॑यतेऽभि॒ वा ए॒ष ए॒तस्य॑ गृ॒हानु॑च्यति॒ यस्य॑ गृ॒हान् द॑हत्य॒ग्नये॑
 क्षा॒म॒व॒ते पु॒रोडा॑शम॒ष्टाक॑पालं॒ निर्व॑पेद्-भा॒ग॒धे॒ये॒नै॒वैन॑ꣳ श॒म॒य॒ति॒
 ना ()-स्या॑प॒रं गृ॒हान् द॑हति ॥ 10

(व्र॒तप॑तये - नि॒शि॒तायां॑ निर्व॑पेत् - पु॒रु॒षाः - सं॒ग्रा॒मं - न -
 च॒त्वा॒रि च) (A2)

TS 2.2.3.1

अ॒ग्नये॑ का॒माय॑ पु॒रोडा॑शम॒ष्टाक॑पालं॒ निर्व॑पेद्-यं का॒मो नो॒प॒नमे॑द॒ग्निमे॑व
 का॒मꣳ स्वे॑न॒ भा॒ग॒धे॒ये॒नोप॑ धावति॒ स ए॒वैनं॑ का॒मेन॑ स॒मर्द्ध॑यत्यु॒पैनं॑
 का॒मो न॑मत्य॒ग्नये॑ यवि॒ष्ठाय॑ पु॒रोडा॑शम॒ष्टाक॑पालं॒ निर्व॑पेथ् स्प॒र्द्ध॑मानः
 क्षे॒त्रे वा स॒जा॒तेषु॑ वा ऽग्नि॒मेव॑ यवि॒ष्ठꣳ स्वे॑न॒ भा॒ग॒धे॒ये॒नोप॑ धावति॒
 तेनै॒वेन्द्रि॑यं वी॒र्यं॑ भ्रातृ॒व्यस्य॑ - [] 11

TS 2.2.3.2

यु॒व॒ते वि पा॒प्म॒ना भ्रा॑तृ॒व्येण॑ ज॒य॒ते ऽग्नये॑ यवि॒ष्ठाय॑ पु॒रोडा॑शम॒
 ष्टा॒क॒पा॒लं निर्व॑पेदभि॒चर्य॑माणो ऽग्नि॒मेव॑ यवि॒ष्ठꣳ स्वे॑न॒ भा॒ग॒धे॒ये॒नोप॑
 धावति॒ स ए॒वास्मा॑द्-रक्षाꣳसि॒ यव॑यति॒ नैन॑मभि॒चर॑न्थ् स्तृणु॒ते

ऽग्नय॑ आयु॑ष्मते॒ पुरो॑डाश॒म॒ष्टाक॑पालं॒ निर्व॑पेद्-यः॒ का॒मये॑त॒ सर्व॑-
मायु॑रिया॒-मि॒त्यग्नि॑- मे॒वा ऽऽयु॑ष्मन्त॒७ स्वेन॑ भा॒ग॒धेये॒नोप॑ धावति॒ स
ए॒वास्मि॒ - [] 12

TS 2.2.3.3

-न्नायु॑र्दधाति॒ सर्व॑मायु॑रेत्य॒ग्नये॑ जा॒तवे॑दसे॒ पुरो॑डाश॒-म॒ष्टाक॑पालं
निर्व॑पेद्-भू॒तिकामो॑ ऽग्निमे॒व जा॒तवे॑दस॒७ स्वेन॑ भा॒ग॒धेये॒नोप॑ धावति॒ स
स ए॒वैनं॑ भू॒तिं ग॑मयति॒ भव॑त्ये॒वाग्नये॑ रु॒क्मते॑ पुरो॑डाश॒-म॒ष्टाक॑पालं
निर्व॑पेद्-रु॒क्कामो॑ ऽग्निमे॒व रु॒क्मन्त॑७ स्वेन॑ भा॒ग॒धेये॒नोप॑ धावति॒ स
ए॒वास्मिन् रुचं॑ दधाति॒रोच॑त ए॒वाग्नये॑ तेज॒स्वते॑ पुरो॑डाश - [] 13

TS 2.2.3.4

-म॒ष्टाक॑पालं॒ निर्व॑पेत् तेज॒स्कामो॑ ऽग्निमे॒व तेज॑स्वन्त॒७
स्वेन॑ भा॒ग॒धेये॒नोप॑ धावति॒ स ए॒वास्मिन् तेजो॑ दधाति॒ तेज॑स्व्ये॒व
भव॑त्य॒ग्नये॑ सा॒हन्त्या॑य पुरो॑डाश॒म॒ष्टाक॑पालं॒ निर्व॑पेथ् सी॒क्षमाणो॑
ऽग्निमे॒व सा॒हन्त्य॑७ स्वेन॑ भा॒ग॒धेये॒नोप॑ धावति॒ तेनै॒व स॑हते॒ यः
सी॒क्षते॑ ॥ 14

(भ्रातृ॑व्यस्या -स्मिन् - तेज॑स्वते॒ पुरो॑डश॒ - म॒ष्टात्रि॑ञ्शच्च) (A3)

TS 2.2.4.1

अ॒ग्नये॑ ऽन्न॒वते॑ पु॒रो॒डा॒श॒म॒ष्टाक॑पा॒लं निर्व॑पेद्-यः का॒मये॑ता॒न्नवा॑न्थ-
स्या॒मि॒त्य॒ग्नि-मे॒वा-न्न॑वन्त॒ऽस्वेन॑ भा॒ग॒धेये॑नोप॒ धाव॑ति स
ए॒वैन॑म॒न्नव॑न्तं क॒रोत्य॑न्न॒वाने॒व भ॑वत्य॒ग्नये॑ ऽन्ना॒दाय॑ पु॒रो॒डा॒श॒म॒ष्टाक॑पा॒लं
निर्व॑पेद्-यः का॒मये॑ता॒न्नादः॑ स्या॒मि॒त्य॒ग्नि-मे॒वान्ना॑द॒ऽस्वेन॑
भा॒ग॒धेये॑नोप॒ धाव॑ति स ए॒वैन॑म॒न्नादं॑ क॒रोत्य॑न्नाद - [] 15

TS 2.2.4.2

ए॒व भ॑वत्य॒ग्नये॑ ऽन्न॒पतये॑ पु॒रो॒डा॒श॒म॒ष्टाक॑पा॒लं निर्व॑पेद्-यः
का॒मये॑ता॒न्नप॑तिः स्या॒मि॒त्य॒ग्नि-मे॒वान्न॑पति॒ऽस्वेन॑ भा॒ग॒धेये॑नोप॒ धाव॑ति
स ए॒वैन॑म॒न्नप॑तिं क॒रोत्य॑न्न॒पतिरे॒व भ॑वत्य॒ग्नये॑ प॒वमा॑नाय
पु॒रो॒डा॒श॒म॒ष्टाक॑पा॒लं निर्व॑पेद्ग॒नये॑ पा॒वका॑या॒ग्नये॑ शु॒चये॑ ज्यो॒गा॒मया॑वी
यद॒ग्नये॑ प॒वमा॑नाय निर्व॑पति प्रा॒णमे॒वास्मि॑न् तेन॑ दधाति॒ यद॒ग्नये॑-[] 16

TS 2.2.4.3

पा॒वका॑य॒ वाच॑मे॒वास्मि॑न् तेन॑ दधाति॒ यद॒ग्नये॑ शु॒चय॑ आ॒युरे॒वास्मि॑न्
तेन॑ दधात्यु॒त यदी॒तासु॑र्भवति॒ जीव॑त्ये॒वैता॑मे॒व निर्व॑पेच्चक्षु॒ष्कामो॑
यद॒ग्नये॑ प॒वमा॑नाय निर्व॑पति प्रा॒णमे॒वास्मि॑न् तेन॑ दधाति॒ यद॒ग्नये॑

पाव॒काय॒ वाच॑मे॒वास्मिन्॒ तेन॑ दधाति॒ यद॒ग्नये॒ शुचये॒ चक्षु॑रे॒वास्मिन्॒
तेन॑ दधा – [] 17

TS 2.2.4.4

–त्यु॒त यद्य॑न्धो भवति॒ प्रैव॑ पश्यत्य॒ग्नये॑ पु॒त्रव॑ते पु॒रोडा॑शम॒ष्टाक॑पालं
निर्व॑पेदिन्द्राय पु॒त्रिणे॑ पु॒रोडा॑शमेकादशकपालं प्र॒जाका॑मो ऽग्निरे॒वास्मै॑
प्र॒जांप्र॑जनयति वृ॒द्धामिन्द्रः॒ प्र य॑च्छत्य॒ग्नये॒ रस॑वते ऽजक्षीरे चरुं
निर्व॑पेद्–यः का॒मये॑त रस॒वान्थ॒ स्या॑मित्य॒ग्निमे॒व रस॑वन्त॒७ स्वेन॑
भा॒गधे॑येनोप॒ धाव॑ति स ए॒वैन॒॑ रस॑वन्तं करोति – [] 18

TS 2.2.4.5

रस॒वाने॒व भव॑त्यजक्षीरे भवत्याग्नेयी वा ए॒षा यद॑जा साक्षादे॒व
रस॒मव॑ रुन्धे ऽग्नये॒ वसु॑मते पु॒रोडा॑शम॒ष्टाक॑पालं निर्व॑पेद्–यः
का॒मये॑त वसु॒मान्थ॒–स्या॑मित्य॒ग्नि–मे॒व वसु॑मन्त॒७ स्वेन॑ भा॒गधे॑येनोप॒
धाव॑ति स ए॒वैनं॑ वसु॒मन्तं॑ करोति वसु॒माने॒व भव॑त्य॒ग्नये॑ वाज॒सृते॑
पु॒रोडा॑शम॒ष्टाक॑पालं निर्व॑पेथ् संग्रा॒मे सँय॑त्ते वाजं – [] 19

TS 2.2.4.6

ॐ॑ वा॒ ए॒ष॒ सि॒सी॒र्ष॒ति॒ यः॑ सं॒ग्रा॒मं॑ जि॒गी॒ष॒त्य॒ग्निः॑ ख॒लु॒ वै दे॒वानां॑
 वा॒ज॒सृ॒द॒ग्नि॒मे॒व वा॒ज॒सृ॒त॒ऽ स्वे॒न भा॒ग॒धे॒ये॒नो॒प धा॒वति॑ धा॒वति॑
 वा॒ज॒ऽ ह॒न्ति॑ वृ॒त्रं ज॒यति॑ त॒ऽ सं॒ग्रा॒म॒म॒थो अ॒ग्निरि॒व न प्र॑ति॒धृषे॑
 भव॒त्य॒ग्नये॑ ऽग्नि॒वते॑ पु॒रो॒डा॒श॒म॒ष्टाक॑पा॒लं निर्व॑पेद्-यस्या॒ग्ना-
 व॒ग्नि- म॑भ्यु॒द्धरे॑यु-निर्दि॑ष्टभा॒गो वा ए॒तयो॑र॒न्यो ऽनि॑र्दिष्टभा॒गो ऽन्य
 स्तौ सं॒भव॑न्तौ यज॒मान - [] 20

TS 2.2.4.7

-म॒भि सं॒ भव॑तः स ई॒श्वर॑ आ॒र्ति॒मा॒र्तो-र्य॑द॒ग्नये॑ ऽग्नि॒वते॑ निर्व॑पति
 भा॒ग॒धे॒ये॒नै॒वैनौ॑ श॒मय॑ति नाऽऽर्ति॒मा॒च्छ॑ति यज॒मानो॑ ऽग्नये॒ ज्योति॑ष्मते
 पु॒रो॒डा॒श॒म॒ष्टाक॑पा॒लं निर्व॑पेद्-यस्या॒ग्निरु॑द्धृ॒तो ऽहु॑ते ऽग्नि॒होत्र॑
 उ॒द्वाये॑दपर आ॒दी॒प्या॒नू॒द्धृत्य॑ इत्याहु॒स्तत् तथा॑ न का॒र्यं यद्-
 भा॒ग॒धे॒य॒म॒भि पूर्वं॑ उ॒द्धि॒यते॑ किम॒परो॑ ऽभ्यु - [] 21

TS 2.2.4.8

-दि॒ध्रये॑तेति॒ तान्ये॒वाव॒क्षा॒णानि॑ सन्नि॒धाय॑ म॒न्थे॒दितः॑ प्र॒थमं॑ जज्ञे
 अ॒ग्निः स्वा॑द्-यो॒ने-र॒धि जा॑तवे॒दाः ।

स गाय॑त्रिया त्रि॒ष्टुभा॑ जग॑त्या दे॒वेभ्यो॑ ह॒व्यं व॑हतु प्र॒जान॑न्निति
छन्दो॑भिरेवैन॒ꣳ स्वाद्-यो॒नेः प्र॑ जनयत्येष वाव सो ऽग्निरित्याहु
ज्योति॑ स्त्वा अस्य॒ परा॑पतितमिति यद॒ग्नये॑ ज्योति॑ष्मते निर्व॒पति॑
यदे॒वास्य॑ () ज्योतिः॑ परा॑पतितं तदे॒वाव॑ रुन्धे ॥ 22

(करोत्यन्नादो - दधाति यदग्नये - शुचये चक्षुरेवास्मिन् तेन दधाति
-करोति - वाजं - यजमान - मु - देवास्य - षट्च) (A4)

TS 2.2.5.1

वैश्वान॑रं द्वाद॑शकपालं निर्व॑पेद्-वारु॑णं चरुं दधि॑क्राव्.ण्णे
चरु॑मभि॒शस्य॑मानो यद्-वैश्वान॑रो द्वाद॑शकपालो भवति सँव॑त्सरो वा
अ॒ग्नि वै॑श्वान॑रः सँव॑त्सरेणैवैन॒ꣳ स्वद॑यत्यप पापं वर्ण॑ हते
वारु॑णेनैवैनं वरु॑णपा॒शान् मुञ्च॑ति दधि॑क्राव्.ण्णा पुनाति॑ हिर॒ण्यं
दक्षि॑णा प॒वित्रं॑ वै हिर॒ण्यं पु॑नात्येवैनमाद्य-मस्यान्नं॑ भवत्येतामेव
निर्व॑पेत् प्र॒जाका॑मः सँव॑त्सरो - [] 23

TS 2.2.5.2

वा ए॒तस्या॑शान्तो योनिं प्र॒जायै॑ पशू॒नां निर्द॑हति यो ऽलं प्र॒जायै॑ सन्
प्र॒जां न वि॒न्दते॑ यद्-वैश्वान॑रो द्वाद॑शकपालो भवति सँव॑त्सरो वा

अ॒ग्नि॒ वै॒श्वा॒नरः॑ सँ॒व॒त्स॒रमे॒व भा॒ग॒धे॒येन॑ श॒मय॑ति॒ सो ऽ॒स्मै शान्तः॑
स्वाद्-यो॒नैः प्र॒जां प्र॑ ज॒नय॑ति॒ वारु॑णे॒नै॒वैनं॑ व॒रुण॑पा॒शान् मुञ्च॑ति
दधि॒क्राव्.॒ण्णा पु॑नाति॒ हिर॑ण्यं दक्षि॒णा प॒वित्रं॑ वै हिर॑ण्यं

पु॒नात्ये॒वैनं॑- [] 24

TS 2.2.5.3

वि॒न्दते॑ प्र॒जां वै॒श्वा॒नरं॑ द्वा॒दश॑क॒पालं॑ निर्व॑पेत् पु॒त्रे जा॒तेय॑द॒ष्टाक॑पालो
भ॒वति॑ गा॒यत्रि॑यै॒वैनं॑ ब्र॒ह्मव॑र्च॒सेन॑ पु॒नाति॑ यन्न॒वक॑पाल-स्त्रि॒वृ॒तैवा॑स्मिन्
तेजो॑ दधाति॒ यद्-द॑श॒कपालो॑ वि॒राजै॑वास्मिन्न॒न्नाद्यं॑ दधाति॒
यदे॒काद॑श॒कपाल-॑ स्त्रि॒ष्टुभै॑वास्मिन्नि॒न्द्रियं॑ दधाति॒ यद्-द्वा॑दश॒कपालो॑
जग॑त्यै॒वास्मिन् प॒शून् द॑धाति॒ यस्मिन् जा॒त ए॒तामि॑ष्टिं

निर्व॑पति॒ पू॒त- [] 25

TS 2.2.5.4

ए॒व ते॒ज॒स्व्यन्ना॑द इ॒न्द्रिया॒वी प॑शु॒मान् भ॑व॒त्यव॒ वा ए॒ष
सु॒वर्गा ल्लो॒काच्छि॑द्यते॒ यो द॑र्.श॒पूर्ण॑मा॒सया॒जी स॒न्नमा॑वा॒स्यां वा
पौ॒र्णमा॒सीं वा॑ ऽति॒पा॒दय॑ति सु॒वर्गाय॑ हि लो॒काय॑ द॑र्.श॒पूर्ण॑मा॒सावि॑ज्येते
वै॒श्वा॒नरं॑ द्वा॒दश॑क॒पालं॑ निर्व॑पे॒दमा॑वा॒स्यां वा॑ पौ॒र्णमा॒सीं

वा ऽतिपाद्य सँवथ्सरो वा अग्नि वैश्वानरः सँवथ्सरमेव प्रीणात्यथो
सँवथ्सरमेवास्मा उप दधाति सुवर्गस्य लोकस्य समष्ट्या-[] 26

TS 2.2.5.5

अथो देवता एवान्वारभ्य सुवर्गं लोकमेति वीरहा वा एष देवानां
यो ऽग्नि-मुद्वासयते न वा एतस्य ब्राह्मणा ऋतायवः पुरा
ऽन्नमक्षन्ना-ग्नेयमष्टाकपालं निर्वपेद्-वैश्वानरं द्वादशकपाल-
मग्निमुद्वासयिष्यन्. यदष्टाकपालो भवत्यष्टाक्षरा गायत्रीगायत्रो
ऽग्निर् यावानेवाग्नि-स्तस्मा आतिथ्यं करोत्यथो यथा जनं
यते ऽवसं करोति तादृ - [] 27

TS 2.2.5.6

-गेव तद्-द्वादशकपालो वैश्वानरो भवति द्वादश मासाः सँवथ्सरः
सँवथ्सरः खलु वा अग्नेर्योनिः स्वामेवैनं योनिं गमय-त्याद्यमस्यान्नं
भवति वैश्वानरं द्वादशकपालं निर्वपेन्मारुतं सप्तकपालं ग्रामकाम
आहवनीये वैश्वानरमधि श्रयति गार्हपत्ये मारुतं पापवस्यसस्य
विधृत्यै द्वादशकपालो वैश्वानरो भवति द्वादश मासाः सँवथ्सरः
सँवथ्सरेणैवास्मै सजाताऽश्यावयति मारुतो भवति - [] 28

TS 2.2.5.7

म॒रुतो॑ वै दे॒वानां॑ ँवि॒शो दे॒ववि॒शेनै॒वास्मै॑ म॒नुष्य॑वि॒शम॑व रुन्धे
स॒प्तक॑पालो भवति स॒प्तग॑णा वै म॒रुतो॑ ग॒णश॑ ए॒वास्मै॑ स॒जा॒तान॑व
रुन्धे ऽनू॒च्यमा॑न आ सा॒दय॑ति वि॒शमे॒वास्मा॑ अनु॒वर्त्मानं॑ करोति ॥ 29

(प्र॒जाका॑मः सँव॒थ्सरः॑ - पु॒नात्ये॒वैनं॑ - पू॒तः - स॒मष्ट्यै॑ -
ता॒दृङ् - मा॒रुतो॑ भ॒व - त्येका॑न्न त्रि॒श॒च्च) (A5)

TS 2.2.6.1

आ॒दि॒त्यं च॒रुं निर्व॑पेथ् स॒ंग्राम॑-मु॒पप्र॑या॒स्यन्नि॒यं वा अ॑दि॒तिर॒स्यामे॒व
पूर्वे॑ प्र॒ति ति॑ष्ठन्ति वै॒श्वान॑रं द्वा॒दश॑क॒पालं॑ निर्व॑पेदा॒यत॑नं ग॒त्वा सँव॑थ्स॒रो
वा अ॒ग्नि वै॑श्वान॒रः सँव॑थ्स॒रः ख॒लु वै दे॒वाना॑-मा॒यत॑नमे॒तस्माद्-वा
आ॒यत॑नाद्-दे॒वा अ॑सु॒रान॑ज॒यन्. यद्-वै॑श्वान॒रं द्वा॒दश॑क॒पालं॑ निर्व॑पति
दे॒वाना॑मे॒वा ऽऽय॑तने यतते ज॒यति॑ त॒ऽ स॒ंग्राम॑मे॒तस्मिन् वा
ए॒तौ मृ॑जाते - [] 30

TS 2.2.6.2

यो वि॒द्विषा॑णयो॒रन्न॑म॒त्ति वै॒श्वान॑रं द्वा॒दश॑क॒पालं॑ निर्व॑पेद्-वि॒द्विषा॑णयो॒रन्नं
ज॒ग्ध्वा सँव॑थ्स॒रो वा अ॒ग्नि-वै॑श्वान॒रः सँव॑थ्स॒रस्व॑दि॒तमे॒वात्ति॑

नास्मिन् मृजाते सँवथ्सराय वा एतौ सममाते यौ सममाते तयोर्यः
 पूर्वो ऽभिद्रुह्यति तं वरुणो गृह्णाति वैश्वानरं द्वादशकपालं निर्वपेथ्
 सममानयोः पूर्वो ऽभिद्रुह्य सँवथ्सरो वा अग्निर्वैश्वानरः
 सँवथ्सरमेवाऽऽप्त्वा निर्वरुणं – [] 31

TS 2.2.6.3

परस्तादभि द्रुह्यति नैनं वरुणो गृह्णात्याव्यं वा एष प्रति गृह्णाति
 यो ऽविं प्रतिगृह्णाति वैश्वानरं द्वादशकपालं निर्वपेदविं प्रतिगृह्य
 सँवथ्सरो वा अग्निर्वैश्वानरः सँवथ्सरस्वदितामेव प्रति गृह्णाति
 नाऽऽव्यं प्रति गृह्णात्यात्मनो वा एष मात्रामाप्नोति य उभयादत्
 प्रतिगृह्णात्यश्वं वा पुरुषं वा वैश्वानरं द्वादशकपालं
 निर्वपेदुभयादत् – [] 32

TS 2.2.6.4

प्रतिगृह्य संवथ्सरो वा अग्निर्वैश्वानरः सँवथ्सरस्वदितमेव
 प्रति गृह्णाति नात्मनो मात्रामाप्नोति वैश्वानरं द्वादशकपालं निर्वपेथ्-
 सनिमेष्यन्थ्-सँवथ्सरो वा अग्निर्वैश्वानरो यदा खलु वै सँवथ्सरं
 जनतायां चरत्यथ स धनार्घो भवतियद्-वैश्वानरं द्वादशकपालं

निर्व॑पति॒ सँव॑त्सर॒सातामे॒व स॒निम॒भि प्र च्य॑वते॒ दान॑कामा अस्मै
प्रजा॑ भवन्ति॒ यो वै सँव॑त्सरं – [] 33

TS 2.2.6.5

प्रयु॑ज्य न विमु॑ञ्चत्यप्रति॒ष्ठानो॒ वै स भव॑त्येतमे॒व वैश्वा॑नरं पुनरा॒गत्य
निर्व॑पेद्-यमे॒व प्रयु॑ङ्क्ते तं भा॒गधे॑येन वि मु॑ञ्चति॒ प्रति॑ष्ठित्यै यया
रज्ज्वो॑त्तमां गा॒माजे॑त् तां भ्रातृ॑व्याय प्र हि॒णुया॑न्निर्ऋ॒तिमे॒वास्मै
प्र हि॑णोति ॥ 34 (मृ॒जा॒ते – निर्व॑रुणं – वँपे॑दुभया॒दद् – यो वै
सँव॑त्सरꣳ – षट्त्रिंशच्च) (A6)

TS 2.2.7.1

ऐन्द्रं॑ चरुं निर्व॑पेत् पशु॑काम ऐन्द्रा॑ वै पशव॑ इन्द्रमे॒व स्वेन॑
भा॒गधे॑येनोप धावति॒ स ए॒वास्मै॑ पशून् प्र यच्छति॒ पशु॑माने॒व भवति॑
चरु॑र्भवति॒ स्वादे॒वास्मै॑ योनेः॑ पशून् प्रज॑नयतीन्द्रायेन्द्रि॒यावते॑
पुरो॑डाशमेकादशकपालं॑ निर्व॑पेत् पशु॑काम इन्द्रि॒यं वै पशव॑
इन्द्रमे॒वेन्द्रि॒यावन्तꣳ स्वेन॑ भा॒गधे॑येनोप धावति॒ स – [] 35

TS 2.2.7.2

ए॒वास्मा॑ इन्द्रि॒यं प॒शून् प्र य॑च्छति पशु॒माने॒व भव॑तीन्द्रा॒य-घ॒र्मव॑ते
 पु॒रोडा॑शमेकादशकपालं॒ निर्व॑पेद्-ब्रह्मवर्च॒सका॑मो ब्रह्मवर्च॒सं वै
 घ॒र्म इन्द्र॑मे॒व घ॒र्मव॑न्त॒ऽस्वेन॑ भा॒गधे॑येनोप॒ धाव॑ति स ए॒वास्मिन्
 ब्रह्मवर्च॒सं द॑धाति ब्रह्मवर्च॒स्ये॒व भव॑तीन्द्रा॒यार्क॑वते
 पु॒रोडा॑शमेकादशकपालं॒ निर्व॑पेदन्नका॒मो ऽर्को॑ वै
 दे॒वाना॑मन्नमिन्द्रमे॒वार्क॑वन्त॒ऽस्वेन॑ भा॒गधे॑येनो - [] 36

TS 2.2.7.3

-प॒ धाव॑ति स ए॒वास्मा॑ अन्नं प्र य॑च्छत्यन्नाद ए॒व भव॑तीन्द्रा॒य घ॒र्मव॑ते
 पु॒रोडा॑शमेकादशकपालं॒ निर्व॑पेदिन्द्रा॒ये-न्द्रि॒याव॑त इन्द्रा॒यार्क॑वते
 भू॒तिकामो॑ यदिन्द्रा॒य घ॒र्मव॑ते निर्व॑पति शिर ए॒वास्य॑ तेन॒ करो॑ति
 यदिन्द्रा॒येन्द्रि॒याव॑त आ॒त्मान॑मे॒वास्य॑ तेन॒ करो॑ति यदिन्द्रा॒या ऽर्क॑वते भू॒त
 ए॒वान्नाद्ये॑ प्रति तिष्ठति भव॒त्ये॒वेन्द्रा॒या - [] 37

TS 2.2.7.4

-ऽ॒होमु॑चे पु॒रोडा॑शमेकादशकपालं॒ निर्व॑पेद्-यः पा॒प्मना॑ गृही॒तः
 स्यात् पा॒प्मा वा अ॒ह इन्द्र॑मे॒वा ऽ॒होमु॑च॒ऽस्वेन॑ भा॒गधे॑येनोप॒

धावति॑ स॒ ए॒वैनं॑ पा॒प्मनो॑ ऽह॒सो मुञ्च॑तीन्द्राय॒ वैमृ॑धाय
पुरो॒डाश॑मेकादशकपालं॒ निर्व॑पेद्-यं मृ॒धो ऽभि॑ प्र॒वेपे॑रन् रा॒ष्ट्राणि॑
वा ऽभि॑ स॒मि॒यु-रिन्द्र॑मेव॒ वैमृ॑ध॒ स्वेन॑ भा॒ग॒धेये॒नोप॑ धावति॒ स
ए॒वास्मा॑न्मृ॒धो - [] 38

TS 2.2.7.5

ऽप॒ ह॒न्तीन्द्राय॑ त्रा॒त्रे पुरो॒डाश॑मेकादशकपालं॒ निर्व॑पेद्-ब॒द्धो वा
परि॑यत्तो वेन्द्र॑मेव त्रा॒तार॒ स्वेन॑ भा॒ग॒धेये॒नोप॑ धावति॒ स ए॒वैनं॑ त्रायत॒
इन्द्रा॑यार्काश्चमे॒धवते॑ पुरो॒डाश॑मेकादशकपालं॒ निर्व॑पेद्-यं म॒हाय॒ज्ञो
नोप॑नमे॒देते॑ वै म॒हाय॒ज्ञस्यान्त्ये॑ त॒नू यद॑र्काश्चमे॒धाविन्द्र॑-
मे॒वा॒र्काश्चमे॒धवन्त॑ स्वेन॑ भा॒ग॒धेये॒नोप॑ धावति॒ स ए॒वास्मा॑ ()
अ॒न्ततो॑ म॒हाय॒ज्ञं च्या॑वयत्यु॒पैनं॑ म॒हाय॒ज्ञो न॑मति ॥ 39

(इन्द्रि॑याव॒न्त॒ स्वेन॑ भा॒ग॒धेये॒नोप॑ धावति॒ सो - ऽर्क॑व॒न्त॒ स्वेन॑
भा॒ग॒धेये॒नै - वेन्द्रा॑या - स्मा॒न् मृ॒धो - ऽस्मै॑ - स॒प्त च॑) (A7)

TS 2.2.8.1

इन्द्रा॑यान्वृजवे पुरो॒डाश॑मेकादशकपालं॒ निर्व॑पेद् ग्राम॑काम
इन्द्र॑मे॒वान्वृ॒जु स्वेन॑ भा॒ग॒धेये॒नोप॑ धावति॒ स ए॒वास्मै॑

स॒जा॒तानु॒कान्॑ करो॒ति ग्रा॒म्ये॒व भव॑तीन्द्रा॒ण्यै च॒रुं निर्व॑पेद्-यस्य
सेना ऽस॑श्चिते॒व स्या॑दिन्द्रा॒णी वै सेना॑यै दे॒वतेन्द्रा॒णीमे॒व स्वेन॑
भा॒ग॒धेये॒नोप॑ धाव॒ति सै॒वास्य॑ सेना॒ञ् स॒ञ् श्य॑ति ब॒ल्वजा॒नपी॒- [] 40

TS 2.2.8.2

-द्धमे॑ सं नहो॒द्-गौ॑-र्यत्राधि॑ष्कन्ना॒न्यमे॒हत् ततो॑ ब॒ल्वजा॒ उद॑तिष्ठन्
गवा॑मे॒वैनं॑ न्या॒यम॑पिनी॒य गा वे॑दयतीन्द्रा॒य मन्यु॑मते॒ मन॑स्वते
पुरो॒डाश॑मे॒काद॑शक॒पालं॑ निर्व॑पेथ् संग्रा॒मे सँय॑त्त इन्द्रि॒येण॒ वै
मन्यु॑ना॒ मन॑सा संग्रा॒मं ज॑यतीन्द्र॒मेव॑ मन्यु॒मन्तं॑ मन॑स्वन्त॒ञ् स्वेन॑
भा॒ग॒धेये॒नोप॑ धाव॒ति स ए॒वास्मि॑न्निन्द्रि॒यं मन्युं॑ मनो॑ दधाति
ज॑यति॒ तञ् - [] 41

TS 2.2.8.3

संग्रा॒ममे॒तामे॒व निर्व॑पेद्-यो ह॒तम॑नाः स्व॒यंपा॑प इ॒व स्या॑दे॒तानि॒
हि वा ए॒तस्मा॑दपक्रान्ता॒न्यथै॑ष ह॒तम॑नाः स्व॒यंपा॑प इन्द्र॒मेव॑
मन्यु॑मन्तं॑ मन॑स्वन्त॒ञ् स्वेन॑ भा॒ग॒धेये॒नोप॑ धाव॒ति स ए॒वास्मि॑न्निन्द्रि॒यं
मन्युं॑ मनो॑ दधाति॒ न ह॒तम॑नाः स्व॒यंपा॑पो भव॑तीन्द्रा॒य दा॒त्रे

पुरो॒डाश॒मेका॒दश॒कपालं॑ निर्व॒पेद्-यः॑ का॒मये॒त दान॑कामा

मे प्र॒जाः स्यु - [] 42

TS 2.2.8.4

-रि॒तीन्द्र॑मे॒व दा॒तार॑ꣳ स्वे॒न भा॒गधे॒येनो॑प॒ धाव॑ति स ए॒वास्मै॑
दान॑कामाः प्र॒जाः करो॑ति दान॑कामा अ॒स्मै प्र॒जा भव॑न्तीन्द्रा॒य प्रदा॑त्रे
पुरो॒डाश॒मेका॒दश॒कपालं॑ निर्व॒पेद्-यस्मै॑ प्र॒त्तमि॒व सन्न॑ प्रदी॒येतेन्द्र॑मे॒व
प्रदा॑तार॑ꣳ स्वे॒न भा॒गधे॒येनो॑प॒ धाव॑ति स ए॒वास्मै॑ प्र दा॒पय॑तीन्द्रा॒य
सु॒त्राम्णो॑ पुरो॒डाश॒मेका॒दश॒कपालं॑ निर्व॒पेदप॑रुद्धो वा - [] 43

TS 2.2.8.5

ऽप॒रुद्ध्य॑मानो वेन्द्र॑मे॒व सु॒त्रामा॑णꣳ स्वे॒न भा॒गधे॒येनो॑प॒ धाव॑ति
स ए॒वैनं॑ त्राय॑ते ऽन॒प॒रुद्ध्यो॑ भव॑तीन्द्रो॒ वै स॒दृङ् दे॒वता॑भिरासी॒त्
स न व्या॒वृ॒तम॑गच्छ॒त् स प्र॒जाप॑तिमु॒पाधा॑वत् तस्मा
ए॒तमै॒न्द्रमे॒का॒दश॒कपालं॑ नि॒रव॑पत् तेनै॒-वास्मि॑न्निन्द्रि॒यम॑दधा-
च्छक्व॑री याज्यानुवा॒क्ये अ॒करो॑द्-वज्रो॒ वै शक्व॑री स ए॒नं
ँवज्रो॑ भू॒त्या ऐ॒न्ध - [] 44

TS 2.2.8.6

सो ऽभव॑त् सो ऽबि॑भेद्-भू॒तः प्र॑ मा॒ धक्ष॑यतीति॒ स प्र॒जाप॑तिं
 पुन॑-रुपा॒धाव॑त् स प्र॒जाप॑तिः शक्व॑र्या॒ अधि॑रेवतीं॒ निर॑मिमीत॒ शान्त्या॑
 अप्र॑दाहाय॒ यो ऽल॑ श्रियै॒ सन्थ॑-सदृ॒ङ्ख् समानैः॒ स्यात् तस्मा॑
 ए॒तमै॒न्द्रमे॒काद॑शकपालं॒ निर्व॑पेदिन्द्रमे॒व स्वेन॑ भा॒गधे॑येनोप॒ धाव॑ति
 स ए॒वास्मि॑न्निन्द्रि॒यं द॑धाति॒ रेवती॑ पु॒रोनु॑वाक्या॒ भव॑ति ()
 शान्त्या॑ अप्र॑दाहाय॒ शक्व॑री या॒ज्या वज्रो॑ वै शक्व॑रीस॒ एनं॑
 वज्रो॑ भू॒त्या इ॒न्धे भव॑त्येव ॥ 45

(अपि - त७ - स्यु - वै - न्ध - भवति - चतुर्दश च) (A8)

TS 2.2.9.1

आ॒ग्ना-वै॒ष्णव॑-मे॒काद॑शकपालं॒ निर्व॑पेदभि॒चर॑न्थ-सर॒स्वत्या॑ज्यभा॒गा
 स्याद्-बा॒र्हस्प॑त्य-श्च॒रुर्य॑दा॒ग्नावै॒ष्णव॑ ए॒काद॑शकपालो॒ भव॑त्यग्निः
 सर्वा॑ दे॒वता॒ विष्णु॑र्य॒ज्ञो दे॒वता॑भिश्चै॒वैनं॑ य॒ज्ञेन॑ चा॒भि
 चर॑तिसर॒स्वत्या॑ज्यभा॒गा भव॑ति॒ वाग्-वै॑ सर॒स्वती॑ वा॒चैवैन॑मभि॒ चर॑ति
 बा॒र्हस्प॑त्यश्च॒रु भ॑वति॒ ब्रह्म॑ वै दे॒वानां॑ बृ॒हस्प॑ति॒ ब्रह्म॑णै॒वैन॑मभि
 चर॑ति - [] 46

TS 2.2.9.2

प्रति॑ वै पर॒स्तादभि॑चरन्तमभि॑ चरन्ति॒ द्वेद्वे॑ पुरो॒नुवा॒क्ये कुर्या॑दति॒
 प्रयु॑क्त्या ए॒तयै॒व यजे॑ताभिचर्यमाणो दे॒वता॑भिरे॒व दे॒वताः॑ प्रति॒चरति॑
 यज्ञे॑न य॒ज्ञं वा॒चा वाचं॑ ब्रह्म॒णा ब्रह्म॑ स दे॒वता॑श्चै॒व य॒ज्ञं च॑ मद्ध्यतो
 व्यव॑सर्पति॒ तस्य॑ न कुतश्च॒नोपा॑व्या॒धो भवति॑ नैनमभिचरन्-थस्तृणुत
 आ॒ग्नावै॒ष्णव-मेका॑दशकपालं॒ निर्व॑पेद्-यं य॒ज्ञो नो - [] 47

TS 2.2.9.3

-प॒नमे॑द॒ग्निः सर्वा॑ दे॒वता॑ विष्णु॑र्य॒ज्ञो ऽग्निं॑ चै॒व विष्णुं॑ च॒ स्वेन॑
 भा॒गधे॑येनोप॒ धावति॑ तावे॒वास्मै॑ य॒ज्ञं प्र॑ यच्छत॒ उपै॑नं य॒ज्ञो
 नम॑त्याग्नावैष्णवं॒ घृते॑ च॒रुं निर्व॑पेच्चक्षुष्कामो॒ ऽग्नेर्वै॑ चक्षु॒षा मनु॑ष्या
 वि प॑श्यन्ति य॒ज्ञस्य॑ दे॒वा अ॒ग्निं चै॒व विष्णुं॑ च॒ स्वेन॑ भा॒गधे॑येनोप॒
 धावति॑ तावे॒वा - [] 48

TS 2.2.9.4

-ऽस्मिन् चक्षु॑र्द्धत्तश्चक्षुष्माने॒व भवति॑ धे॒न्वै वा ए॒तद्-रेतो॑
 यदा॑ज्य-म॒न॒डुह-स्तण्डु॒ला मिथु॑नादे॒वास्मै॑ चक्षुः॒ प्र ज॑नयति
 घृ॒ते भवति॑ ते॒जो वै घृ॒तं तेज॑श्चक्षु-स्तेज॑सै॒वास्मै॑ तेज॑श्चक्षु॒रव॑

रुन्ध इन्द्रियं वै वीर्यं वृद्धे भ्रातृव्यो यजमानो ऽयजमानस्याध्वरकल्पां
प्रति निर्वपेद्-भ्रातृव्ये यजमाने नास्येन्द्रियं - [] 49

TS 2.2.9.5

वीर्यं वृद्धे पुरावाचः प्रवदितो-निर्वपेद्वावत्येव वाक् तामप्रोदितां
भ्रातृव्यस्य वृद्धे तामस्य वाचं प्रवदन्तीमन्या वाचो ऽनु प्रवदन्ति ता
इन्द्रियं वीर्यं यजमाने दधत्याग्नावैष्णव-मष्टाकपालं निर्वपेत्
प्रातस्सवनस्याऽऽकाले सरस्वत्याज्यभागा स्याद् बार्.हस्पत्यश्चरु-
र्यदष्टाकपालो भवत्यष्टाक्षरा गायत्री गायत्रं प्रातस्सवनं
प्रातस्सवनमेव तेनाप्नो - [] 50

TS 2.2.9.6

-त्याग्नावैष्णव-मेकादशकपालं निर्वपेन्माद्ध्यन्दिनस्य
सवनस्याऽऽकाले सरस्वत्याज्यभागा स्याद् बार्.हस्पत्य-श्चरु
र्यदेकादशकपालो भवत्येकादशाक्षरा त्रिष्टुप् त्रैष्टुभं माद्ध्यन्दिनं
सवनं माद्ध्यन्दिनमेव सवनं तेनाऽऽप्नोत्याग्नावैष्णवं द्वादशकपालं
निर्वपेत् तृतीयसवनस्याऽऽकाले सरस्वत्याज्यभागा स्याद्

बार्॒हस्प॒त्यश्च॒र्यद् द्वा॒दश॒कपा॒लो भ॒वति॒ द्वा॒दश॒क्षरा॒ जग॒ती जा॒गतं
तृ॒तीय॒सव॒नं तृ॒तीय॒सव॒नमे॒व तेना॑ ऽऽप्नोति॑ दे॒वता॑भि॒रेव॑ दे॒वताः॑- [] 51

TS 2.2.9.7

प्र॒तिच॒रति॑ य॒ज्ञेन॑ य॒ज्ञं वा॒चा वाचं॑ ब्र॒ह्मणा॒ ब्रह्म॑ क॒पालै॒रेव॑
छन्दा॑ ऽस्याप्नोति॑ पु॒रोडा॒शैः स॒वनानि॑ मै॒त्रावरु॑णमे॒कक॒पालं निर्व॑पेद्-
व॒शायै॑ का॒ले यै॒वासौ भ्रा॑तृ॒व्यस्य॑ व॒शा ऽनू॒बन्ध्या॑ सो

ए॒वैषै॑तस्यै॒कक॒पालो भ॒वति॒ न हि॒ क॒पालैः॑ प॒शु-म॒र्हत्या॑प्तुं ॥ 52

(ब्र॒ह्मणै॑वैन॒मभि॑ च॒रति॑ - य॒ज्ञो न - ता॒वेवा - स्येन्द्रि॑य - मा॒प्नोति॑
- दे॒वताः॑ - स॒प्तत्रिं॑शच्च) (A9)

TS 2.2.10.1

अ॒सावादि॒त्यो न व्य॑रोच॒त तस्मै॑ दे॒वाः प्राय॑श्चि॒त्तिमै॑च्छन् तस्मा॑ ए॒त
सो॒मारौ॒द्रं च॒रुं नि॒रव॑पन् तेनै॒वास्मिन्॑ रुच॒मद॑धुर्यो ब्र॒ह्मव॑र्च॒सका॑मः
स्यात् तस्मा॑ ए॒त सो॒मारौ॒द्रं च॒रुं निर्व॑पेथ् सोमं॑ चै॒व रु॒द्रं च॒ स्वेन॑
भा॒गधे॒येनो॑प धा॒वति॒ तावे॒वास्मिन्॑ ब्र॒ह्मव॑र्च॒सं ध॑त्तो ब्र॒ह्मव॑र्च॒स्येव॑
भ॒वति॑ ति॒ष्यापू॑र्णमा॒से निर्व॑पेद्-रु॒द्रो - [] 53

TS 2.2.10.2

वै ति॒ष्यः सोमः॑ पूर्ण॑मासः सा॒क्षादे॒व ब्र॒ह्मव॑र्चसमव॑ रुन्धे परि॑श्रिते
याज॑यति ब्र॒ह्मव॑र्चसस्य॒ परि॑गृहीत्यै श्वे॒तायै॑ श्वेत॑वत्स्यायै दुग्धं
मथि॑तमाज्यं भव॑त्याज्यं प्रोक्ष॑णमाज्येन॒ मार्ज॑यन्ते याव॑दे॒व ब्र॒ह्मव॑र्चसं
तथ् सर्वं॑ करो॒त्यति॑ ब्र॒ह्मव॑र्चसं क्रि॒यत॒ इत्या॑हुरीश्व॒रो दु॒श्चर्मा॑
भवि॑तोरिति॒ मान॑वी ऋचौ॑ धा॒य्ये कुर्या॑द्-यद्-वै किम् च
मनु॑रवदत्-तद्-भेष॑जं - [] 54

TS 2.2.10.3

भेष॑जमेवा॒स्मै करो॑ति यदि बिभी॒याद्-दु॒श्चर्मा॑ भवि॒ष्यामी॑ति
सोमा॑पौष्णं चरुं॑ निर्वपे॒त् सौ॒म्यो वै दे॒वत॑या पु॒रुषः॑ पौष्णाः प॒शवः॑
स्वयै॒वास्मै॑ दे॒वत॑या प॒शुभि॒स्त्वचं॑ करो॒ति न दु॒श्चर्मा॑ भवति सोमा॑रौद्रं
चरुं॑ निर्वपे॒त् प्र॒जाका॑मः सोमो॑ वै रे॒तोधा॑ अ॒ग्निः प्र॒जानां॑ प्र॒जन॑यिता
सोम॑ ए॒वास्मै॑ रे॒तो द॑धात्य॒ग्निः प्र॒जां प्र॑ जनयति वि॒न्दते॑ - [] 55

TS 2.2.10.4

प्र॒जाꣳ सोमा॑रौद्रं चरुं॑ निर्वपे॒दभि॒चरन्-॑त्सौ॒म्यो वै दे॒वत॑या पु॒रुष ए॒ष
रु॒द्रो यद॑ग्निः स्वा॒या ए॒वैनं॑ दे॒वता॑यै निष्क्री॒य रु॒द्राया॑पि दधाति

ता॒जगा॒र्तिमा॒र्च्छति॑ सो॒मारौ॒द्रं च॒रुं निर्व॑पे-ज्ज्यो॒गाम॑यावी सोमं वा
ए॒तस्य॑ र॒सो ग॑च्छत्य॒ग्निं शरी॑रं य॒स्य ज्यो॒गाम॑यति सोमा॒देवा॑स्य
र॒सं निष्क्री॑णात्य॒ग्नेः शरी॑रमु॒त यदी॑ - [] 56

TS 2.2.10.5

-तासु॑ भवति॑ जी॒वत्ये॒व सो॒मारु॒द्रयो॒र्वा ए॒तं ग्र॑सितं होता
निष् खि॑दति स ई॒श्वर॑ आ॒र्ति-मा॒र्तो-र॒नड्वा॑न् हो॒त्रा दे॒यो वह्नि॑र्वा
अ॒नड्वा॑न् वह्नि॒र् होता॑ वह्नि॒नैव॑ वह्नि॒मात्मा॑न् स्पृ॒णोति॑ सो॒मारौ॒द्रं
च॒रुं निर्व॑पेद्-यः का॒मये॑त॒ स्वे ऽस्मा॑ आ॒यत॑ने भ्रातृ॒व्यं ज॑नये॒यमि॒ति
वेदिं॑ परि॒गृह्या॒र्द्धमु॒द्धन्या॑द॒र्द्धं ना॒र्द्धं ब॒र्हिषः॑ स्तृ॒णीया॑द॒र्द्धं ()
ना॒र्द्ध-मि॒द्धम॑स्या॒भ्याद॑द्ध्य॒ाद॒र्द्धं न स्व॑ ए॒वास्मा॑ आ॒यत॑ने भ्रातृ॒व्यं
ज॑नयति ॥ 57 (रु॒द्रो - भ॑ष॒जं - वि॒न्दते॑- यदि॑ -

स्तृ॒णीया॑द॒र्द्धं - द्वा॒दश॑ च) (A10)

TS 2.2.11.1

ऐ॒न्द्रमे॒काद॑शक॒पालं॑ निर्व॑पेन्मा॒रुतं॑ स॒प्तक॑पालं॒ ग्राम॑काम॒ इन्द्रं॑ चै॒व
म॒रुत॑श्च॒ स्वेन॑ भा॒गधे॑ये॒नोप॑ धावति॒ त ए॒वास्मै॑ स॒जा॒तान् प्र॑ यच्छन्ति
ग्रा॒म्ये॒व भ॑वत्याह॒वनी॑य ऐ॒न्द्रम॑धि श्रयति॒ गार्ह॑पत्ये॒ मारु॑तं

पा॒पव॒स्यस॒स्य वि॒धृत्यै स॒प्तक॒पालो मा॒रुतो भ॒वति स॒प्तग॒णा वै
म॒रुतो॑गण॒श ए॒वास्मै स॒जा॒तान॒व रुन्धे ऽनू॒च्यमा॒न आ सा॒दयति॑
वि॒शमे॒वा – [] 58

TS 2.2.11.2

–स्मा॒ अनु॒व॒र्त्मानं॑ करोत्ये॒तामे॒व निर्व॑पेद्–यः का॒मये॑त क्ष॒त्राय॑ च
वि॒शे च स॒मदं॑ द॒द्ध्यामि॒त्यैन्द्र॒स्या–व॒द्यन् ब्रू॒यादिन्द्रा॒यानु॑
ब्रू॒हीत्या॒श्राव्य॑ ब्रू॒यान्–म॒रुतो॑ य॒जेति॑ मा॒रुत॒स्याव॒द्यन् ब्रू॒यान्म॒रुद्भ्यो॑
ऽनु ब्रू॒हीत्या॒श्राव्य॑ ब्रू॒यादिन्द्रं॑ य॒जेति॑ स्व ए॒वैभ्यो॑ भा॒गधे॑ये स॒मदं॑
द॒धाति॑ वि॒तृ॒हाणा॑ स्तिष्ठन्त्ये॒तामे॒व – [] 59

TS 2.2.11.3

निर्व॑पेद्–यः का॒मये॑त क॒ल्पे॒रन्नि॑ति यथादे॒वत॑म॒वदा॑य यथादे॒वतं॑
य॒जेद्–भा॒गधे॑ये॒नैवैनान्॑ यथाय॒थं क॒ल्पय॑ति क॒ल्पन्त॑ ए॒वैन्द्र–
मेका॑द॒शक॒पालं॑ निर्व॑पेद्–वैश्वदे॒वं द्वाद॑शक॒पालं॑ ग्रा॒मका॑म इन्द्रं॑ चै॒व
विश्वा॑श्च दे॒वान्थ्–स्वे॒न भा॒गधे॑ये॒नोप॑ धावति॒ त ए॒वास्मै स॒जा॒तान्
प्र य॑च्छन्ति ग्रा॒म्ये॒व भ॒वत्यैन्द्र॒स्याव॒दाय॑ वैश्वदे॒वस्या॒व
द्वे॒दथैन्द्र॒स्यो– [] 60

TS 2.2.11.4

–परि॑ष्टादिन्द्रि॒येणै॒वास्मा॑ उ॒भयतः॑ स॒जा॒तान् परि॑ गृ॒ह्णात्युपा॑धा॒य्यपूर्व॑यं
 वा॒सो दक्षि॑णा स॒जा॒तानामु॑प॒हृत्यै॑ पृ॒श्नि॒ज्यै दुग्धे॑ प्रैयङ्ग॒वं च॒रुं
 निर्व॑पेन्मरुद्भ्यो॒ ग्राम॑कामः पृ॒श्नि॒ज्यै वै पय॑सो मरुतो॑ जा॒ताः पृ॒श्नि॒ज्यै
 प्रि॒यङ्ग॒वो मा॒रुताः॑ खलु॒ वै दे॒वत॑या स॒जा॒ता म॒रुत ए॒व स्वेन॑
 भा॒गधे॒येनो॑प॒ धाव॑ति त ए॒वास्मै॑ स॒जा॒तान् प्र य॑च्छन्ति ग्रा॒म्येव॑ भवति
 प्रि॒यव॑ती या॒ज्यानु॑वाक्ये – [] 61

TS 2.2.11.5

भवतः॑ प्रि॒यमे॒वैन॑ꣳ स॒मा॒नानां॑ करोति द्वि॒पदा॑ पु॒रोनु॑वाक्या भवति
 द्वि॒पद ए॒वाव रु॑न्धे चतु॒ष्पदा॑ या॒ज्या चतु॒ष्पद ए॒व प॒शून॑व रुन्धे
 दे॒वासु॒राः सँय॑त्ता आ॒सन् ते दे॒वा मि॒थो वि॒प्रिया॑ आ॒सन्
 ते (ए॒१) ऽन्यो॑ ऽन्यस्मै॒ ज्यैष्ठ्या॑यातिष्ठ॒माना–श्चतु॑र्द्धा
 व्य॑क्रामन्न॒ग्निर्व॑सुभिः सोमो॑ रु॒द्रैरिन्द्रो॑ म॒रुद्भि॒र्वरु॑ण आ॒दित्यैः
 स इन्द्रः॑ प्र॒जाप॑तिमुपा॒धाव॑त् त – [] 62

TS 2.2.11.6

–मे॒तया॑ सं॒ज्ञान्या॑ ऽया॒जये॑द॒ग्नये॑ वसु॒मते॑ पु॒रोडा॑शम॒ष्टाक॑पालं
 नि॒रव॑प॒थ् सोमा॑य रु॒द्रव॑ते च॒रुमि॑न्द्राय म॒रुत्व॑ते पु॒रोडा॑श–
 मे॒काद॑शकपालं ँ॒रुणा॑याऽऽदि॒त्यव॑ते च॒रुं ततो॑ वा इन्द्रं दे॒वा
 ज्यैष्ठ्या॑या॒भि सम॑जानत यः स॒मानै॑र्मि॒थो वि॑प्रि॒यः स्या॑त् तमे॒तया॑
 सं॒ज्ञान्या॑ या॒जये॑द॒ग्नये॑ वसु॒मते॑ पु॒रोडा॑शम॒ष्टाक॑पालं नि॒र्वपे॑थ् सोमा॑य
 रु॒द्रव॑ते च॒रुमि॑न्द्राय म॒रुत्व॑ते पु॒रोडा॑शमे॒काद॑शकपालं ँ॒रुणा॑याऽऽ–
 ()–दि॒त्यव॑ते च॒रुमि॑न्द्रमे॒वैनं॑ भू॒तं ज्यैष्ठ्या॑य स॒माना॑ अ॒भि सं जा॑नते
 वसि॑ष्ठः स॒माना॑नां भवति ॥ 63

(वि॒शमे॑व – ति॒ष्ठन्त्ये॑ता॒मे – वा॒थैन्द्र॑स्य – या॒ज्यानु॑वा॒क्ये – तं –
 ँ॒रुणा॑य – च॒तुर्द॑श च) (A11)

TS 2.2.12.1

हि॒र॒ण्यग॑र्भ >[१], आ॒पो ह॒ यत् >[२], प्र॒जाप॑ते >[३] ॥
 स वे॒द पु॒त्रः पि॒तर॑ꣳ स मा॒तर॑ꣳ स सू॒नुर्भु॑व॒थ् स भु॑व॒त् पुन॑र्म॒घः ।
 स द्या॒मौर्णा॑द॒न्तरि॑क्षꣳ स सु॒वः स वि॒श्वा भु॑वो अ॒भव॑थ् स
 आ ऽभ॑वत् ॥

उदु॒ त्यं > 4, चि॒त्रं > 5 ॥

स॒ प्र॒ल॒वन् न॒वी॒य॒सा ऽग्ने॑ द्यु॒म्ने॑न स॒य॒ता ॥ बृ॒हत् त॑त॒न्थ भा॒नुना॑ ॥
नि का॒व्या वे॒धसः॑ श॒श्वत॑-स्कर्ह॒स्ते द॒धानो॑ – [] 64

TS 2.2.12.2

न॒र्या पु॒रू॒णि ।

अ॒ग्नि॒र्भु॒वद्-र॒यि॒पती॑ र॒यी॒णां स॒त्रा च॑क्रा॒णो अ॒मृ॒ता॒नि वि॒श्वा ॥
हि॒र॒ण्य॒पा॒णि॒मू॒तये॑ स॒वि॒ता॒र॒मुप॑ ह्वये ।

स चे॒त्ता दे॒वता॑ प॒दं ॥

वा॒म॒म॒द्य स॑वि॒त॒र्वा॒ममु॑ श्रो दि॒वेदि॑वे वा॒म॒म॒स्मभ्य॑ सा॒वीः ।
वा॒म॒स्य॒ हि क्ष॑य॒स्य दे॒व भू॑रे-र॒या धि॒या वा॑म॒भाजः॑ स्याम ॥
ब॒डि॒त्था प॑र्व॒तानां॑ खि॒द्रं बि॑भर्षि पृथि॒वि ।

प्र या भू॒मि प्र॑व॒त्वति॑ म॒ह्ना जि॒नोषि॑ – [] 65

TS 2.2.12.3

महि॒नि ॥

स्तो॒मा॒स॒स्त्वा वि॑चा॒रि॒णि प्र॑ति॒ षो॑भ॒न्त्यकु॒भिः ।
प्र या वा॒जं न हे॑ष॒न्तं पे॒रु॒म॒स्य॑स्य॒र्जुनि॑ ॥

ऋदू॑दरेण॑ स॒ख्या स॒चेय॑ यो मा॒ न रि॒ष्ये॑र्द्ध्यश्च॑ पी॒तः ।
 अ॒यं यः॑ सोमो॒ न्यधा॑य्यस्मे तस्मा॒ इन्द्रं॑ प्र॒तिरमे॑म्यच्छ ॥
 आपा॑न्तमन्यु-स्तृ॒पलप्र॑भर्मा॒ धुनिः॑ शिमी॒वाञ्छ॑रुमाँ ऋ॒जीषी॑ ।
 सोमो॒ विश्वा॑न्यत॒सा वना॑नि॒ नार्वा॑गिन्द्रं॑ प्र॒तिमा॑नानि दे॒भुः ॥

प्र - [] 66

TS 2.2.12.4

सु॒वा॒नः सोम॑ ऋत॒युश्चि॑के॒तेन्द्रा॑य॒ ब्रह्म॑ ज॒मद॑ग्निर॒र्चन् ।
 वृषा॑ य॒न्ता ऽसि॑ श॒वस॑स्तु॒रस्या॒न्तर्-य॑च्छ गृण॒ते ध॒र्त्रं दृ॑ह ॥
 स॒बाध॑स्ते॒ मदं॑ च शु॒ष्मयं॑ च॒ ब्रह्म॑ नरो॒ ब्रह्म॑कृतः स॒पर्य॑न् ।
 अ॒र्को वा॒ यत् तु॒रते॑ सोम॑चक्षा॒स्तत्रे॑दिन्द्रो॒ दध॑ते पृ॒थ्सु तु॒र्या ॥
 वषट् ते॑ वि॒ष्णवा॑स आ कृ॒णोमि॑ तन्मे॒ जुष॑स्व शि॒पिवि॑ष्ट ह॒व्यं । 67

TS 2.2.12.5

व॒र्द्धन्तु॑ त्वा सु॒ष्टुतयो॑ गि॒रो मे॑ यू॒यं पा॑त स्व॒स्तिभिः॑ स॒दा नः॑ ॥
 प्र तत् ते॑ अ॒द्य शि॒पिवि॑ष्ट॒ नामा॑र्यः श॒सामि॑ व॒युना॑नि वि॒द्वान् ।
 तम् त्वा॑ गृ॒णामि॑ त॒वस॑म॒तवी॑यान् क्ष॒यन्त॑मस्य रज॒सः प॑रा॒के ॥

कि॒मित् ते॑ वि॒ष्णो परि॒चक्ष्यं॑ भू॒त् प्र यद्-वव॒क्षे शि॒पिवि॒ष्टो अ॒स्मि ।

मा वर्पो॑ अ॒स्मदप॑ गू॒ह ए॒तद्-यद॒न्यरूपः॑ समि॒थे ब॒भूथ॑ ॥ 68

TS 2.2.12.6

अ॒ग्ने दा॑ दा॒शुषे॑ र॒यिं वी॒रव॒न्तं प॑री॒णसं॑ ।

शि॒शीहि॑ नः॒ सूनु॑मतः ॥

दा नो॑ अ॒ग्ने श॒तिनो॑ दाः स॒हस्रि॑णो दुरो न वाज॑ श्रु॒त्या अपा॑ वृ॒धि ।

प्रा॒ची द्या॑वापृ॒थिवी॑ ब्र॒ह्मणा॑ कृ॒धि सु॒वर्णं॑ शु॒क्रमु॒षसो॑ वि दि॒द्युतुः॑ ॥

अ॒ग्निर्दा॑ द्रवि॒णं वी॒रपे॑शा अ॒ग्निर् ऋ॒षिं यः॑ स॒हस्रा॑ स॒नोति॑ ।

अ॒ग्निर्दिवि॑ ह॒व्यमा॑ त॒ताना॑ग्ने र्धा॒मानि॑ वि॒भृता॑ पु॒रुत्रा॑ ॥

मा - [] 69

TS 2.2.12.7

नो म॒र्धी > [6], रा तू॑ भ॒र > [7] ॥

घृ॒तं न पू॒तं त॒नूर॑रे॒पाः शु॒चि हि॒रण्यं॑ ।

तत् ते॑ रु॒क्मो न रो॑चत स्व॒धावः॑ ॥

उ॒भे सु॑श्चन्द्र॒ सर्पि॑षो द॒र्वी श्री॑णीष आ॒सनि॑ ।

उ॒तो न॒ उत् पु॑पू॒र्या उ॒क्थे॑षु श॒वस॑स्पत॒ इष॑ स्तो॒तृभ्य॑ आ भ॒र ॥

वा॒यो श॒त॒ꣳ ह॒री॒णां यु॒वस्व॑ पो॒ष्या॒णां ।

उ॒त वा॑ ते स॒ह॒स्रि॒णो रथ॑ आ या॒तु पा॒जसा॑ ॥

प्र या॒भिर् - [] 70

TS 2.2.12.8

या॒सि दा॒श्वाꣳस॒म॒च्छा॑ नि॒यु॒द्धि-वा॒यवि॒ष्टये॑ दुरो॒णे ।

नि नो॑ र॒यिꣳ सु॒भोज॑सं यु॒वेह॑ नि वी॒रव॑द्-ग॒व्यम॒श्रियं॑ च रा॒धः ॥

रे॒वती॑र्नः स॒ध॒माद॑ इ॒न्द्रे स॒न्तु तु॒विवा॑जाः ।

क्षु॒मन्तो॑ या॒भिर्म॑देम ॥

रे॒वाꣳ इ॒द्-रे॒वतः॑ स्तो॒ता स्या॑त् त्वा॒वतो॑ म॒घो॒नः ।

प्रे॒दु ह॒रिवः॑ श्रु॒तस्य॑ ॥ 71

(द॒धा॒नो - जि॒नोषि॑ - दे॒भुः प्र - ह॒व्यं - ब॒भूथ॑ - मा - या॒भि -

श्च॒त्वा॒रिꣳश॑च्च) (A12)

=====

Prasna Korvai with starting Padams of 1 to 12 Anuvaakams :-

(प्र॒जाप॑ति॒स्ताः सृ॒ष्टा - अ॒ग्नये॑ पथि॒कृते॑ - ग्नये॑ का॒माया॑ - ग्नये॑न्न॒वते॑
- वैश्वा॑नर - मा॒दित्यं॑ च॒रु - मै॒न्द्रं च॒रु - मि॒न्द्राया॑न्वृ॒जव॑ -
आ॒ग्नावै॑ष्ण॒व - म॒सौ सो॑मा॒रौद्र॑ - मै॒न्द्रमे॑का॒दश॑क॒पाल॑ - हि॒रण्य॑ग॒र्भो
- द्वा॒दश॑)

Korvai with starting Padams of 1, 11, 21 Series of Panchaatis :-

(प्र॒जाप॑ति - ग्नये॑ का॒माया॑ - भि॒ सं भ॑वतो - यो वि॒द्विषा॑णयो
- रि॒ध्मे स॑न्न ह्ये - दा॒ग्नावै॑ष्ण॒वमु॑ - परि॒ष्टा - द्या॒सि दा॒श्वा॑स् -
मे॒कस॑प्ततिः)

First and Last Padam of Second Prasnam of Kandam 2 :-

(प्र॒जाप॑तिः - प्रे॒दु ह॑रि॒वः श्रु॒तस्य॑)

॥ हरिः ओं ॥

॥ कृष्ण यजुर्वेदीय तैत्तिरीय संहितायां द्वितीयकाण्डे द्वितीयः प्रश्नः समाप्तः ॥

=====

2.2.1 Appendix

2.2.12.1 – हिरण्यगर्भ >¹,

हिरण्यगर्भः समवर्तताग्रे भूतस्य जातः पतिरेक आसीत् ।
स दाधार पृथिवीं द्यामुतेमां कस्मै देवाय हविषा विदेम ॥

(Appearing in TS 4-1-8-3)

2.2.12.1 – आपो ह यत् >²,

आपो ह यन् महती विश्वमायन् दक्षं दधाना जनयन्तीरग्निं ।
ततो देवानां निरवर्ततासुरेकः कस्मै देवाय हविषा विधेम ॥

(Appearing in TS 4-1-8-3)

2.2.12.1 – प्रजापते >³

प्रजापते न त्वदेतान्यन्यो विश्वा जातानि परि ता बभूव ।
यत्कामास्ते जुहुमस्तन्नो अस्तु वयं स्याम पतयो रयीणां ॥

(Appearing in TS 1-8-14-2)

2.2.12.1 – उ॒दु॒त्यं>⁴

उ॒दु॒ त्यं जा॒तवे॑दसं दे॒वं व॑हन्ति के॒तवः॑ ।

दृ॒शे वि॒श्वाय॑ सूर्यं ॥ (Appearing in TS 1-4-43-1)

2.2.12.1 – चि॒त्रं>⁵

चि॒त्रं दे॒वाना॑-मु॒दगा॑दनी॒कं चक्षु॑ मि॒त्रस्य॑ वरु॒णस्या॑ ऽग्नेः ।

आ ऽप्रा॑ द्यावापृ॒थिवी॑ अ॒न्तरि॑क्षं सूर्य॑ आ॒त्मा जग॑तस्त॒स्थुष॑श्च ॥

(Appearing in TS 1-4-43-1)

2.2.12.7 – नो॑ म॒र्धी>⁶

मा नो॑ म॒र्धीरा॑ भ॒रा द॒द्धि तन्नः॑ प्र दा॒शुषे॑ दा॒तवे॑ भूरि॒ यत् ते॑ ॥

नव्ये॑ दे॒ष्णे श॒स्ते अ॒स्मिन् त॑ उ॒क्थे॑ प्र ब्र॒वाम॑ व॒यमिन्द्र॑ स्तु॒वन्तः॑ ॥

(Appearing in TS 1-7-13-3)

2.2.12.7 – रा तू भर>⁷

आ तू भर॑ माकि॑रेतत् परि॑ष्ठाद्वि॒द्मा हि त्वा वसु॑पतिं वसू॑नां ।
इन्द्र॑ यत् ते माहि॑नं द॒त्रमस्त्य॑स्मभ्यं तद्ध॑र्यश्च प्रय॑न्धि ॥

(Appearing in TS 1-7-13-3)

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

2.3 द्वितीयकाण्डे तृतीयः प्रश्नः – इष्टिविधानं

TS 2.3.1.1

आ॒दि॒त्ये॒भ्यो॒ भुव॑द्वद्भ्यश्च॒रुं॑ निर्व॑पेद्भू॒ति॒काम॑ आ॒दि॒त्या वा ए॒तं भू॒त्यै॒
प्र॒ति नुद॑न्ते॒ यो ऽलं॑ भू॒त्यै सन्॑ भू॒तिं न प्रा॒प्नो॒त्यादि॒त्याने॒व भुव॑द्वतः॒
स्वेन॑ भा॒ग॒धे॒येनो॒प धा॒वति॑ त ए॒वैनं॑ भू॒तिं ग॒मय॑न्ति
भव॑त्ये॒वा ऽ॒दि॒त्ये॒भ्यो धा॒रय॑द्वद्भ्यश्च॒रुं निर्व॑पेद॒परु॑द्धो वा
ऽप॒रु॒द्ध्य॑मा॒नो वा ऽ॒दि॒त्या वा अ॒परो॒द्धार॑ आ॒दि॒त्या अ॒वग॑मयि॒तार॑
आ॒दि॒त्याने॒व धा॒रय॑द्वतः – [] 1

TS 2.3.1.2

स्वेन॑ भा॒ग॒धे॒येनो॒प धा॒वति॑ त ए॒वैनं॑ वि॒शि दा॑द्ध॒त्यन॑प॒रु॒द्ध्यो
भव॑त्यदि॒ते ऽनु॑ म॒न्यस्वे॑त्य॒प॒रु॒द्ध्य॑मा॒नो ऽस्य॑ प॒द॒मा द॑दी॒तेयं॑ वा
अ॒दि॒तिरि॒यमे॒वास्मै॑ रा॒ज्य॑म॒नु म॒न्यते॑ स॒त्या ऽ॒शीरि॒त्याह॑
स॒त्यामे॒वाऽ॒शिषं॑ कुरु॒त इ॒ह म॒न इ॒त्याह॑ प्र॒जा ए॒वास्मै॑ स॒मन॑सः
करो॑त्यु॒प प्रे॑त मरु॒तः – [] 2

TS 2.3.1.3

सु॒दान॒व ए॒ना वि॒श॒पति॑ना ऽभ्य॑मु॒ राजा॑न॒मित्या॑ह मा॒रु॒ती वै वि॒ङ् ज्ये॒ष्ठो
वि॒श॒पति॑र्वि॒शैवै॑न॒ राष्ट्रे॑ण॒ सम॑र्द्धयति॒ यः प॒रस्ता॑द् ग्रा॒म्यवा॑दी स्यात्
तस्य॑ गृ॒हाद्-व्री॒हीनाऽऽ ह॑रेच्छु॒क्लाञ्च॑ कृ॒ष्णाञ्च॑ वि चि॒नुया॑द्-ये
शु॒क्लाः स्यु॑-स्त-मा॒दित्यं॑ च॒रुं निर्व॑पेदादित्या वै दे॒वत॑या
वि॒ङ् वि॒शमे॑वाव गच्छ - [] 3

TS 2.3.1.4

-त्यव॑गता ऽस्य॒ वि॒डन॑वगत॒ राष्ट्र॑मित्याहु॒र्ये कृ॒ष्णाः स्यु॑स्तं वा॒रुणं॑
च॒रुं निर्व॑पेद्वा॒रुणं॑ वै रा॒ष्ट्रमु॒भे ए॒व वि॒शं च॑ रा॒ष्ट्रं चा॑व गच्छति॒ यदि
ना॒वग॑च्छे-दि॒म-म॒ह-मा॒दित्ये॑भ्यो भा॒गं निर्व॑पाम्याऽऽ *मु॒ष्माद॑मुष्यै
वि॒शो ऽव॑गन्तो॒रिति॑ निर्व॑पेदादित्या ए॒वैनं॑ भा॒गधे॑यं प्रे॒प्सन्तो॑
वि॒शम॑व - [] 4

TS 2.3.1.5

गम॑यन्ति॒ यदि॒ ना॒वग॑च्छे॒दाश्च॑त्थान् म॒यू॒खान्त् स॒प्त म॑द्ध्यमे॒षायामु॑प
ह॒न्यादि॑दम॒ह-मा॒दित्या॑न् ब॒ध्ना॒म्याऽऽ *मु॒ष्माद॑मुष्यै वि॒शो
ऽव॑गन्तो॒रित्या॑दित्या ए॒वैनं॑ ब॒द्धवी॑रा वि॒शम॑व गम॑यन्ति॒ यदि॒

ना॒व॒ग॒च्छे॒दे॒त॒मे॒वाऽऽदि॒त्यं च॒रुं नि॒र्व॒पे॒दि॒ध्मे ऽपि म॒यू॒खा॒न्त्सं
न॒ह्ये॒द॒न॒प॒रु॒द्ध्य॒मे॒वा॒व ग॒च्छ॒त्याश्च॒त्था भ॒व॒न्ति॒म॒रु॒तां वा ए॒त ()-दो॒जो
य॒दश्च॒त्थ ओ॒ज॒सै॒व वि॒श॒म॒व ग॒च्छ॒ति स॒प्त भ॒व॒न्ति स॒प्त॒ग॒णा वै म॒रु॒तो
ग॒ण॒श ए॒व वि॒श॒म॒व ग॒च्छ॒ति । 5

(धा॒र॒य॒द्व॒तो-म॒रु॒तो-ग॒च्छ॒ति -वि॒श॒म॒वै - त -द॒ष्टा॒द॒श च) (A1)

TS 2.3.2.1

दे॒वा वै मृ॒त्यो॒र॒बि॒भ॒यु॒स्ते प्र॒जा॒प॒ति॒मु॒पा॒धा॒वन् तेभ्य॑ ए॒तां प्रा॒जा॒प॒त्याꣳ
श॒त॒कृ॒ष्ण॒लां नि॒र॒व॒प॒त् त॒यै॒वैष्व॒मृ॒त॒म॒द॒धाद्-यो मृ॒त्यो॒र्बि॒भी॒यात् तस्मा॑
ए॒तां प्रा॒जा॒प॒त्याꣳ श॒त॒कृ॒ष्ण॒लां नि॒र्व॒पे॒त् प्र॒जा॒प॒ति॒मे॒व स्वे॒न
भा॒ग॒धे॒ये॒नो॒प धा॒व॒ति स ए॒वास्मि॒न्ना॒यु॒र्द॒धा॒ति स॒र्व॒मा॒यु॒रे॒ति श॒त॒कृ॒ष्ण॒ला
भ॒व॒ति श॒ता॒युः पु॒रु॒षः श॒ते॒न्द्रि॒य आ॒यु॒ष्ये॒वे॒न्द्रि॒ये - [] 6

TS 2.3.2.2

प्र॒ति ति॒ष्ठ॒ति घृ॒ते भ॒व॒त्या॒यु॒र्वै घृ॒त॒म॒मृ॒तꣳ हि॒र॒ण्य॒मा॒यु॒श्चै॒वास्मा॑
अ॒मृ॒तं च स॒मी॒ची द॒धा॒ति च॒त्वा॒रि॒च॒त्वा॒रि कृ॒ष्ण॒ला॒न्य॒व द्य॒ति
च॒तु॒र॒व॒त्त॒स्याऽऽप्त्या॑ ए॒क॒धा ब्र॒ह्म॒ण उप॑ ह॒र॒त्ये॒क॒धै॒व य॒ज॒मा॒न

आयु॑र्द॒धात्य॑सा॒वादि॒त्यो न व्य॑रोच॒त तस्मै॑ दे॒वाः प्राय॑श्चि॒त्तिमै॑च्छन्
तस्मा॑ ए॒तꣳ सौ॒र्यं च॒रुं नि॒रव॑पन् तेनै॒वास्मिन् - [] 7

TS 2.3.2.3

रुच॑मदधु॒र्यो ब्र॑ह्मवर्च॒सका॑मः स्यात् तस्मा॑ ए॒तꣳ सौ॒र्यं च॒रुं
निर्व॑पेद॒मुमे॒वाऽऽदि॒त्यꣳ स्वे॑न भा॒गधे॑ये॒नोप॑ धावति स ए॒वास्मिन्
ब्र॑ह्मवर्च॒सं द॑धाति ब्र॑ह्मवर्च॒स्यैव॑ भवत्यु॒भय॑तो रु॒क्मौ भ॑वत उ॒भय॑त
ए॒वास्मिन् रुचं॑ दधाति प्र॒याजे॑प्र॒याजे कृ॑ष्णलं जुहोति दि॒ग्भ्य
ए॒वास्मै॑ ब्र॑ह्मवर्च॒सम॑व रुन्ध आ॒ग्नेय॑म॒ष्टाक॑पालं निर्व॑पेथ् सावि॒त्रं
द्वा॑दशकपालं भू॒म्यै - [] 8

TS 2.3.2.4

च॒रुं यः॑ का॒मये॑त हि॒रण्यं वि॑न्देय हि॒रण्यं मो॑ष नमे॒दिति॑ यदा॒ग्नेयो॑
भव॑त्या॒ग्नेयं॑ वै हि॒रण्यं य॑स्यैव हि॒रण्यं तेनै॒वैन॑द् विन्दते सावि॒त्रो
भव॑ति सवि॒तृप्र॑सूत ए॒वैन॑द्-विन्दते भू॒म्यै च॒रुर्भव॑त्यस्यामे॒वैन॑द्-
विन्द॑त उपै॒नꣳ हि॒रण्यं न॑मति वि वा ए॒ष इन्द्रि॑येण वी॒र्ये॑णर्द॒ध्यते॑
यो हि॒रण्यं वि॑न्दत ए॒ता - [] 9

TS 2.3.2.5

–मे॒व नि॒र्वपे॑द्धि॒रण्यं॑ वि॒त्त्वा ने॒न्द्रि॒येण॑ वी॒र्ये॑ण व्य॒र्द्ध्यत॑ ए॒तामे॒व
नि॒र्वपे॑द्यस्य हि॒रण्यं॑ नश्येद्–यदा॑ग्ने॒यो भव॑त्याग्ने॒यं वै हि॒रण्यं॑
यस्यै॑ व हि॒रण्यं॑ तेनै॒वैनद्–वि॒न्दति॑ सा॒वि॒त्रो भव॑ति स॒वितृ॑प्रसू॒त
ए॒वैनद्–वि॒न्दति॑ भू॒म्यै च॒रुर्भव॑त्यस्यां वा ए॒तन्न॑श्यति
यन्न॑श्यत्यस्यामे॒वैनद्–वि॒न्दतीन्द्र॑ – [] 10

TS 2.3.2.6

–स्त्वष्टुः॑ सोम॑मभीष॒हा ऽपि॒ब॒थ् स वि॒ष्वङ् व्य॑च्छ॒थ् स इ॒न्द्रि॒येण॑
सोम॑पी॒थेन॑ व्य॒र्द्ध्यत॑ स यदूर्ध्व॑मु॒दव॑मीत् ते श्या॒माका॑ अभवन्त्स
प्र॒जाप॑तिमु॒पाधा॑वत् तस्मा॑ ए॒तञ् सो॑मेन्द्र॒ञ् श्या॑मा॒कं च॒रुं नि॑रव॒पत्
तेनै॒वास्मि॑न्निन्द्रि॒यञ् सो॑मपी॒थम॑दधाद्–वि वा ए॒ष इ॒न्द्रि॒येण॑
सोम॑पी॒थेन॑र्द्ध्यते॒ यः सो॑मं व॒मिति॑ यः सो॑मवा॒मी स्या॑त्
तस्मा॑ – [] 11

TS 2.3.2.7

ए॒तञ् सो॑मेन्द्र॒ञ् श्या॑मा॒कं च॒रुं नि॑र्वपे॒थ् सो॑मं चै॒वेन्द्रं॑ च
स्वेन॑ भा॒गधे॒येनो॑प धावति तावे॒वास्मि॑न्निन्द्रि॒यञ् सो॑मपी॒थं ध॑त्तो

ने॒न्द्रि॒येण॑ सोम॒पी॒थेन॑ व्यृ॒द्ध्यते॑ यथ् सौ॒म्यो भव॑ति सोम॒पी॒थमे॒वाव॑
रुन्धे॑ यदै॒न्द्रो भव॑तीन्द्रि॒यं वै सोम॒पी॒थ इन्द्रि॒यमे॒व सोम॒पी॒थम॑व
रुन्धे॑ श्यामा॒को भव॑त्येष॒ वाव स सोमः॑ – [] 12

TS 2.3.2.8

सा॒क्षादे॒व सोम॒पी॒थम॑व रुन्धे॑ ऽग्नये॑ दा॒त्रे पु॒रोडा॑शम॒ष्टाक॑पालं
निर्व॑पेदिन्द्रा॒य प्रदा॑त्रे पु॒रोडा॑शमेकादशकपालं प॒शुकामो॑ ऽग्निरे॒वास्मै॑
प॒शून् प्र॑ज॒नय॑ति वृ॒द्धानिन्द्रः॑ प्र यच्छति॒ दधि॒ मधु॑ घृ॒तमापो॑ धा॒ना
भव॑न्त्येतद्-वै प॒शूना॑ꣳ रू॒पꣳ रू॒पेणै॒व प॒शून॑व रुन्धे॑ पञ्चगृही॒तं
भव॑ति पा॒ङ्गा हि प॒शवो॑ ब॒हुरू॒पं भव॑ति ब॒हुरू॒पा हि प॒शवः॑- [] 13

TS 2.3.2.9

समृ॑द्ध्यै प्राजाप॒त्यं भव॑ति प्राजाप॒त्या वै प॒शवः॑ प्र॒जाप॑तिरे॒वास्मै॑
प॒शून् प्र॑ ज॒नय॑त्या॒त्मा वै पु॒रुष॑स्य॒ मधु॑ यन्म॒ध्वग्नौ॑ जु॒होत्या॒त्मानमे॒व
तद्-यज॑मानो॒ ऽग्नौ प्र॑ दधाति प॒ङ्क्त्यौ॑ याज्यानुवा॒क्ये भव॑तः पा॒ङ्गः
पु॒रुषः॑ पा॒ङ्गाः प॒शव॑ आ॒त्मानमे॒व मृ॒त्योर्निष्क्री॑यप॒शून॑व रुन्धे॑ ॥ 14

(इन्द्रि॒यं - ऽस्मिन् - भूम्या॑ - ए॒ता - मिन्द्रः॑ - स्यात् तस्मै॑ -
सोमो॑ - ब॒हुरू॒पा हि प॒शव॑ - एक॑चत्वारि॒ंशच्च॑) (A2)

TS 2.3.3.1

दे॒वा वै स॒त्रमा॑स॒त-॑र्धि॒परि॑मितं॒ ँ॒य॒श॒स्का॒मास्ते॑षा॒ꣳ सोम॑ꣳ
राजा॑नं॒ ँ॒य॒श आ॑च्छ॒थ् स गि॒रिमु॑दैत् तम॒ग्नि॒रनू॑दैत् ताव॒ग्नी॒षोमौ॑
सम॑भव॒तां ता॒विन्द्रो॑ य॒ज्ञवि॑भ्रष्टो ऽनु॒ परै॑त् ताव॒ब्रवी॑द्-या॒जय॑तं॒ मेति॑
तस्मा॑ ए॒तामि॑ष्टिं॒ निर॑वप॒तामा॒ग्नेय॑-म॒ष्टाक॑पालमै॒न्द्र-मे॒काद॑शकपालꣳ
सौ॒म्यं च॒रुं तयै॑वास्मिन् तेज - [] 15

TS 2.3.3.2

इन्द्रि॒यं ब्र॑ह्मव॒र्चस॑म॒धत्तां॒ ँ॒यो य॒ज्ञवि॑भ्रष्टः स्यात् तस्मा॑ ए॒तामि॑ष्टिं
निर्व॑पेदा॒ग्नेय॑-म॒ष्टाक॑पालमै॒न्द्र-मे॒काद॑शकपालꣳ सौ॒म्यं च॒रुं
॥ ँ॒दा॒ग्नेयो॑ भवति तेज ए॒वास्मिन् तेन॑ दधाति यदै॒न्द्रो
भव॑तीन्द्रि॒यमे॒वास्मिन् तेन॑ दधाति यथ् सौ॒म्यो ब्र॑ह्मव॒र्चसं
तेना॑ऽऽग्ने॒यस्य॑ च सौ॒म्यस्य॑ चै॒न्द्रे स॒माश्ले॑षयेत् तेजश्चै॒वास्मिन्
ब्र॑ह्मव॒र्चसं च॑ स॒मीची॑ - [] 16

TS 2.3.3.3

दधा॑त्यग्नी॒षोमी॒य-मे॒काद॑शकपालं॒ निर्व॑पेद्-यं का॒मो नो॒पन॑मे॒दाग्ने॒यो
वै ब्रा॑ह्मणः स सोमं॑ पिबति स्वामे॒व दे॒वता॑ꣳ स्वेन॑ भा॒गधे॑ये॒नोप॑

धावति॑ सै॒वैनं॑ का॒मेन॑ सम॒र्द्धय॑त्यु॒पैनं॑ का॒मो न॑मत्यग्नी॒षोमी॑य-
म॒ष्टाक॑पालं॒ निर्व॑पेद्-ब्र॒ह्मव॑र्च॒सका॑मो ऽग्नी॒षोमा॑वेव स्वेन॑
भा॒गधे॑येनोप॑ धावति॑ तावे॒वास्मिन्॑ ब्र॒ह्मव॑र्च॒सं ध॑त्तो
ब्र॒ह्मव॑र्च॒स्येव॑- [] 17

TS 2.3.3.4

भ॒वति॑ यद॒ष्टाक॑पाल-स्तेना॑ऽऽग्ने॒यो यच्छ्या॑माकस्तेन॑ सौ॒म्यः
सम॒र्द्ध्यै सो॑माय॒ वाजि॑ने॒ श्या॑माकं॒ चरुं॑ निर्व॑पेद्-यः
क्लै॒व्याद्वि॑भी॒याद् रे॒तो हि॑ वा ए॒तस्मा॑द्-वा॒जिन॑मप॒क्राम॑त्यथै॒ष
क्लै॒व्याद्वि॑भा॒य सो॑ममे॒व वा॒जिन॑ऽस्वेन॑ भा॒गधे॑येनोप॑ धावति॑ स
ए॒वास्मिन्॑ रे॒तो वा॒जिनं॑ दधाति॒ न क्ली॒बो भ॑वतिब्राह्मणस्प॒त्य-
मेका॑दशकपालं॒ निर्व॑पेद् ग्रा॒मका॑मो - [] 18

TS 2.3.3.5

ब्र॒ह्मण॑-स्पतिमे॒व स्वेन॑ भा॒गधे॑येनोप॑ धावति॑ स ए॒वास्मै॑ सजा॒तान्
प्र यच्छ॑ति ग्रा॒म्येव॑ भ॒वति॑ ग॒णव॑ती या॒ज्यानु॑वाक्ये॑ भवतः॑
सजा॒तैरे॒वैनं॑ ग॒णव॑न्तं करोत्ये॒तामे॒व निर्व॑पेद्-यः का॒मये॑त ब्र॒ह्मन्
वि॒शं वि॑ ना॒शये॑यमि॒ति मा॒रुती॑ या॒ज्यानु॑वाक्ये॑ कुर्या॒द् ब्र॒ह्मन्ने॒व

वि॒शं॑ वि॒ ना॒शय॑ति ॥ 19 (तेजः॑ – समीची॑ – ब्रह्मवर्चस्यैव॑ –
ग्राम॑काम – स्त्रिच॑त्वारि॒ंशच्च॑) (A3)

TS 2.3.4.1

अ॒र्य॒म्णे च॒रुं निर्व॑पेथ् सु॒वर्ग॑कामो ऽसौ वा आ॒दि॒त्यौ ऽर्य॒मा ऽर्य॒मण॑मेव
स्वेन॑ भा॒ग॒धेये॒नोप॑ धावति॒ स ए॒वैन॑ सु॒वर्गं॑ लो॒कं ग॑मयत्य॒र्य॒म्णे
च॒रुं निर्व॑पेद्-यः का॒मये॑त दान॑कामा मे प्र॒जाः स्यु॒रित्य॒सौ वा
आ॒दि॒त्यौ ऽर्य॒मा यः खलु॑ वै ददाति॒ सौ ऽर्य॒मा ऽर्य॒मण॑मेव स्वेन॑
भा॒ग॒धेये॒नोप॑ धावति॒ स ए॒वा – [] 20

TS 2.3.4.2

-स्मै दान॑कामाः प्र॒जाः करो॑ति दान॑कामा अस्मै प्र॒जा भ॑वन्त्य॒र्य॒म्णे
च॒रुं निर्व॑पेद्-यः का॒मये॑त स्व॒स्ति ज॒नता॑मि॒यामि॒त्यसौ॑ वा आ॒दि॒त्यौ-
ऽर्य॒मा- ऽर्य॒मण॑मेव स्वेन॑ भा॒ग॒धेये॒नोप॑ धावति॒ स ए॒वैनं॑ तद्-ग॑मयति॒
यत्र॑ जि॒गमि॑षतीन्द्रो॒ वै दे॒वाना॑मा॒नुजा॑वर आसी॒थ् स प्र॒जाप॑ति-
मु॒पाधा॑वत् तस्मा॑ ए॒तमै॒न्द्रमा॑नु॒षूक॑मेकादशकपालं॒ नि- [] 21

TS 2.3.4.3

–रवपत् तेनैवैनमग्रं देवतानां पर्यणयद् बुद्धनवती अग्रवती
याज्यानुवाक्ये अकरोद् बुद्धनादेवैनमग्रं पर्यणयद्-यो राजन्य
आनुजावरः स्यात् तस्मा एत-मैन्द्र-मानुषूक-मेकादशकपालं
निर्वपेदिन्द्रमेव स्वेन भागधेयेनोप धावति स एवैनमग्रं समानानां
परि णयति बुद्धनवती अग्रवती याज्यानुवाक्ये भवतो

बुद्धनादेवैनमग्रं [] 22

TS 2.3.4.4

परि णयत्यानुषूको भवत्येषा ह्येतस्य देवता य आनुजावरः
समृद्ध्यै यो ब्राह्मण आनुजावरः स्यात् तस्मा एतं बार्हस्पत्य-मानुषूकं
चरुं निर्वपेद् बृहस्पतिमेव स्वेन भागधेयेनोप धावति स एवैनमग्रं
समानानां परि णयति बुद्धनवती अग्रवती याज्यानुवाक्ये भवतो
बुद्धनादेवैनमग्रं परि णयत्यानुषूको भवत्येषा ह्येतस्य () देवता
य आनुजावरः समृद्ध्यै ॥ 23

(एव – निर – ग्र-मेतस्य – चत्वारि च) (A4)

TS 2.3.5.1

प्र॒जाप॑ते-स्त्रयस्त्रि॒शद् दु॒हित॑र आ॒सन् ताः सोमा॑य रा॒ज्ञे ऽद॑दात्
तासां॑ रोहि॒णीमु॑पैत् ता ई॒र्ष्यन्तीः पुन॑रगच्छन् ता अ॒न्वैत् ताः
पुन॑रयाचत ता अ॒स्मै न पुन॑रददाथ् सो ऽब्र॑वीदृतममीष्व यथा
समा॑वच्छ उ॒पैष्या॑म्यथ ते पुन॑र्दास्यामीति स ऋ॒तमा॑मीत् ता अ॒स्मै
पुन॑रददात् तासां॑ रोहि॒णीमे॒वोपै॑त् - [] 24

TS 2.3.5.2

तं य॑क्ष्म आ॒र्च्छद्-रा॒जानं॑ य॑क्ष्म आ॒रद॑ति तद्-रा॒जय॑क्ष्मस्य
जन्म॑ यत् पापी॒यान॑भवत् तत् पा॒पय॑क्ष्मस्य यज्जा॒याभ्यो॑ ऽवि॒न्दत्
तज्जा॒येन्य॑स्यय ए॒वमे॒तेषां॑ य॑क्ष्माणां जन्म वेद नैनमे॒ते य॑क्ष्मा
वि॒न्दन्ति॒स ए॒ता ए॒व न॑मस्यन्नुपा॒धाव॑त् ता अब्रु॒वन् वरं॑ वृ॒णाम॑है
समा॑वच्छ ए॒व न॒ उपा॑य इति तस्मा॑ ए॒त - [] 25

TS 2.3.5.3

-मा॒दित्यं॑ च॒रुं नि॒रव॑पन् तेनै॒वैनं॑ पा॒पाथ् स्रा॑मादमुञ्चन्.
यः पा॒पय॑क्ष्मगृही॒तः स्या॑त् तस्मा॑ ए॒तमा॑दित्यं च॒रुं नि॒र्वपे॑दादित्या॒नेव
स्वेन॑ भा॒गधे॒येनो॑प धावति त ए॒वैनं॑ पा॒पाथ् स्रा॑मान्मुञ्चन्त्य-

मा॒वा॒स्या॒यां॑ नि॒र्व॒पे॒द॒मु॒मे॒वैन॑-मा॒प्या॒य॒मा॒न॒-म॒न्वा॒ प्या॒य॒य॒ति॒ न॒वो॒न॒वो॑
भ॒व॒ति॒ जा॒य॒मा॒न॒ इति॑ पु॒रो॒नु॒वा॒क्या॑ भ॒व॒त्या॒यु॒रे॒वा॒स्मिन् () तया॑
द॒धा॒ति॒ य॒मा॒दि॒त्या॒ अ॒॒शु॒मा॒प्या॒य॒य॒न्तीति॑ या॒ज्यै॒वैन॑मे॒तया॑

प्याययति ॥ 26

(ए॒वो॒पै -त- म॑स्मिन् - त्रयो॑दशच) (A5)

TS 2.3.6.1

प्र॒जा॒प॒ति॒ दे॒वे॒भ्यो॑ ऽन्नाद्यं॑ व्यादि॒श॒त् सो॑ ऽब्र॒वी॒द्-य॒दि॒मा॒न्
ँलो॒का॒न॒भ्य॒ति॒रि॒च्या॒तै त॒न्म॒मा॒स॒दि॒ति॒ त॒दि॒मा॒न् ँलो॒का॒न॒भ्य॒त्य॒रि॒च्य॒ते॒न्द्र॒॒
रा॒जा॒न॒-मि॒न्द्र॒-म॒धि॒रा॒ज॒-मि॒न्द्र॒॒ स्व॒रा॒जा॒नं॑ ततो॒ वै स॒ इ॒मा॒न् ँलो॒का॒
स्त्रे॒धा ऽदु॒ह॒त् तत् त्रि॒धा॒तो॒स्त्रि॒धा॒तु॒त्वं यं॑ का॒म॒र्ये॒ता॒न्ना॒दः॑ स्या॒दि॒ति॒
तस्मा॑ ए॒तं त्रि॒धा॒तुं नि॒र्व॒पे॒दि॒न्द्रा॒य॒ राज्ञे॑ पु॒रो॒डा॒श - [] 27

TS 2.3.6.2

-मे॒का॒द॒श॒क॒पा॒ल॒-मि॒न्द्रा॒या॒धि॒रा॒जा॒ये॒न्द्रा॒य॒ स्व॒रा॒ज्ञे॒ ऽयं॑ वा॒ इन्द्रो॑
रा॒जा॒ ऽय॒मिन्द्रो॑ ऽधि॒रा॒जो॑ ऽसा॒विन्द्रः॑ स्व॒रा॒डि॒मा॒ने॒व लो॒का॒न्-
स्वे॒न भा॒ग॒धे॒ये॒नो॒प धा॒व॒ति॒ त ए॒वा॒स्मा॒ अ॒न्नं॑ प्र॒ य॒च्छ॒न्त्य॒न्ना॒द ए॒व
भ॒व॒ति॒ यथा॑ व॒थ्से॒न प्र॒त्तां॑ गां॒ दु॒ह ए॒वमे॒वे॒मा॒न् ँलो॒का॒न् प्र॒त्ता॒न्

काममन्नाद्यं दुह उत्तानेषु कपालेष्वधि श्रयत्ययातयामत्वाय
 त्रयः () पुरोडाशा भवन्ति त्रय इमे लोका एषां लोकानामाप्या
 उत्तरउत्तरो ज्यायान् भवत्येवमिव हीमे लोकाः समृद्ध्यै सर्वेषा-
 मभिगमयन्नव द्यत्यच्छम्बट्कारं व्यत्यासमन्वाहानिर्दाहाय ॥ 28

(पुरोडाशं - त्रयः - षड्विंशतिश्च) (A6)

TS 2.3.7.1

देवासुराः सँयत्ता आसन् तान् देवानसुरा अजयन् ते देवाः
 पराजिग्याना असुराणां वैश्यमुपाऽऽयन् तेभ्य इन्द्रियं वीर्यमपाक्रामत्
 तदिन्द्रो ऽचायत् तदन्वपाक्रामत् तदवरुधं नाशक्नोत् तदस्मादभ्यर्द्धो
 ऽचरथ् स प्रजापतिमुपाधावत् तमेतया सर्वपृष्ठया ऽयाजयत्
 तयैवास्मिन्निन्द्रियं वीर्यमदधाद्-य इन्द्रियकामो - [] 29

TS 2.3.7.2

वीर्यकामः स्यात् तमेतया सर्वपृष्ठया याजयेदेता एव देवताः स्वेन
 भागधेयेनोप धावति ता एवास्मिन्निन्द्रियं वीर्यं दधति यदिन्द्राय
 राथन्तराय निर्वपति यदेवाग्ने-स्तेजस्तदेवाव रुन्धेयदिन्द्राय बार्हताय

यदेवेन्द्रस्य तेजस्तदेवाव रुन्धे यदिन्द्राय वैरूपाय यदेव

सवितुस्तेजस्त - [] 30

TS 2.3.7.3

देवाव रुन्धे यदिन्द्राय वैराजाय यदेव धातुस्तेजस्तदेवाव रुन्धे
यदिन्द्राय शाक्वराय यदेव मरुतां तेजस्तदेवाव रुन्धे यदिन्द्राय रैवताय
यदेव बृहस्पतेस्तेजस्तदेवाव रुन्ध एतावन्ति वै तेजांसि तान्येवाव
रुन्ध उत्तानेषु कपालेष्वधि श्रयत्ययातयामत्वाय द्वादशकपालः

पुरोडाशो - [] 31

TS 2.3.7.4

भवति वैश्वदेवत्वाय समन्तं पर्यवद्यति समन्तमेवेन्द्रियं वीर्यं
यजमाने दधाति व्यत्यास-मन्वाहानिर्दाहायाश्च ऋषभो वृष्णिर्बस्तः
सा दक्षिणा वृषत्वायैतयैव यजेताभिः शस्यमान एताश्चेद्-वा
अस्यदेवता अन्न-मदन्त्यदन्त्यु-वेवास्य मनुष्याः ॥ 32

(इन्द्रियकामः-सवितुस्तेजस्तत् - पुरोडाशो - ऽष्टात्रिंशच्च) (A7)

TS 2.3.8.1

र॒जनो॒ वै कौ॒णेयः॑ क्र॒तुजि॑तं जा॒नकिं॑ चक्षु॒र्वन्य॑मयात् तस्मा॑
 ए॒तामि॑ष्टिं नि॒रवप॑दग्नये भ्राज॒स्वते॑ पु॒रोडा॑शम॒ष्टाक॑पालं
 सौ॒र्यं च॒रुम॑ग्नये भ्राज॒स्वते॑ पु॒रोडा॑शम॒ष्टाक॑पालं तयै॒वास्मिन्
 चक्षु॑रदधाद्-य-श्चक्षु॒कामः॑ स्यात् तस्मा॑ ए॒तामि॑ष्टिं नि॒र्वपे॑दग्नये
 भ्राज॒स्वते॑ पु॒रोडा॑शम॒ष्टाक॑पालं सौ॒र्यं च॒रुम॑ग्नये भ्राज॒स्वते॑
 पु॒रोडा॑शम॒ष्टाक॑पालम॒ग्ने वै चक्षु॑षा म॒नुष्या॑ वि - [] 33

TS 2.3.8.2

प॒श्यन्ति॑ सूर्य॒स्य दे॒वा अ॒ग्निं चै॒व सूर्यं॑ च स्वे॒न भा॒गधे॑येनोप॒ धाव॑ति
 तावे॒वास्मिन्॑ चक्षु॒र्द्धत्त॑श्चक्षु॒ष्माने॒व भव॑ति यदा॒ग्नेयौ॑ भवतश्चक्षु॒षी
 ए॒वास्मिन्॑ तत् प्र॒ति द॑धाति यथ् सौ॒र्यो ना॑सिकां तेना॒भितः॑
 सौ॒र्यमा॒ग्नेयौ॑ भवतस्तस्माद॒भितो॑ ना॒सिकां॑ चक्षु॒षी तस्मान्ना॑सिकया
 चक्षु॒षी वि॑धृते स॒मानी॑ या॒ज्यानु॑वाक्ये भवतः स॒मानं॑ हि () चक्षुः
 समृ॑द्ध्य उ॒दु त्यं जा॒तवे॑दसं स॒प्त त्वा॑ ह॒रितो॑ रथे चि॒त्रं
 दे॒वाना॑मु॒दगा॑दनीकमि॒ति पि॑ण्डान् प्र यच्छति चक्षु॒रेवा॑स्मै प्र यच्छति
 यदे॒व तस्य॑ तत् ॥ 34 (वि - ह्य - षावि॑शतिश्च) (A8)

TS 2.3.9.1

ध्रुवो ऽसि ध्रुवो ऽहं सजातेषु भूयासं धीरश्चेत्ता वसुविद् ध्रुवो ऽसि
 ध्रुवो ऽहं सजातेषु भूयासमुग्रश्चेत्ता वसुविद् ध्रुवो ऽसि ध्रुवो ऽहं
 सजातेषु भूयासमभिभूश्चेत्ता वसुविदामन-मस्यामनस्य देवा ये
 सजाताः कुमाराः समनसस्तानहं कामये हृदा ते मां कामयन्तां
 हृदा तान् म आमनसः कृधि स्वाहा ऽमन-मस्या - [] 35

TS 2.3.9.2

-मनस्य देवा याः स्त्रियः समनसस्ता अहं कामये हृदा ता मां
 कामयन्तां हृदा ता म आमनसः कृधि स्वाहा वैश्वदेवीं साङ्ग्रहणीं
 निर्वपेद्ग्रामकामो वैश्वदेवा वै सजाता विश्वानेव देवान्त्स्वेन
 भागधेयेनोप धावति त एवास्मै सजातान् प्र यच्छन्ति ग्राम्येव भवति
 साङ्ग्रहणी भवति मनोग्रहणं वैसङ्ग्रहणं मन एव
 सजातानां - [] 36

TS 2.3.9.3

गृह्णाति ध्रुवो ऽसि ध्रुवो ऽहं सजातेषु भूयासमिति परिधीन् परि
 दधात्याशिषमेवैतामा शास्ते ऽथो एतदेव सर्वं सजातेष्वधि भवति

यस्यै॒वं वि॒दुष॑ ए॒ते परि॒धयः॑ परि॒धी॒यन्त॑ आ॒मन॑म॒स्याम॑नस्य दे॒वा
इति॑ ति॒स्र आ॑हु॒ती जु॑होत्ये॒ताव॑न्तो॒ वै स॑जा॒ता ये म॑हान्तो॒ ये क्षु॑ल्ल॒का
याः स्त्रि॒यस्ता॑ने॒वाव रु॑न्धे () त ए॒नम॑वरु॒द्धा उप॑ तिष्ठन्ते ॥ 37

(स्वाहा ऽम॑नम॒सि – स॑जा॒तानां॑ – रु॒न्धे – पञ्च॑ च) (A9)

TS 2.3.10.1

यन्न॑वमै॒त् तन्न॑वनी॒तम॑भवद्-यद॑स॒र्पत् तथ् स॒र्पि॑र॒भवद्-यद॑दि॒ध्रय॑त्
तद् घृ॒तम॑भवद॒श्विनोः॑ प्रा॒णो ऽसि॑ तस्य॑ ते द॒त्तां य॑योः प्रा॒णो ऽसि॑
स्वा॒हेन्द्र॑स्य प्रा॒णो ऽसि॑ तस्य॑ ते द॒दातु॑ यस्य॑ प्रा॒णो ऽसि॑ स्वा॒हा
मि॒त्राव॑रु॒णयोः॑ प्रा॒णो ऽसि॑ तस्य॑ ते द॒त्तां य॑योः प्रा॒णो ऽसि॑ स्वा॒हा
वि॒श्वेषां॑ दे॒वानां॑ प्रा॒णो ऽसि॑ – [] 38

TS 2.3.10.2

तस्य॑ ते द॒दतु॑ येषां॑ प्रा॒णो ऽसि॑ स्वा॒हा घृ॒तस्य॑ धा॒राम॑मृ॒तस्य॑
पन्था॑मिन्द्रे॒ण द॒त्तां प्र॑य॒तां म॑रु॒द्धिः ।

तत् त्वा॑ वि॒ष्णुः पर्य॑पश्यत् तत् त्वे॒डा ग॑व्यैर॒यत् ॥

पा॒वमा॑नेन॒ त्वा स्तो॑मे॒न गा॒यत्र॑स्य॒ वर्त॑न्योपा॒शो

वी॒र्ये॑ण दे॒वस्त्वा॑ स॒वितो॑थ् सृ॒जतु॑ जी॒वात॑वे जी॒वन॑स्यायै

बृ॒ह॒द्॒र॒थ॒न्त॒र॒यो॒स्त्वा॒ स्तो॒मे॒न॒ त्रि॒ष्टु॒भो॒ वर्त॒न्या॒ शु॒क्र॒स्य॒ वी॒र्ये॒ण॒

दे॒व॒स्त्वा॒ स॒वि॒तो॒थ् - [] 39

TS 2.3.10.3

सृ॒ज॒तु जी॒वा॒त॒वे जी॒व॒न॒स्या॒या अ॒ग्ने॒स्त्वा मा॒त्र॒या जग॑त्यै
वर्त॒न्या ऽऽग्र॑य॒ण॒स्य वी॒र्ये॒ण दे॒व॒स्त्वा स॒वि॒तो॒थ् सृ॒ज॒तु जी॒वा॒त॒वे
जी॒व॒न॒स्या॒या इ॒म॒म॒ग्न आ॒यु॒षे वर्च॑से कृ॒धि प्रि॒यꣳ रे॒तो
वरु॑ण सोम राजन् ।

मा॒ते॒वा॒स्मा अ॒दि॒ते श॒र्म यच्छ॑ वि॒श्वे दे॒वा ज॒र॒द॒ष्टि॒र्यथा॑ ऽस॒त् ॥
अ॒ग्नि॒रा॒यु॒ष्मान्त् स व॒न॒स्प॒ति॒भि॒रा॒यु॒ष्मान् तेन॑ त्वा ऽऽयु॒षा ऽऽयु॑ष्मन्तं
क॒रो॒मि सोम॑ आ॒यु॒ष्मान्त् () स ओष॑धीभि र्य॒ज्ञ आ॒यु॒ष्मान्त् स
दक्षि॑णाभि ब्र॒ह्माऽऽयु॑ष्मत् तद्-ब्रा॒ह्म॒णै॒रा॒यु॒ष्मद् दे॒वा आ॒यु॒ष्मन्त॒स्ते ऽमृ॑तेन
पि॒तर॑ आ॒यु॒ष्मन्त॒स्ते स्व॒धया॑ ऽऽयु॑ष्मन्तस्तेन त्वा ऽऽयु॒षा ऽऽयु॑ष्मन्तं
क॒रो॒मि ॥ 40

(वि॒श्वे॒षां दे॒वानां॑ प्रा॒णो॒ऽसि॑ - त्रि॒ष्टु॒भो वर्त॒न्या शु॒क्र॒स्य वी॒र्ये॒ण
दे॒व॒स्त्वा स॒वि॒तो॒थ् - सोम॑ आ॒यु॒ष्मान् - पञ्च॑विंशतिश्च) (A10)

TS 2.3.11.1

अ॒ग्निं वा॑ ए॒तस्य॑ शरी॒रं गच्छ॑ति सोम॒ꣳ रसो॑ वरु॒ण ए॒नं वरु॑णपा॒शेन॑
 गृह्णा॑ति सर॒स्वतीं वा॑ग॒ग्नाविष्णू॑ आ॒त्मा यस्य॑ ज्यो॒गामय॑ति यो
 ज्यो॒गामया॑वी स्याद्-यो वा कामये॒त सर्व॑मायुरि॒यामिति॑ तस्मा॑
 ए॒तामिष्टिं॑ निर्व॒पेदाग्ने॑य -म॒ष्टाक॑पालꣳ सौ॒म्यं चरुं॑ वा॒रुणं॑
 द॒शक॑पालꣳ सा॒रस्व॑तं च॒रुमा॑ग्नावैष्ण॒व-मेका॑द॒शक॑पाल-म॒ग्नेरे॒वास्य॑
 शरी॒रं निष्क्री॑णाति सोमाद्-र॒सं - [] 41

TS 2.3.11.2

वा॒रुणे॒नैवैनं॑ वरु॒णपा॒शान् मुञ्च॑ति सा॒रस्व॑तेन वाचं दधात्य॒ग्निः
 सर्वा॑ दे॒वता॑ विष्णु॒र्यज्ञो॑ दे॒वता॑भिश्चै॒वैनं॑ य॒ज्ञेन॑ च भिषज्यत्यु॒त
 यदी॒तासु॑ भ॒वति॑ जी॒वत्ये॒व यन्न॑वमैत् तन्न॒वनी॑तम- भव॒दित्या॑ज्य-
 मवे॒क्षते॑रूपमे॒वास्यै॑-तन्महि॒मानं॑ व्याचष्टे ऽश्वि॒नौः प्रा॒णो
 ऽसी॒त्याहा॑श्वि॒नौ वै दे॒वानां॑ - [] 42

TS 2.3.11.3

भिष॒जौ ता॑भ्यामे॒वास्मै॑ भेष॒जं करो॑तीन्द्रस्य प्रा॒णो ऽसी॒त्याहेन्द्रि॑य-
 मे॒वास्मिन्ने॒तेन॑ दधाति मि॒त्रावरु॑णयोः प्रा॒णो ऽसी॒त्याह॑ प्राणापा॒ना-

वे॒वास्मि॑न्ने॒तेन॑ दधाति विश्वे॑षां दे॒वानां॑ प्रा॒णो ऽसी॑त्याह
 वी॒र्यमे॑वास्मिन्ने॒तेन॑ दधाति घृ॒तस्य॑ धा॒राम॑मृतस्य पन्था॒मित्या॑ह
 यथा॑यजु॒रेवै॑तत् पाव॒माने॑न त्वा स्तोमे॒नेत्या॑ – [] 43

TS 2.3.11.4

–ह प्रा॒णमे॑वास्मिन्ने॒तेन॑ दधाति बृ॒हद्र॑थन्त॒रयो॑स्त्वा स्तोमे॒नेत्या॑हौज
 ए॒वास्मि॑न्ने॒तेन॑ दधात्य॒ग्नेस्त्वा॑ मा॒त्रये॑त्याहाऽऽत्मान॑–मे॒वास्मि॑न्ने॒तेन॑
 दधात्य॒त्विजः॑ पर्या॒हुर्या॑वन्त ए॒वर्त्वि॑जस्त ए॒नं भि॑षज्यन्ति ब्र॒ह्म॒णो
 हस्त॑मन्वा॒रभ्य॑ पर्या॒हुरेक॑धैव यज॒मान॑ आयु॑र्दधति यदे॒व
 तस्य॑ तद्धि॒रण्याद् – [] 44

TS 2.3.11.5

घृ॒तं नि॑ष्पिब॒त्यायु॑र्वै घृ॒तम॑मृतं हिर॑ण्य–म॒मृता॑दे॒वाऽऽयु॑र्निष्पिबति
 श॒तमा॑नं भवति श॒तायुः॑ पुरु॒षः श॒तेन्द्रि॑य आयु॒ष्येवेन्द्रि॑ये
 प्र॒ति ति॑ष्ठत्यथो खलु याव॑तीः समा ए॒ष्यन् म॑न्येत ताव॑न्मानं स्या॒त्
 समृ॑द्ध्या इ॒मम॑ग्न आयु॒षे वर्च॑से कृ॒धीत्या॑हाऽऽयु॒रेवास्मि॑न् वर्चो॑
 दधाति॑ विश्वे॑ दे॒वा जर॑दष्टि॒र्यथा॑ ऽस॒दित्या॑ () –ह जर॑दष्टिमे॒वैनं॑
 करो॑त्यग्नि–रायु॒ष्मानि॑ति हस्तं गृ॒ह्णात्ये॑ते वै दे॒वा आयु॑ष्मन्तस्त

ए॒वास्मिन्नायु॑र्दधति॒ सर्व॒मायु॑रेति ॥ 45

(र॒सं-दे॒वाना॑-स्तो॒मेने॒ति-हि॒रण्या॑-द॒सदि॒ति-द्वावि॑ंशतिश्च)(A11)

TS 2.3.12.1

प्र॒जाप॑ति॒ वरु॑णायाश्च-मन॒यथ् स॒ स्वां दे॒वता॑माच्छ॒थ् स॒ पर्य॑दीर्यत॒
स॒ ए॒तं वा॑रुणं चतुष्क॒पालम॑पश्यत् तं निर॒वप॑त् ततो॒ वै स॒
वरु॑णपा॒शाद॑मुच्यत॒ वरु॑णो वा ए॒तं गृ॑ह्णाति॒ यो ऽश्वं॑ प्र॒तिगृ॑ह्णाति॒
याव॑तो ऽश्वान् प्र॒तिगृ॑ह्णीयात् ताव॑तो वा॒रुणा॑न् चतुष्क॒पालान् निर्व॑पेद्-
वरु॑णमे॒व स्वेन॑ भा॒गधे॒येनो॑प धावति॒ स ए॒वैनं॑ वा॒रुणपा॑शान्
मुञ्च॑ति - [] 46

TS 2.3.12.2

चतुष्क॒पाला भ॑वन्ति चतुष्पा॒द्ध्यश्चः॒ समृ॑द्ध्य॒ा एक॑मतिरि॒क्तं
निर्व॑पेद्-यमे॒व प्र॒तिग्रा॑ही भ॒वति॒ यं वा॒ नाद्ध्ये॒ति तस्मा॑दे॒व
वरु॑णपा॒शान् मु॑च्यते यद्य॒परं प्र॒तिग्रा॑ही स्याथ् सौ॒र्यमे॑क॒कपाल॑मनु
निर्व॑पे-दमु॒मेवाऽऽदि॒त्यमु॑च्चारं कुरु॒ते ऽपो॑ ऽवभृ॒थम॑वै॒त्यप्सु॑ वै
वरु॑णः सा॒क्षादे॒व वरु॑णम॒व य॑जते ऽपो॒नप्त्री॑यं च॒रुं () पु॒नरे॒त्य
निर्व॑पेदप्सुयो॒निर्वा अ॒श्वः स्वा॒मेवैनं॑ यो॒निं ग॑मयति॒ स

ए॒न॒ꣳ शान्त॑ उ॒प तिष्ठ॑ते ॥ 47

(मु॒ञ्च॒ति - च॒रु॒ꣳ - स॒प्तद॑श च) (A12)

TS 2.3.13.1

या॑ वा॒मिन्द्रा॑व॒रुणा॑ य॒तव्या॑ त॒नूस्त॑ये-म॒मꣳह॑सो मुञ्च॒तं य॑ा
वा॒मिन्द्रा॑व॒रुणा॑ स॒हस्या॑ र॒क्षस्या॑ ते॒जस्या॑ त॒नूस्त॑ये-म॒मꣳह॑सो
मुञ्च॒तं य॑ो वा॒मिन्द्रा॑व॒रुणा॑व॒ग्नौ स्राम॑स्तं वा॒मेते॑नाव॒ यजे॑ यो
वा॒मिन्द्रा॑व॒रुणा॑ द्वि॒पाथ्सु॑ प॒शुषु॑ च॒तुष्पा॑थ्सु गो॒ष्ठे गृ॑हेष्व॒फ॒स्वोष॑धीषु
व॒नस्प॑तिषु स्राम॑स्तं वा॒मेते॑नाव॒ यज॑ इन्द्रो॒ वा ए॒तस्यै॑ - [] 48

TS 2.3.13.2

-न्द्रि॒येणा॑प॒ क्राम॑ति व॒रुण॑ ए॒नं व॑रुणपा॒शेन॑ गृह्णा॒ति यः पा॑प्मना
गृही॒तो भ॑वति यः पा॒प्मना॑ गृही॒तः स्या॑त् तस्मा॑ ए॒तामै॑न्द्राव॒रुणीं
प॒यस्यां॑ निर्व॒पेदि॑न्द्र ए॒वास्मि॑न्निन्द्रि॒यं द॑धाति व॒रुण॑ ए॒नं
व॑रुणपा॒शान्-मु॒ञ्च॒ति प॒यस्या॑ भ॒वति॑ प॒यो हि॒ वा
ए॒तस्मा॑द॒प॒क्राम॑त्यथैष पा॒प्मना॑ गृही॒तो यत् प॒यस्या॑ भ॒वति॑ प॒य
ए॒वास्मि॑न् तया॑ द॒धाति॑ प॒यस्या॑यां - [] 49

TS 2.3.13.3

पुरो॑डा॒शम॑व द॒धा॒त्या॒त्म॒न्व॒न्तमे॑वैनं॑ करोत्यथो॑ आ॒य॒त॒न॒व॒न्तमे॑व
चतु॑र्द्धा व्यू॒हति॑ दि॒क्ष्वे॒व प्र॒ति तिष्ठ॑ति पुनः॑ समू॒हति॑ दिग्भ्य॑ ए॒वास्मै॑
भेष॑जं करोति॑ समू॒ह्याव॑ द्यति॒ यथा ऽऽवि॑द्धं निष्कृ॒न्तति॑ तादृ॒गे॒व तद्-
यो वा॑मिन्द्रा॒वरु॑णाव॒ग्नौ साम॑स्तं वा॒मे॒ते॒नाव॑ यज॒ इत्या॑ह दु॒रि॒ष्ट्या
ए॒वैनं॑ पाति॒ () यो वा॑मिन्द्रा॒वरु॑णा द्वि॒पा॒थ्सु प॒शुषु॑ साम॑स्तं वा॒ मे
ते॒नाव॑ यज॒ इत्या॑हैता॒वती॑र्वा आप॒ ओष॑धयो व॒नस्प॑तयः प्र॒जाः प॒शव॑
उप॑जीव॒नीया॒स्ता ए॒वास्मै॑ वरु॒णपा॑शान्-मुञ्चति॑ ॥ 50

(ए॒तस्य॑ - प॒यस्या॑यां - पा॒ति - षड्विं॑शतिश्च) (A13)

TS 2.3.14.1

स प्र॒त्नव॑ >[1], त्रि॒का॒व्ये >[2], न्द्रं॑ वा॒ विश्व॑त॒स्परी>[3], न्द्रं॑ नरः>[4] ॥

त्वं नः॑ सोम॒ विश्व॑तो र॒क्षा राज॑न्नघायतः ।

न रि॒ष्येत् त्वा॑वतः॒ सखाः॑ ॥

या ते॒ धामा॑नि दि॒वि या पृ॑थि॒व्यां या पर्व॑तेष्वोष॒धीष्व॑प्सु ॥

तेभि॑र्नो विश्वैः॑ सु॒मना॒ अहे॑डन् राजन्थ्-सोम॒ प्रति॑ ह॒व्या गृ॑भाय ॥

अग्नी॑षोमा॒ सर्व॑दसा॒ सहू॑ती व॒नतं॑ गिरः ।

सं दे॒व॒त्रा ब॒भूव॑थुः ॥

युव - [] 51

TS 2.3.14.2

-मे॒तानि॑ दि॒वि रो॑च॒नान्य॑ग्निश्च॒ सोम॑ सक्र॒तू अध॑त्तं ॥

युव॑ꣳ सिन्धूꣳ-र॒भि॒शस्ते॑-र॒वद्या॑द॒ग्नीषो॑मा-वमुञ्च॑तं गृ॒भी॒तान् ॥

अ॒ग्नी॒षोमा॑विमꣳ सु मे शृ॒णु॒तं वृ॑षणा ह॒वꣳ ।

प्रति॑ सू॒क्तानि॑ हर्य॒तं भव॑तं दा॒शुषे॑ मयः ॥

आ ऽन्यं॑ दि॒वो मा॑तरिश्वा॒ जभा॑राम॒थ्नाद॑न्यं परि श्ये॒नो अ॒द्रेः ।

अ॒ग्नी॒षोमा॑ ब्र॒ह्मणा॑ वावृ॒धानो॑रुं य॒ज्ञाय॑ चक्रथुरु॒ लोकं ॥

अ॒ग्नी॒षोमा॑ ह॒विषः॑ प्र॒स्थित॑स्य वी॒तꣳ - [] 52

TS 2.3.14.3

हर्य॒तं वृ॑षणा जु॒षेथां॑ ।

सु॒शर्मा॑णा स्वव॒सा हि॑ भू॒तम॑था ध॒त्तं य॑ज॒माना॑य शं योः ॥

आ प्या॑यस्व >[5], सं ते >[6] ॥

ग॒णानां॑ त्वा ग॒णप॑तिꣳ हवामहे क॒विं क॑वी॒ना-मु॑प॒मश्र॑वस्तमं ।

ज्येष्ठ॑राजं ब्र॒ह्मणां॑ ब्र॒ह्मण॑स्पत॒ आ नः॑ शृ॒ण्वन्नू॑तिभिः सीद॒ साद॑नं ।

स इज्जनेन स विशा स जन्मना स पुत्रैर्वाजं भरते धना नृभिः ।

देवानां यः पितरमाविवासति – [] 53

TS 2.3.14.4

श्रद्धामना हविषा ब्रह्मणस्पतिं ॥

स सुष्टुभा स ऋक्वता गणेन वलꣳ रुरोज फलिगꣳ रवेण ।

बृहस्पति-रुस्त्रिया हव्यसूदः कनिक्रदद्-वावशती-रुदाजत् ॥

मरुतो यद्ध वो दिवो >[7], या वः शर्म >[8] ॥

अर्यमा ऽऽ याति वृषभ-स्तुविष्मान् दाता वसूनां पुरुहूतो अर्.हन् ।

सहस्राक्षो गौत्रभिद्-वज्रबाहुरस्मासु देवो द्रविणं दधातु ॥

ये ते ऽर्यमन् बहवो देवयानाः पन्थानो – [] 54

TS 2.3.14.5

राजन् दिव आचरन्ति ।

तेभिर्नो देव महि शर्म यच्छ शं न एधि द्विपदे शं चतुष्पदे ॥

बुद्धनादग्र-मङ्गिरोभि-गृणानो वि पर्वतस्य दृꣳहितान्यैरत् ।

रुजद्-रोधाꣳसि कृत्रिमाण्येषाꣳ सोमस्य ता मद इन्द्रश्चकार ॥

बु॒ध्नाद॑ग्रे॒ण वि॒ मि॒माय॑ मा॒नैर्व॑ज्रेण॒ खान्य॑तृण॒न्नदी॑नां॑ ॥

वृ॒था ऽसृ॑जत् प॒थिभि॑र्दी॒र्घया॑थैः सोम॑स्य॒ ता म॒द इन्द्र॑श्चकार ॥ 55

TS 2.3.14.6

प्र॒ यो ज॒ज्ञे वि॒द्वाँ अ॒स्य ब॒न्धुं वि॑श्वा॒नि दे॒वो ज॒नि॒मा वि॒वक्ति॑ ।

ब्र॒ह्म ब्र॒ह्मण॑ उ॒ज्ज॒भार॑ म॒द्ध्यान्नी॑चा॒दुच्चा॑ स्व॒धया॑ ऽभि॒ प्र त॑स्थौ ॥

म॒हान् म॒ही अ॑स्त॒भाय॒द्वि जा॒तो द्याँ॑ स॒द्य पार्थि॑वं च॒ रजः॑ ।

स बु॒ध्नादा॑ष्ट ज॒नुषा॑ ऽभ्य॒ग्रं बृ॒हस्प॑ति॒ दे॒वता॑य॒स्य स॒म्राट् ॥

बु॒ध्नाद्-यो अ॒ग्रम॑भ्य॒त्यो॒जसा॑ बृ॒हस्प॑ति॒मा वि॑वास॒न्ति दे॒वाः () ।

भि॒नद्-व॒लं वि॑ पु॒रो द॑र्दरीति॒ कनि॑क्र॒दथ् सु॑व॒रपो॑ जि॒गाय॑ ॥ 56

(यु॒वं - वी॒त॒मा - वि॒वा॒स॒ति - प॒न्था॑नो - दी॒र्घया॑थैः सोम॑स्य॒ ता

म॒द इन्द्र॑श्चकार - दे॒वा - न॒व च॑) (A14)

Prasna Korvai with starting Padams of 1 to 14 Anuvaakams :-

(आ॒दि॒त्ये॒भ्यो॑ – दे॒वा वै मृ॒त्यो – दे॒वा वै – स॒न्नम॑ – र्य॒म्णे –
प्र॒जाप॑ते॒स्त्रय॑स्त्रि॒ंशत् – प्र॒जाप॑ति दे॒वेभ्यो॑ऽन्नाद्यं॑ –
दे॒वासु॒रास्तान् – रज॑नो – ध्रु॒वोऽसि॑ – यन्न॑व – म॒ग्निं वै –
प्र॒जाप॑ति॒ वरु॑णाय – या वा॑मिन्द्रा वरुणा – स प्र॑नव – च्चतु॑र्दश)

Korvai with starting Padams of 1, 11, 21 Series of Panchaatis :-

(आ॒दि॒त्ये॒भ्य – स्त्व॑ष्टु – रस्मै॑ दान॒कामा॑ – ए॒वाव॑ रुन्धे – ऽग्निं॑ वै
– स प्र॑नवथ् – षट्प॑ञ्चा॒शत्)

First and Last Padam of Third Prasnam of Kandam 2:-

(आ॒दि॒त्ये॒भ्यः॑ – सु॒वर॑पो जिगाय)

॥ हरिः ओं ॥

॥ कृष्ण यजुर्वेदीय तैत्तिरीय संहितायां द्वितीयकाण्डे तृतीयः प्रश्नः समाप्तः ॥

2.3.1 Appendix

2.3.14.1 – स प्रलव>¹

स प्रलवन्नवीय-साग्ने॑ द्यु॒म्नेन॑ सँयता॑ ।

बृ॒हत् ततन्थ॑ भानुना॑ ॥ (Appearing in TS2.2.12.1)

2.3.14.1 – त्रि काव्ये>²

नि काव्या॑ वेधसः॑ शश्च॑तस्कर्ह॒स्ते दधा॑नो नर्या॑ पु॒रूणि॑ ।
अ॒ग्निर्भु॑वद्रयि॒पती रयी॑णां स॒त्रा च॑क्रा॒णो अ॒मृता॑नि वि॒श्वा ॥

(Appearing in TS2.2.12.2)

2.3.14.1 – इन्द्रं वो विश्वतस्परी>³

इन्द्रं॑ वो॒ विश्व॑तस्प॒रि ह॒वामहे॑ जने॒भ्यः । अ॒स्माक॑मस्तु॒ के॒वलः॑ ॥

(Appearing in TS1.6.12.1)

2.3.14.1 – इन्द्रं नरः> 4

इन्द्रं नरो नेमधिता हवन्ते यत्पार्या युनजते धियस्ताः ।
शूरो नृषाता शवसश्चकान आ गोमति व्रजे भजा त्वन्नः ॥

(Appearing in TS 1.6.12.1)

2.3.14.3 – आप्यायस्व> 5

आप्यायस्व समेतु ते विश्वतः सोम वृष्णियं भवा वाजस्य सङ्गथे ॥

(Appearing in TS 4.2.7.4)

2.3.14.3– सं ते> 6

सं ते पयांसि समु यन्तु वाजाः सं वृष्णियान् यभिमातिषाहः ।
आप्यायमानो अमृताय सोम दिवि श्रवांस्युत्तमानि धिष्व ॥

(Appearing in TS 4.2.7.4)

2.3.14.4 -मरुतो यद्धवो दिवो> 7

मरुतो यद्ध वो दिवः सुम्ना यन्तो हवामहे ।

आ तू न उप गन्तन ॥ (Appearing in TS1.5.11.4)

2.3.14.4 -या वः शर्म> 8

या वः शर्म शशमानाय सन्ति त्रिधातूनि दाशुषे यच्छताधि ।
अस्मभ्यं तानि मरुतो वि यन्त रयिं नो धत्त वृषणः सुवीरं ॥

(Appearing in TS1.5.11.5)

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

2.4 द्वितीयकाण्डे चतुर्थः प्रश्नः – इष्टिविधानं

TS 2.4.1.1

दे॒वा॒ म॒नु॒ष्याः॑ पि॒तर॒स्ते॑ऽन्य॒त आ॒स॒न्न॒सु॒रा र॒क्षा॑ऽसि पि॒शा॒चास्ते॑
ऽन्य॒तस्ते॑षां दे॒वाना॑मु॒त यद॒ल्पं लो॒हित॑मकुर्वन् तद्-र॒क्षा॑ऽसि
रा॒त्रीभि॑रसु॒भ्नन् ता॒न्थ सु॒ब्धान् मृ॒तान॑भि व्यौ॒च्छत् ते दे॒वा अ॒वि॒दुर्यो
वै नो॒ ऽयं म्रि॒यते॒ रक्षा॑ऽसि वा इ॒मं घ्न॒न्तीति॒ ते रक्षा॑ऽस्युपा॒मन्त्र॑यन्त
ता॒न्यब्रु॑वन् वरं वृ॒णाम॑है य – [] 1

TS 2.4.1.2

-द॒सु॒रान् ज॒याम॑ तन्नः स॒हास॑दिति॒ ततो॒ वै दे॒वा अ॒सु॒रान॑जयन् ते
ऽसु॒रान् जि॒त्वा रक्षा॑ऽस्युपा॒नुद॑न्त॒ तानि॒ रक्षा॑ऽस्यनृ॒तम॑ क॒र्तेति॑
सम॒न्तं दे॒वान् पर्य॑वि॒शन् ते दे॒वा अ॒ग्नाव॑नाथन्त॒ ते ऽग्नये॑ प्रव॒ते
पु॒रोडा॑शम॒ष्टाक॑पालं॒ निर॑वपन्न॒ग्नये॑ वि॒बाध॑वते॒ ऽग्नये॑ प्र॒तीक॑वते
यद॒ग्नये॑ प्रव॒ते निर॑वपन्॒ यान्ये॒व पु॒रस्ता॑द्-रक्षा॑ऽस्या – [] 2

TS 2.4.1.3

–सन् तानि तेन प्राणुदन्त यदग्नये विबाधवते यान्येवाभितो
रक्षा७स्यासन् तानि तेन व्यबाधन्त यदग्नये प्रतीकवते यान्येव
पश्चाद्–रक्षा७स्यासन् तानि तेनापानुदन्त ततो देवा अभवन् परा
ऽसुरा यो भ्रातृव्यवान्थ स्याथ स स्पर्द्धमान एतयेष्ट्या यजेताग्नये
प्रवते पुरोडाशमष्टाकपालं निर्वपेदग्नये विबाधवते – [] 3

TS 2.4.1.4

ऽग्नये प्रतीकवते यदग्नये प्रवते निर्वपति य एवास्माच्छ्रेयान्–
भ्रातृव्यस्तं तेन प्र णुदते यदग्नये विबाधवते य एवैनैन सदृङ् तं तेन
वि बाधते यदग्नये प्रतीकवते य एवास्मात् पापीयान् तं तेनाप नुदते
प्र श्रेया७सं भ्रातृव्यं नुदते ऽति सदृशं क्रामति नैनं पापीयानाप्नोति
य एवं () विद्वानेतयेष्ट्या यजते ॥ 4

(वृणामहै यत् – पुरस्ताद् रक्षा७सि– वपेदग्नये विबाधवत – एवं
– चत्वारि च) (A1)

TS 2.4.2.1

दे॒वा॒सु॒राः सँ॑य॒त्ता आ॒सन् ते दे॒वा अ॒ब्रुव॑न्॒ यो नो॑ वी॒र्या॑व॒त्तम॒स्तम॑नु॒
स॒मा॒र॒भा॒महा॒ इति॑ त इन्द्र॑म॒ब्रुव॑न् त्वं वै नो॑ वी॒र्या॑व॒त्तमो ऽसि॑ त्वा॒मनु॑
स॒मा॒र॒भा॒महा॒ इति॑ सो ऽब्र॑वीत् ति॒स्रो म॑ इ॒मास्त॑नुवो वी॒र्या॑व॒तीस्ताः
प्री॑णी॒ताथा॒सुरा॑न॒भि भ॑विष्य॒थेति॑ ता वै ब्रू॑ही॒त्यब्रु॑वन्नि॒य-म॑हो॒मुगि॑यं
वि॒मृ॒धेय॑मिन्द्रि॒याव॑ती - [] 5

TS 2.4.2.2

-त्य॒ब्रवी॑त् त इन्द्रा॑या॒हो॒मुचे॑ पु॒रोडा॑श॒मेका॑द॒शक॑पालं नि॒रव॑प॒न्निन्द्रा॑य
वैमृ॑धा॒येन्द्रा॑येन्द्रि॒याव॑ते॒ यदिन्द्रा॑या॒हो॒मुचे॑ नि॒रव॑प॒न्नह॑स ए॒व
तेना॑मुच्यन्त॒ यदिन्द्रा॑य वैमृ॑धाय॒ मृध॑ ए॒व तेना॑पा॒घ्नत॑यदिन्द्रा॑येन्द्रि॒याव॑त
इन्द्रि॒यमे॒व तेना॑ऽऽत्म॒न्नद॑धत॒ त्रय॑स्त्रि॒शत्क॑पालं पु॒रोडा॑शं नि॒रव॑प॒न्
त्रय॑स्त्रि॒शद्-वै दे॒वता॑स्ता इन्द्र॑ आ॒त्मन्न॑नु॒ स॒मा॒रंभ॑यत॒ भूत्यै॑ - [] 6

TS 2.4.2.3

तां वा॒व दे॒वा वि॒जिति॑-मु॒त्तमा॑-म॒सुरै॑-र्व्य॒जय॑न्त॒यो भ्रा॑तृ॒व्यवा॑न्थ्-
स्या॒थ् स स्पर्द्ध॑मान ए॒तये॑ष्ट॒या य॒जेतेन्द्रा॑या॒हो॒मुचे॑
पु॒रोडा॑श॒मेका॑द॒शक॑पालं नि॒र्वपे॑दिन्द्रा॑य वैमृ॑धा॒येन्द्रा॑येन्द्रि॒याव॑ते

ऽ॒हसा॑ वा ए॒ष गृ॒हीतो॑ यस्मा॒च्छ्रेया॑न् भ्रातृ॒व्यो॒यदिन्द्रा॑या॒ हो॒मुचे॑
निर्व॒पत्य॑ह॒स ए॒व तेन॑ मुच्यतेमृ॒धा वा ए॒षो ऽभिष॑ण्णो यस्मा॑त्
समा॒नेष्व॒न्यः श्रेया॑नुता - [] 7

TS 2.4.2.4

-ऽभ्रातृ॒व्यो यदिन्द्रा॑य वैमृ॒धाय॑ मृ॒ध ए॒व तेनाप॑ हते यदिन्द्रा॑येन्द्रि॒याव॑त
इन्द्रि॒यमे॒व तेना॒त्मन् ध॑त्ते त्रयस्त्रि॑श॒त्कपालं॑ पुरो॒डाशं॑ निर्व॒पति॑
त्रयस्त्रि॑श॒द्-वै दे॒वता॒स्ता ए॒व यज॑मान आ॒त्मन्न॑नु समा॒रंभ॑यते भू॒त्यै
सा वा ए॒षा विजि॑तिर्नामेष्टि॒र्य ए॒वं वि॒द्वाने॒तयेष्ट्या॑ यज॑त उत्त॒मामे॒व
विजि॑तिं भ्रातृ॒व्येण॑ वि ज॑यते ॥ 8

(इन्द्रि॒याव॑ती - भू॒त्या - उ॒तै - का॒न्नप॑ञ्चा॒शच्च॑) (A2)

TS 2.4.3.1

दे॒वा॒सुराः॑ सँय॑त्ता आस॒न् तेषां॑ गा॒य॒त्र्यो॒जो ब॑लमिन्द्रि॒यं वी॒र्यं॑ प्र॒जां
प॒शून्थ॑ सं॒गृह्या॑ऽऽदा॒या-प॒क्रम्या॑तिष्ठ॒त् ते ऽम॑न्यन्त यत॒रान्.
वा इ॒यमु॑पाव॒थ्स्य॑ति॒ त इ॒दं भ॑विष्यन्तीति॒ तां व्य॑ह्वयन्त॒ विश्व॑कर्म॒न्निति॑
दे॒वा दा॑भीत्यसुराः॑ सा ना॒न्यत॑रा॒-श्च॒नोपा॑वर्तत॒ ते दे॒वा
ए॒तद्-य॑जुरपश्य॒न्नो॒जो ऽसि॑ स॒हो ऽसि॑ ब॒लम॑सि - [] 9

TS 2.4.3.2

भ्रा॒जो ऽसि॑ दे॒वानां॑ धाम॒ नामा॑ ऽसि॒ विश्व॑मसि॒ विश्वा॑युः॒ सर्व॑मसि॒
सर्वा॑युरभि॒भूरिति॑ वाव दे॒वा असु॑राणा॒मोजो॑ बल॒मिन्द्रि॑यं वी॒र्यं॑ प्र॒जां
प॒शून्वृ॑ज्जत॒ यद्-गा॑यत्र्यप॒क्रम्या॑तिष्ठत् तस्मा॑दे॒तां गा॑यत्रीती॒ष्टिमा॑हुः
सँव॑त्सरो वै गा॒यत्री सँव॑त्सरो वै तदप॒क्रम्या॑तिष्ठद्-यदे॒तया
दे॒वा असु॑राणा॒मोजो॑ बल॒मिन्द्रि॑यं वी॒र्यं॑ - [] 10

TS 2.4.3.3

प्र॒जां प॒शून्वृ॑ज्जत॒ तस्मा॑दे॒तां सँव॑र्ग इती॒ष्टिमा॑हुर्यो
भ्रातृ॑व्यवा॒न्त्स्याथ् स॑स्प॒र्द्धमा॑न ए॒तये॑ष्ट्या॒ यजे॑ता॒ग्नये॑ सँव॒र्गाय॑
पुरो॑डाशम॒ष्टाक॑पालं॒ निर्व॑पेत् तं शृ॒तमा॑सन्नमे॒तेन॑ यजु॒षा ऽभि॑
मृ॒शेदो॑ज ए॒व बल॑मिन्द्रि॒यं वी॒र्यं॑ प्र॒जां प॒शून् भ्रातृ॑व्यस्य वृ॒द्धे
भव॑त्या॒त्मना॑ परा॒ ऽस्य॑ भ्रातृ॒व्यो भव॑ति ॥ 11 (बल॑मस्ये - तया॑ दे॒वा
असु॑राणा॒मोजो॑ बल॒मिन्द्रि॑यं वी॒र्यं॑ - पञ्च॑चत्वारि॒ंशच्च॑) (A3)

TS 2.4.4.1

प्र॒जाप॑तिः प्र॒जा असृ॑जत॒ ता अ॑स्माथ् सृ॒ष्टाः परा॑ची-रा॒यन् ता॑
यत्रा॑व॒सन् ततो॑ गर्मु॒दुद॑तिष्ठत् ता बृ॒हस्प॑तिश्चान्ववैतां सौ ऽब्र॑वीद्

बृ॒ह॒स्प॒ति॒र॒न॒या॑ त्वा॒ प्र ति॒ष्ठा॒न्यथ॑ त्वा प्र॒जा उ॒पाव॑थ्स्य॒न्तीति॑ तं प्रातिष्ठत्
ततो॒ वै प्र॒जाप॑तिं प्र॒जा उ॒पाव॑र्तन्त॒ यः प्र॒जाका॑मः स्यात् तस्मा॑ ए॒तं
प्रा॒जाप॑त्यं गा॒र्मु॒तं च॒रुं निर्व॑पेत् प्र॒जाप॑ति – [] 12

TS 2.4.4.2

–मे॒व स्वे॑न भा॒ग॒धे॒ये॒नोप॑ धावति॒ स ए॒वास्मै॑ प्र॒जां
प्र॒ ज॒न॒य॒ति प्र॒जाप॑तिः प॒शून्सृ॑जत॒ ते ऽस्मा॑त् सृ॒ष्टाः प॒राञ्च॑ आ॒यन्
ते य॒त्राव॑सन् ततो॒ गर्मु॑दुदतिष्ठत् तान् पू॒षा चा॒न्ववै॑ता॒ꣳ सो ऽब्र॑वीत्
पू॒षा ऽन॒या मा प्र ति॒ष्ठाथ॑ त्वा प॒शव॑ उ॒पाव॑थ्स्य॒न्तीति॑ मां प्र ति॒ष्ठेति॑
सोमो॑ ऽब्र॒वीन् म॒म वा – [] 13

TS 2.4.4.3

अ॒कृ॒ष्टप॑च्यमित्यु॒भौ वां प्र ति॒ष्ठानी॑त्यब्रवीत् तौ प्रातिष्ठत् ततो॒ वै
प्र॒जाप॑तिं प॒शव॑ उ॒पाव॑र्तन्त॒ यः प॒शुका॑मः स्यात् तस्मा॑ ए॒तꣳ
सो॒मापौ॑ष्णं गा॒र्मु॒तं च॒रुं निर्व॑पेथ् सो॒मापू॑षणा॒वेव॑ स्वे॒न भा॒ग॒धे॒ये॒नोप॑
धाव॑ति ता॒वेवा॑स्मै प॒शून् प्र ज॒न॒य॒तः सोमो॑ वै रे॒तोधाः॑ पू॒षा प॒शूनां॑
प्र॒ज॒न॒यि॒ता सोम॑ ए॒वास्मै॑ रे॒तो द॑धाति पू॒षा () प॒शून्
प्र॒ज॒न॒य॒ति ॥ 14

(व॒पेत् प्र॒जाप॑तिं – वै – दधा॑ति पू॒षा – त्रीणि॑ च) (A4)

TS 2.4.5.1

अग्ने॑ गोभि॒र्न आ ग॒ही॒न्दो पु॒ष्ट्या जु॑षस्व नः ।

इन्द्रो॑ ध॒र्ता गृ॒हेषु॑ नः ॥

सवि॒ता यः स॒हस्रि॑यः स नो॑ गृ॒हेषु॑ रा॒रणत् ।

आ पू॒षा ए॒त्वाऽऽ व॑सु ॥

धा॒ता द॑दातु नो र॒यिमी॑शा॒नो ज॑ग॒तस्प॑तिः ।

स नः॑ पू॒र्णेन॑ वा॒वनत् ॥

त्वष्टा॑ यो वृ॒षभो॑ वृ॒षा स नो॑ गृ॒हेषु॑ रा॒रणत् ।

स॒हस्रे॑णा॒युते॑न च ॥

येन॑ दे॒वा अ॒मृतं॑ – [] 15

TS 2.4.5.2

दी॒र्घं॑ श्र॒वो दि॒व्यैर॑यन्त ।

रा॒यस्पो॑ष त्वम॒स्मभ्यं॑ ग॒वां कु॒ल्मिं जी॒वस॒ आ यु॑वस्व ॥

अ॒ग्नि गृ॒हप॑तिः सोमो॑ वि॒श्वव॑निः सवि॒ता सु॑मे॒धाः स्वाहा॑ ॥

अग्ने॑ गृ॒हप॑ते॒ यस्ते॒ घृ॒त्यो॑ भा॒गस्ते॒न सह॒ ओज॑ आ॒क्रम॑माणा॒य धेहि॑
श्रै॒ष्ठा॒यात्प॒थो मा॑ योषं॑ मूर्द्धा॑ भू॒यास॑ स्वाहा ॥ 16

(अ॒मृत॑ – म॒ष्टात्रि॑ञ्शच्च) (A5)

TS 2.4.6.1

चि॒त्रया॑ यजेत॑ प॒शुकाम॑ इ॒यं वै चि॒त्रा यद्-वा अ॒स्यां वि॒श्वं भू॒तमधि॑
प्र॒जाय॑ते तेने॒यज्चि॒त्रा य ए॒वं वि॒द्वाञ् शि॒त्रया॑ प॒शुकामो॑ यज॑ते
प्र प्र॒जया॑ प॒शुभि॑ मि॒थुनै॑ र्जाय॑ते प्रै॒वाऽऽग्ने॑येन॒ वाप॑यति॒ रेतः॑ सौ॒म्येन॑
दधा॑ति॒ रेत॑ ए॒व हि॒तं त्वष्टा॑ रू॒पाणि॑ वि॒ करो॑तिसारस्वतौ॒ भव॑त ए॒तद्-
वै दै॒व्यं मि॒थुनं॑ दै॒व्यमे॒वास्मै॑ – [] 17

TS 2.4.6.2

मि॒थुनं॑ म॒द्ध्यतो॑ दधा॑ति पु॒ष्ट्यै॑ प्र॒जन॑नाय॒ सिनी॑वा॒ल्यै च॒रुर्भ॑वति
वा॒ग्वै सि॑नीवा॒ली पु॒ष्टिः खलु॑ वै वाक्पु॒ष्टिमे॒व वाच॑मु॒पैत्यै॒न्द्र उ॑त्त॒मो
भ॑वति॒ तेनै॒व तन्मि॑थुनञ् स॒प्तैतानि॑ ह॒वीषि॑ भव॑न्ति स॒प्त ग्रा॒म्याः
प॒शवः॑ स॒प्तार॒ण्याः स॒प्त छन्दा॑ऽस्यु॒भय॑स्या-वरु॒द्ध्या अथै॒ता
आ॑हु॒ती र्जु॑होत्ये॒ते वै दे॒वाः पु॒ष्टिप॑तयस्त ए॒वा () स्मिन् पु॒ष्टिं दध॑ति
पु॒ष्यति॑ प्र॒जया॑ प॒शुभि॑रथो॒ यदे॒ता आ॑हु॒ती र्जु॑होति॒ प्रति॑ष्ठित्यै ॥ 18

(अ॒स्मै – त ए॒व – द्वा॒दश॑ च) (A6)

TS 2.4.7.1

मा॒रु॒तम॑सि॒ म॒रु॒ता॒मो॒जो ऽपां॑ धा॒रां भि॑न्धि॒ र॒म॒य॒त म॑रु॒तः श्ये॒नमा॑यि॒नं
म॒नो॑ज॒वसं॑ वृ॒षणं॑ सुवृ॒क्तिं ॥

ये॒न श॑र्द्ध उ॒ग्रम॑व॒सृष्ट॑मेति॒ तद॑श्चि॒ना परि॑ धत्त॒ स्व॒स्ति ।

पु॒रो॒वा॒तो व॑र्ष॒ज्जि॒न्वरा॑वृ॒थ्-स्वाहा॑ वा॒ताव॑द्- व॑र्ष॒न्नु॒ग्रा॒वृ॒थ् स्वाहा॑
स्त॒नय॑न् व॑र्ष॒न् भी॒मरा॑वृ॒थ्-स्वाहा॑ ऽन॒श॒न्यव॑स्फूर्जन्-दि॒द्युद्-व॑र्ष॒न्-
त्वे॒षरा॑वृ॒थ् स्वाहा॑ ऽति॒रात्रं॑ व॑र्ष॒न् पू॒र्ति॒रा॒वृ॒थ् – [] 19

TS 2.4.7.2

स्वाहा॑ ब॒हु हा॒यम॑वृषादि॒ति श्रु॑तरावृ॒थ् स्वाहा॑ ऽत॒पति॑ व॑र्ष॒न्-
वि॒राडा॑वृ॒थ् स्वाहा॑ ऽव॒स्फूर्ज॑न्-दि॒द्युद्-व॑र्ष॒न् भू॒तरा॑वृ॒थ् स्वाहा॑मा॒न्दा
वा॒शाः शु॒न्ध्यूर॑जि॒राः ।

ज्यो॑ति॒ष्मती॑-स्त॒मस्व॑री-रु॒न्दती॑ः सु॒फे॒नाः ।

मि॒त्रभृ॑तः क्ष॒त्रभृ॑तः सु॒राष्ट्रा॑ इ॒ह मा॑ ऽव॒त ॥

वृ॒ष्णो अ॑श्व॒स्य स॒न्दान॑म॒सि वृ॑ष्ट्यै॒ त्वोप॑ न॒ह्यामि॑ ॥ 20

(पू॒र्ति॒रा॒वृ॒द् – द्वि॑च॒त्वारि॑श॒च्च) (A7)

TS 2.4.8.1

दे॒वा वस॑व्या अ॒ग्ने सोम॑ सूर्य ॥
दे॒वाः शर्म॑ण्या मि॒त्रावरु॑णा ऽर्यमन् ॥
दे॒वाः सपी॑तयो ऽपां॑ नपादाशुहेमन् ।
उ॒द्नो द॑त्तोद॒धिं भि॑न्त दि॒वः पर्ज॑न्याद॒न्तरि॑क्षात् पृथि॒व्यास्ततो॑
नो वृ॑ष्ट्या ऽव॒त ॥
दि॒वा चि॒त्तमः॑ कृ॒ण्वन्ति॑ पर्ज॒न्येनो॑-दवा॒हेन॑ ।
पृथि॒वीं य॑द् व्यु॒न्दन्ति॑ ॥
आ यं नरः॑ सु॒दान॑वो ददाशुषे दि॒वः कोश॑मचुच्यवुः ।
वि पर्ज॑न्याः सृजन्ति रोद॒सी अनु॑ धन्व॒ना यन्ति॑ - [] 21

TS 2.4.8.2

वृ॒ष्टयः॑ ॥
उ॒दीर॑यथा मरुतः समुद्रतो यूयं वृ॒ष्टिं व॑र्षयथा पुरीषिणः ।
न वो द॒स्रा उप॑ दस्यन्ति धे॒नवः॑ शुभं या॒तामनु॑ रथा अवृथ्सत ॥
सृ॒जा वृ॒ष्टिं दि॒व आ ऽद्भिः॑ समु॒द्रं पृ॑ण ॥
अ॒ब्जा अ॑सि प्रथमजा बलमसि समु॒द्रियं॑ ॥

उ॒न्न॒म्भ॒य पृ॒थि॒वीं भि॒न्धी॒दं दि॒व्यं न॒भः ।

उ॒द्नो दि॒व्यस्य॑ नो दे॒हीशा॒नो वि॒ **सृ॒जा** दृ॒तिं ॥

ये दे॒वा () दि॒विभा॒गा ये॑ **ऽ**न्तरि॒क्षभा॒गा ये॑ पृ॒थि॒विभा॒गाः ।

त इ॒मं य॒ज्ञम॑वन्तु॒ त इ॒दं क्षे॒त्रमा॑ वि॒शन्तु॒ त इ॒दं क्षे॒त्रम॑नु॒
वि वि॒शन्तु॒ ॥ 22

(य॒न्ति - दे॒वा - वि॒श॒तिश्च॑) (A8)

TS 2.4.9.1

मा॒रु॒तम॑सि॒ म॒रु॒ता॒मोज॑ इति॒ कृ॒ष्णं वा॑सः॒ कृ॒ष्णतू॑षं परि॒ धत्त॑ ए॒तद्-वै
वृ॒ष्ट्यै॑ रू॒पं स॑रू॒प ए॒व भू॒त्वा प॒र्जन्यं॑ व॒र्षय॑ति॒रम॑य॒त म॒रुतः॑
श्ये॒नमा॑यि॒नमि॑ति॒ पश्चा॑द्वा॒तं प्र॑ति॒ मी॒वति॑ पु॒रोवा॑तमे॒व ज॑नयति
व॒र्षस्या॑व॒रुद्ध्यै॑ वा॒तना॑मानि॒ जुहो॑ति वा॒युर्वै॑ वृ॒ष्ट्या ई॒शो वा॑युमे॒व
स्वेन॑ भा॒गधे॑ये॒नोप॑ धावति॒ स ए॒वास्मै॑ प॒र्जन्यं॑ व॒र्षय॑त्य॒ष्टौ- [] 23

TS 2.4.9.2

जुहो॑ति च॒तस्रो॑ वै दि॒शश्च॑त॒स्रो ऽवा॑न्तरदि॒शा दि॒ग्भ्य ए॒व वृ॒ष्टिं
सं प्र॑ च्यावयति॒ कृ॒ष्णाजि॑ने॒ सं यौ॑ति॒ ह॒विरे॒वाक॑रन्त॒र्वेदि॑ सं
यौ॒त्यव॑रुद्ध्यै॒ यती॑नाम॒द्यमा॑नानां॒ शी॒र्षाणि॑ प॒रा ऽप॑तन्ते॒ ख॒र्जूरा॑

अभवन् तेषां रस ऊर्ध्वो ऽपतत् तानि करीराण्यभवन्त् सौम्यानि
वै करीराणि सौम्या खलु वा आहुति दिवो वृष्टिं च्यावयति
यत्करीराणि भवन्ति – [] 24

TS 2.4.9.3

सौम्ययैवा ऽऽ*हुत्या दिवो वृष्टिमव रुन्धे मधुषा सं यौत्यपां वा एष
ओषधीनां रसो यन्मद्वद्भ्य एवौषधीभ्यो वर्षत्यथो अद्भ्य
एवौषधीभ्यो वृष्टिं नि नयति मान्दा वाशा इति सं यौति नामधेयैरेवैना
अच्छैत्यथो यथा ब्रूयादसा वेहीत्येवमेवैना नामधेयैरा – [] 25

TS 2.4.9.4

च्यावयति वृष्णो अश्वस्य सन्दानमसि वृष्ट्यै त्वोप नह्यामीत्याह
वृषा वा अश्वो वृषा पर्जन्यः कृष्ण इव खलु वै भूत्वा वर्षति
रूपेणैवैनं समर्द्धयति वर्षस्यावरुद्ध्यै ॥ 26

(अष्टौ – भवन्ति – नामधेयैरे – कान्नात्रिंशच्च) (A9)

TS 2.4.10.1

देवा वसव्या देवाः शर्मण्या देवाः सपीतय इत्या बद्धनाति
देवताभिरेवान्वहं वृष्टिमिच्छति यदि वर्षेत् तावत्येव होतव्यं यदि

न वर्॒षे॒च्छ्वो॑ भू॒ते ह॒विर्निर्व॑पेदहो॒रात्रे॑ वै मि॒त्रावरु॑णावहो॒रात्राभ्यां॑
खलु॑ वै पर्ज॒न्यो वर्॒षति॑ नक्तं॑ वा॒ हि दि॒वा वा॒ वर्॒षति॑ मि॒त्रावरु॑णावे॒व
स्वेन॑ भा॒गधे॒येनो॑प॒ धाव॑ति तावे॒वास्मा॑ – [] 27

TS 2.4.10.2

अहो॒रात्राभ्यां॑ पर्ज॒न्यं वर्॒षय॑तो ऽग्नये॑ धाम॒च्छदे॑ पु॒रोडा॑शम॒ष्टाक॑पालं
निर्व॑पेन्मा॒रुत॑ꣳ स॒प्तक॑पालꣳ सौ॒र्यमे॑क॒कपाल॑म॒ग्निर्वा॑ इ॒तो
वृष्टि॑मुदी॒रय॑ति म॒रुतः॑ सृ॒ष्टां न॑यन्ति यदा खलु॑ वा अ॒सावादि॒त्यो
न्यङ् र॒श्मिभिः॑ पर्या॒वर्त॑ते ऽथ॒वर्ष॑ति॒धाम॒च्छदि॒व खलु॑ वै भू॒त्वा
वर्ष॑त्ये॒ता वै दे॒वता॒ वृष्ट्या॑ ई॒शते॒ ता ए॒व स्वेन॑ भा॒गधे॒येनो॑प॒
धाव॑ति ता – [] 28

TS 2.4.10.3

ए॒वास्मै॑ पर्ज॒न्यं वर्॒षय॑न्त्यु॒तावर्षि॑ष्यन् वर्ष॑त्ये॒व सृ॒जा वृष्टिं॑ दि॒व
आ ऽद्भिः॑ स॒मुद्रं॑ पृ॒णेत्या॑हे॒माश्चै॒वामू॒श्वापः॑ स॒मर्द्ध॑य॒त्यथो॑ आ॒भिरे॒वा-
मूर॑च्छै॒त्यब्जा॑ अ॒सि प्र॑थम॒जा ब॑लम॒सि स॒मुद्रि॑य॒मित्या॑ह
यथा॑य॒जुरे॒वैतदु॑न्नं भय॑ पृथि॒वीमि॑ति वर्षा॒ह्वां जु॑होत्ये॒षा वा ()
ओष॑धी॒नां वृष्टि॑वनिस्त॒यैव॑ वृष्टि॒मा च्या॑वयति॒ ये दे॒वा दि॒विभा॑गा इति॑

कृ॒ष्णाजि॒नम॑व॒ धू॒नोती॑म॒ ए॒वास्मै॑ लो॒काः प्री॒ता अ॒भीष्टा॑ भवन्ति ॥ 29

(अ॒स्मै - धा॒वति॑ ता - वा - एक॑वि॒ंशति॑श्च) (A10)

TS 2.4.11.1

सर्वा॑णि छन्दा॒स्येत॑स्या-मिष्ट्या॑-म॒नूच्या॑नीत्याहु-स्त्रि॒ष्टुभो॑ वा
ए॒तद्वी॒र्यं य॑त् क॒कुदु॑ष्णिहा जग॑त्यै यदु॑ष्णिहक॒कुभा॑वन्वाह
तेनै॒व सर्वा॑णि छन्दा॒स्येव॑ रुन्धे गाय॑त्री वा ए॒षा यदु॑ष्णिहा
यानि॑ च॒त्वार्य॑द्ध्यक्षराणि चतु॑ष्पाद ए॒व ते प॒शवो॑यथा पुरो॒डाशो॑
पुरो॒डाशो॑ ऽद्ध्ये॒वमे॒व तद्-यद्-ऋ॒च्यद्ध्य॑क्षराणि
यज्जग॑त्या - [] 30

TS 2.4.11.2

परि॑द॒ध्याद॑न्तं य॒ज्ञं ग॑मयेत् त्रि॒ष्टुभा॑ परि॑ दधातीन्द्रि॒यं वै वी॒र्यं
त्रि॒ष्टुगिन्द्रि॒य ए॒व वी॒र्यं य॒ज्ञं प्र॑ति ष्ठापयति॒ नान्तं॑ गमयत्यग्ने
त्री ते॒ वाजि॑ना त्री ष॒धस्थे॑ति त्रि॒वत्या॑ परि॑ दधाति स॒रूप॑त्वाय
सर्वो॑ वा ए॒ष य॒ज्ञो यत् त्रै॑धात॒वीयं॑ का॒माय॑का॒माय॑ प्र यु॒ज्यते
सर्वे॑भ्यो॒ हि का॒मेभ्यो॑ य॒ज्ञः प्र॑यु॒ज्यते॑ त्रै॒धात॒वीये॑न यजेताभि॒चर॑न्थ्
सर्वो॑ वा- [] 31

TS 2.4.11.3

ए॒ष य॒ज्ञो यत् त्रै॑धा॒तवी॒यꣳ स॒र्वेणै॒वैनं॑ य॒ज्ञेना॒भि च॑रति स्तृ॒णुत॑
 ए॒वैन॑मे॒तयै॒व य॑जेताभिच॒र्यमा॑णः स॒र्वो वा ए॒ष य॒ज्ञो यत् त्रै॑धा॒तवी॒यꣳ
 स॒र्वेणै॒व य॒ज्ञेन॑ यज॒ते नैन॑मभिच॒रन्थ् स्तृ॒णुत॑ ए॒तयै॒व य॑जेत स॒हस्रे॑ण
 य॒क्ष्यमा॑णः प्रजा॑तमे॒वैनद्-द॑दात्ये॒तयै॒व य॑जेत स॒हस्रे॑णेजा॒नो ऽन्तं॑ वा
 ए॒ष प॒शूनां॑ गच्छति - [] 32

TS 2.4.11.4

यः स॒हस्रे॑ण यज॒ते प्र॒जाप॑तिः खलु॒ वै प॒शून॑सृजत ताꣳ स्त्रै॑धा॒त
 वी॒ये-नै॒वासृ॑जत य ए॒वं वि॒द्वाꣳ स्त्रै॑धा॒तवी॒येन॑प॒शुकामो॑ यज॒ते
 यस्मा॑दे॒व यो॒नैः प्र॒जाप॑तिः प॒शून॑सृजत तस्मा॑दे॒वैनान्थ् सृ॑जत
 उपै॑नमु॒त्तरꣳ स॒हस्रं॑ नमति दे॒वता॑भ्यो वा ए॒ष आ वृ॑श्च्यते यो य॒क्ष्य
 इत्यु॑क्त्वा न यज॒ते त्रै॑धा॒तवी॒येन॑ यजेत स॒र्वो वा ए॒ष य॒ज्ञो - [] 33

TS 2.4.11.5

यत् त्रै॑धा॒तवी॒यꣳ स॒र्वेणै॒व य॒ज्ञेन॑ यज॒ते न दे॒वता॑भ्य आ वृ॑श्च्यते
 द्वा॒दश॑कपालः पुरो॒डाशो॑ भवति ते त्रयश्चतु॑ष्कपाला-स्त्रि॒ष्वमृ॑द्धत्वाय
 त्रयः पुरो॒डाशा॑ भवन्ति त्रय॑ इ॒मे लो॒का ए॒षां लो॒काना॑माप्त्या

उत्तर॑उत्तरो॑ ज्या॒यान् भव॑त्ये॒वमि॒व ही॒मे लो॒का य॒वम॒यो म॒द्ध्य ए॒तद्-वा
अ॒न्तरि॑क्षस्य रू॒पꣳ स॒मृद्ध्यै॑ स॒र्वेषा॑मभि॒गम॑यन्न॒व द्य॒त्यछं॑बट्कारꣳ
हि॒रण्यं द॑दाति तेज॑ ए॒वा - [] 34

TS 2.4.11.6

ऽव॑ रु॒न्धे ता॒र्प्यं द॑दाति प॒शूने॒वाव रु॒न्धे धे॒नुं द॑दात्याशिष॑
ए॒वाव रु॒न्धे सा॒म्नो वा ए॒ष वर्णो॑ यद्वि॒रण्यं य॑जुषां ता॒र्प्यमु॑क्थाम॒दानां॑
धे॒नुरे॒ताने॒व स॒र्वान् वर्णा॑न॒व रु॒न्धे ॥ 35

(जग॑त्या - ऽभि॒चर॑न्त् स॒र्वो वै - ग॑च्छति - य॒ज्ञ - स्तेज॑ ए॒व -
त्रि॑ꣳश॒च्च) (A11)

TS 2.4.12.1

त्व॒ष्टा ह॒तपु॒त्रो वी॒न्द्रꣳ सोम॑मा ऽह॒रत् तस्मि॒न्निन्द्र॑ उप॒हव॑मैच्छत॑
तं नोपा॑ह्वयत पु॒त्रं मे ऽव॑धीरिति स य॒ज्ञवेश॑सं कृ॒त्वा प्रा॒सहा
सोम॑मपिबत् तस्य यद॒त्यशि॑ष्यत॒ तत् त्व॒ष्टा ऽऽह॑वनीयमुप प्राव॑र्तयथ्
स्वाहे॑न्द्रशत्रुर्व॒र्द्धस्वे॒ति स याव॑दूर्द्ध्वः प॒रावि॑द्ध्यति॒ ताव॑ति स्व॒यमे॒व
व्य॑रमत॒ यदि॑ वा तावत् प्र॒वण - [] 36

TS 2.4.12.2

–मासीद्–यदि वा तावदध्यग्नेरासीत् स संभवन्नग्नीषोमावभि
समभवत् स इषुमात्रमिषुमात्रं विष्वङ्मुवर्द्धत स इमान्
लोकानवृणोद्–यदिमान् लोकानवृणोत् तद्–वृत्रस्य
वृत्रत्वं तस्मादिन्द्रो ऽबिभेदपि त्वष्टा तस्मै त्वष्टा वज्रमसिञ्चत् तपो
वै स वज्र आसीत् तमुद्यन्तुं नाशक्नोदथ वै तर्हि विष्णु – [] 37

TS 2.4.12.3

–रन्या देवता ऽऽसीत् सौ ऽब्रवीद्–विष्णवेहीदमा हरिष्यावो
येनायमिदमितिस विष्णुस्त्रेधा ऽऽत्मानं विन्यधत्त पृथिव्यां
तृतीयमन्तरिक्षे तृतीयं दिवि तृतीय–मभिपर्यावर्तादध्यबिभेद्–यत्–
पृथिव्यां तृतीयमासीत् तेनेन्द्रो वज्रमुदयच्छद्–विष्वनुस्थितः
सौ ऽब्रवीन्मा मे प्र हा–रस्ति वा इदं – [] 38

TS 2.4.12.4

मयि वीर्यं तत् ते प्र दास्यामीति तदस्मै प्रायच्छत् तत् प्रत्यगृह्णादधा
मेति तद्–विष्णवे ऽति प्रायच्छत् तद्–विष्णुः प्रत्यगृह्णा–दस्मास्विन्द्र

इन्द्रियं दधात्विति यदन्तरिक्षे तृतीयमासीत् तेनेन्द्रो वज्रमुदयच्छद्-
विष्ण्वनुस्थितः सो ऽब्रवीन्मा मे प्र हारस्ति वा इदं - [] 39

TS 2.4.12.5

मयि वीर्यं तत् ते प्र दास्यामीति तदस्मै प्रायच्छत् तत् प्रत्यगृह्णाद् द्विर्मा
ऽधा इति तद्-विष्णवे ऽति प्रायच्छत् तद्-विष्णुः
प्रत्यगृह्णादस्मास्विन्द्र इन्द्रियं दधात्विति यद्-दिवि तृतीयमासीत्
तेनेन्द्रो वज्रमुदयच्छद्-विष्ण्वनुस्थितः सो ऽब्रवीन्मा मे
प्र हार्येनाह - [] 40

TS 2.4.12.6

-मिदमस्मि तत् ते प्र दास्यामीति त्वी(3) इत्यब्रवीथ् सन्धां तु
सं दधावहै त्वामेव प्रविशानीति यन्मां प्रविशेः किं मा भुञ्ज्या
इत्यब्रवीत् त्वामेवेन्धीय तव भोगाय त्वां प्रविशेयमित्यब्रवीत् तं वृत्रः
प्राविशदुदरं वै वृत्रः क्षुत् खलु वै मनुष्यस्य भ्रातृव्यो य - [] 41

TS 2.4.12.7

एवं वेद हन्ति क्षुधं भ्रातृव्यं तदस्मै प्रायच्छत्तत् प्रत्यगृह्णात्-
त्रिर्मा ऽधा इति तद्-विष्णवे ऽति प्रायच्छत् तद्-विष्णुः

प्रत्य॑गृ॒ह्णाद॒स्मास्वि॑न्द्र इन्द्रि॒यं दधा॑त्विति॒ यत् त्रिः॑ प्राय॑च्छत् त्रिः
 प्रत्य॑गृ॒ह्णात् तत् त्रि॒धातो॑स्त्रि॒धातु॑त्वं यद्-विष्णु॑रन्वतिष्ठत् विष्ण॑वे ऽति
 प्राय॑च्छत् तस्मा॑दैन्द्रा॒वैष्ण॑व॒ हवि॑र्भवति () यद्-वा इ॒दं किञ्च॑
 तदस्मै॑ तत् प्राय॑च्छद् ऋचः॑ सामा॑नि यजू॑षि स॒हस्रं॑ वा अस्मै॑ तत्
 प्राय॑च्छत् तस्मा॑त् स॒हस्र॑दक्षिणं ॥ 42

(प्र॒वणं॑ - वि॒ष्णु- वा॑ इ॒द- मि॒द - म॒हं - यो॑ - भ॒व -
 त्ये॒कवि॑शतिश्च) (A12)

TS 2.4.13.1

दे॒वा वै रा॒ज॒न्या-ज्जा॑यमा॒ना-द॒बिभ॑यु-स्तम॒न्तरे॑व सन्तं॒ दाम्ना॑
 ऽपो॑म्भन्थ॒ स वा ए॒षो ऽपो॑ब्धो जा॒यते॑ यद्-रा॒ज॒न्यो यद्वा ए॒षो
 ऽन॑पोब्धो जा॒येत॑ वृ॒त्रान् घ्न॑ श्र॒रेद्-यं का॒मये॑त रा॒ज॒न्य-म॒नपो॑ब्धो
 जा॒येत॑ वृ॒त्रान् घ्न॑ श्र॒रेदिति॑ तस्मा॑ ए॒तमै॑न्द्रा॒बार्ह॑स्पत्यं च॒रुं
 निर्व॑पेदैन्द्रो वै रा॒ज॒न्यो ब्र॒ह्म बृ॒ह॒स्पति॑ ब्र॒ह्मणै॑वैनं () दाम्नो॑
 ऽपो॑म्भनान् मुञ्चति॒ हिर॑ण्म॒यं दाम॑ दक्षि॒णा सा॒क्षादे॒वैनं॑ दाम्नो॑
 ऽपो॑म्भनान् मुञ्चति ॥ 43 (ए॒नं - द्वा॒दश॑ च) (A13)

TS 2.4.14.1

न॒वो॒नवो॑ भ॒वति॑ जा॒यमा॒नो ऽह्नां॑ के॒तुरु॒षसा॑मे॒त्यग्रे॑ ।
 भा॒गं दे॒वेभ्यो॑ वि द॒धात्या॒यन् प्र च॒न्द्रमा॑स्तिरति दी॒र्घमा॒युः ॥
 यमा॑दि॒त्या अ॒शुमा॑प्याय॒यन्ति॑ यम॒क्षित॑-म॒क्षित॒यः पिब॑न्ति ।
 तेन॑ नो॒ राजा॒ वरु॑णो बृह॒स्पति॑रा प्याय॒यन्तु भुव॑नस्य गो॒पाः ॥
 प्रा॒च्यां दिशि॑ त्वमिन्द्रा॒सि राजो॒तोदी॑च्यां वृ॒त्रहन्॑ वृ॒त्रहा॒ ऽसि॑ ।
 यत्र॑ यन्ति स्रो॒त्यास्त - [] 44

TS 2.4.14.2

-ज्जितं॑ ते दक्षि॒णतो॑ वृ॒षभ॑ ए॒धि ह॒व्यः ॥
 इन्द्रो॑ जयाति न परा जयाता अधि॒राजो॑ राज॒सु राज॑याति ।
 विश्वा॒ हि भू॒याः पृ॒तना॑ अभि॒ष्टीरु॑प॒सद्यो॑ नम॒स्यो यथा॑ ऽसत् ॥
 अ॒स्येदे॒व प्र रि॑रिचे म॒हित्वं दि॒वः पृ॒थिव्याः॑ पर्य॒न्तरि॑क्षात् ।
 स्व॒राडिन्द्रो॑ दम॒ आ वि॒श्वगूर्तः॑ स्व॒रिरम॑त्रो ववक्षे र॒णाय॑ ॥
 अ॒भि त्वा॑ शूर नो॒नुमो॑ ऽदुग्धा इव धे॒नवः॑ ।
 ई॒शान- [] 45

TS 2.4.14.3

–म॒स्य जग॑तः सु॒वर्द॑शमी॒शान॑मिन्द्र तस्थुषः ॥
 त्वामि॑द्धि ह॒वामहे॑ सा॒ता वाज॑स्य का॒रवः॑ ।
 त्वां वृ॑त्रेष्विन्द्र स॒त्यतिं॑ न॒रस्त्वां॑ का॒ष्ठास्व॑र्वतः ॥
 यद्द्या॑व॒इन्द्र॑तेश॒तः श॒तं भूमी॑रुत स्युः ।
 न त्वा॑ वज्रि॒न्थ सह॑स्रः सूर्या॑ अनु न जा॒तम॑ष्ट रोद॑सी ॥
पिबा॑ सोम॑मिन्द्र म॒न्दतु॑ त्वा य॒न्ते सु॒षाव॑ ह॒र्यश्चा॑द्रिः । 46

TS 2.4.14.4

सो॒तुर्बा॒हुभ्या॑ सु॒यतो॑ ना॒र्वा ॥
 रेव॑तीर्नः स॒धमा॑द इ॒न्द्रे स॑न्तु तु॒विवा॑जाः ।
 क्षु॒मन्तो॑ याभि॒र्मदे॑म ॥
 उद॑ग्ने शु॒चय॑स्तव>¹, वि ज्यो॒तिषो॑>², दु॒ त्यं जा॒तवे॑दस>³
 स॒प्त त्वा॑ ह॒रितो॑ रथे॒ वह॑न्ति दे॒व सूर्य॑ ।
 शो॒चिष्के॑शं वि॒चक्ष॑ण ॥
 चि॒त्रं दे॒वाना॑मु॒दगा॑दनी॒कं चक्षु॑र्मि॒त्रस्य॑ वरु॒णस्या॑ग्नेः ।

आ ऽप्रा द्यावा॑पृथि॒वी अ॒न्तरि॑क्ष॒ञ्च॑ सूर्य॑ आ॒त्मा

जग॑तस्त॒स्थुष॑ - [] 47

TS 2.4.14.5

श्च ॥

वि॒श्वे दे॒वा ऋ॑ता॒वृध॑ ऋ॒तुभि॑र् ह॒वन् श्रु॑तः ।

जु॒षन्तां॑ यु॒ज्यं प॑यः ॥

वि॒श्वे दे॒वाः शृ॑णु॒तेम॑ ह॒वं मे॒ ये अ॒न्तरि॑क्षे॒ य उप॑ द्य॒वि ष्ट॑ ।

ये अ॒ग्नि॑जि॒ह्वा उ॒त वा॒ यज॑त्रा आ॒सद्या॑स्मिन् ब॒र्हिषि॑

मा॒दय॑द्ध्वं ॥ 48

(त - दी॒शा॒न - म॒द्रि - स्त॒स्थुष॑ - स्त्रि॒ञ्च॑) (A14)

Prasna Korvai with starting Padams of 1 to 14 Anuvaakams :-

(दे॒वा म॒नु॒ष्या॑ – दे॒वसु॒रा अ॒ब्रुवन् – दे॒वासु॒रास्तेषां॑ गाय॒त्री –
प्र॒जाप॑ति॒स्ता यत्रा॑ – ग॒ने गो॒भिः॑ – श्रि॒त्रया॑ – मा॒रुतं॑ – दे॒वा वस॑व्या
अ॒ग्ने – मा॒रुत॑मि॒ति – दे॒वा वस॑व्या दे॒वाः शर्म॑ण्याः – सर्वा॑णि –
त्वष्टा॑ ह॒तपु॑त्रो – दे॒वा वै रा॑ज॒न्यान् – नवो॑नव – श्रु॒तुर्दश॑)

Korvai with starting Padams of 1, 11, 21 Series of Panchaatis :-

(दे॒वा म॒नु॒ष्याः॑ – प्र॒जां प॒शुन् – दे॒वा वस॑व्याः – परि॒द॒ध्यादि॒द-
मस्म्य॑ – ष्टा च॑त्वारि॒ंशत्)

First and Last Padam of Fourth Prasnam of Kanda 2:-

(दे॒वा म॒नु॒ष्या॑ – मा॒दय॑द्ध्वं)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां द्वितीयकाण्डे चतुर्थः प्रश्नः समाप्तः ॥

=====

2.4.1 Appendix

2.4.14.4 – उ॒द॒ग्ने॑ शु॒च॒य॒स्त॒व॑> 1

उ॒द॒ग्ने॑ शु॒च॒य॒स्त॒व॑ शु॒क्रा॑ भ्राजन्त ई॒र॒ते । त॒व॒ ज्योती॑ ऽ॒प्य॒र्च॒यः॑ ॥

(Appearing in TS-1.3.14.8)

2.4.14.4– वि॒ज्यो॒ति॒षो॑> 2 ,

वि॒ ज्यो॒ति॒षा॑ बृ॒ह॒ता॑ भा॒त्य॒ग्नि॒रा॒वि॒ वि॒श्वानि॑ कृ॒णु॒ते॑ म॒हि॒त्वा ।
प्रा॒दे॒वी॒ मा॒याः॑ स॒ह॒ते॑-दु॒रे॒वाः॑ शि॒शी॒ते॑ शृ॒ङ्गे॑ र॒क्ष॒से॑ वि॒नि॒क्षे॑ ॥

(Appearing in TS-1.2.14.7)

2.4.14.4 – दु॒त्यं॑ जा॒त॒वे॒द॒स॒ः॑> 3

उ॒दु॒ त्यं॑ जा॒त॒वे॒द॒सं॑ दे॒वं॑ वँ॒ह॒न्ति॑ के॒त॒वः॑ ।

दृ॒शे॑ वि॒श्वा॒य॒ सूर्यं॑ ॥ (Appearing in- TS 1.4.43.1)

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

2.5 द्वितीयकाण्डे पञ्चमः प्रश्नः – इष्टिविधानं

TS 2.5.1.1

वि॒श्वरूपो॑ वै त्वाष्ट्रः॑ पु॒रोहि॑तो दे॒वाना॑मासी॒त् स्व॒स्रीयो॑ऽसुराणां॑
तस्य॑ त्रीणि॑ शी॒र्षा॒ण्यास॑न्थ्-सोम॒पान॑ꣳ सु॒रा॒पान॑-म॒न्नाद॑नꣳ
स प्र॒त्यक्षं॑ दे॒वेभ्यो॑ भा॒गम॑वदत् प॒रोक्ष॑मसुरेभ्यः॑ सर्व॑स्मै वै प्र॒त्यक्षं॑
भा॒गं व॑दन्ति यस्मा॑ ए॒व प॒रोक्षं॑ व॑दन्ति तस्य॑ भा॒ग उ॑दित-
स्तस्मा॑दिन्द्रो॑ ऽबि॒भेदी॑दृङ् वै रा॒ष्ट्रं वि॑ प॒र्याव॑र्तयतीति॑ तस्य॑ वज्र॑मा॒दाय॑
शी॒र्षा॒ण्यच्छि॑नद्-यथ् सोम॒पान॑ - [] 1

TS 2.5.1.2

-मासी॒त् स क॒पिज्ज॑लो ऽभ॒वद् यथ् सु॒रा॒पान॑ꣳ स क॒लवि॑ङ्को
यद॒न्नाद॑नꣳ स ति॒त्तिरि॒स्तस्या॑ज्ज॒लिना॑ ब्रह्म॒हत्या॑मुपागृह्णात् ताꣳ
सँव॑त्सरम॒बिभ॑स्तं भू॒तान्य॑भ्यक्रोशन् ब्रह्म॒हन्नि॑ति स
पृ॒थि॒वीमु॑पासीददस्यै॑ ब्रह्म॒हत्या॑यै तृ॒तीयं॑ प्रति॑ गृहा॒णेति॑ सा ऽब्र॑वीद्-वरं॑
वृ॒णै खा॒तात् प॑राभविष्यन्ती॑ मन्ये॒ ततो॑ मा प॒रा भू॑वमि॒तिपु॑रा ते-[] 2

TS 2.5.1.3

सँव॑थ्स॒राद॑पि॒ रो॒हा॒दि॒त्य॑ब्र॒वीत् तस्मा॑त् पु॒रा सँव॑थ्स॒रात् पृ॒थि॒व्यै
खा॒तम॑पि॒ रो॒हा॒ति॒ वारे॑वृ॒त॒ ह्य॒स्यै तृ॒तीयं॑ ब्र॒ह्म॒ह॒त्यायै॑ प्र॒त्य॒गृ॒ह्णात्
तथ् स्व॑कृ॒त-मि॑रिण-मभ॒वत् तस्मा॑दाहि॒ताग्निः॑ श्र॒द्धादे॑वः स्व॑कृ॒त
इ॒रिणे॑ ना॒व स्येद्-ब्र॒ह्म॒ह॒त्यायै॑ ह्येष॒ वर्णः॑ स वन॒स्पती॑नुपासीद॒दस्यै॑
ब्र॒ह्म॒ह॒त्यायै॑ तृ॒तीयं॑ प्र॒ति गृ॒ह्णी॒तेति॑ तेऽब्रु॒वन् वरं॑ वृ॒णाम॑है

वृ॒क्णात् - [] 3

TS 2.5.1.4

परा॑भवि॒ष्यन्तो॑ म॒न्याम॑हे ततो॒ मा परा॑ भू॒मे॒त्या॒व्रश्च॑ना॒द्वो भू॒याँस
उत्ति॑ष्ठानि॒त्यब्र॒वीत् तस्मा॑दा॒व्रश्च॑नाद्-वृ॒क्षाणां॑ भू॒याँस उत्ति॑ष्ठन्ति
वा॒रेवृ॒त॒ ह्येषां॑ तृ॒तीयं॑ ब्र॒ह्म॒ह॒त्यायै॑ प्र॒त्य॒गृ॒ण॒हन्त्स॑ निर्या॒सो ऽभ॑वत्
तस्मा॑न्निर्या॒सस्य॑ नाऽऽश्र॑यं ब्र॒ह्म॒ह॒त्यायै॑ ह्येष॒ वर्णोऽथो॑ खलु॒ य ए॒व
लो॒हितो॑ यो वा ऽऽव्रश्च॑नान्निर्ये॒षति॑ तस्य॒ नाऽऽश्र॑यं - [] 4

TS 2.5.1.5

का॒म-म॒न्यस्य॑स॒स्त्रीष॑ँसा॒द-मु॒पासी॑द॒दस्यै॑ ब्र॒ह्म॒ह॒त्यायै॑ तृ॒तीयं॑
प्र॒ति गृ॒ह्णी॒तेति॑ ता अ॒ब्रुव॑न् वरं॑ वृ॒णाम॑हा ऋ॒त्वि॒यात् प्र॒जां वि॑न्दाम॒है

काम॒मा वि॒जनि॒तोः सं भ॒वामे॒ति तस्मा॒दृत्वि॒याथ् स्त्रि॒यः प्र॒जां
 वि॒न्दन्ते॒ काम॒मा वि॒जनि॒तोः सं भ॒वन्ति॒ वारे॑वृ॒त॒ ह्यासां॒ तृती॑यं
 ब्रह्म॒हत्या॑यै प्रत्य॒गृह्ण॑न्थ् सा मल॒वद्वा॒सा अ॒भवत् तस्मा॒न्-
 मल॒वद्वा॒ससा॒ न सँ॑वदे॒त - [] 5

TS 2.5.1.6

न स॒हाऽऽसी॒त ना॒स्या अ॒न्नम॑द्याद्-ब्रह्म॒हत्या॑यै ह्येषा॒ वर्णं॑ प्र॒तिमु॒च्या
 ऽऽस्ते॒ऽथो ख॒ल्वाहु॑रभ्यञ्ज॒नं वा॒व स्त्रि॒या अ॒न्नम॑भ्यञ्ज॒नमे॒व न
 प्र॒तिगृ॑ह्यं काम॒मन्य॑दिति॒ यां मल॒वद्वा॒सस॑ सं॒भवन्ति॒ यस्ततो॒ जाय॑ते
 सोऽभि॑शस्तो॒ याम॑रण्ये॒ तस्यै॑ स्ते॒नो यां प॑रा॒चीं तस्यै॑
 ही॒तमु॒ख्यप॑गल्भो॒ या स्ना॑ति॒ तस्या॑ अ॒प्सु मा॒रुको॒ या - [] 6

TS 2.5.1.7

ऽभ्य॒ङ्गे तस्यै॑ दु॒श्च॒र्मा या प्र॑लि॒खते॒ तस्यै॑ खल॒तिर॑पमा॒री या ऽङ्गे॑ तस्यै॑
 का॒णो या द॒तो धा॑वते॒ तस्यै॑ श्या॒वद॑न् या न॒खानि॑ नि॒कृ॒न्तते॒ तस्यै॑
 कु॒न॒खी या कृ॑ण॒त्ति तस्यै॑ क्ली॒बो या रज्जु॑ सृ॒जति॒ तस्या॑
 उ॒द्ब॒न्धु॒को या प॑र्णे॒न पि॑बति॒ तस्या॑ उ॒न्मा॒दु॒को या ख॒र्वेण॑ पि॑बति॒

तस्यै॑ खर्व॑स्ति॒स्रो रात्री॑र्व्र॒तं चरे॑दञ्जलि॒ना वा पिबे॑दखर्वे॒ण वा ()

पात्रे॑ण प्र॒जायै॑ गोपी॒थाय॑ ॥ 7

(यथ् सोम॑पानं॑ – ते – वृ॒क्षणात् – तस्य॑ नाश॑यं – वैदे॒त – मारु॑को
या – ऽखर्वे॑ण वा – त्रीणि॑ च) (A1)

TS 2.5.2.1

त्वष्टा॑ ह॒तपु॒त्रो वी॒न्द्रो॑ सोम॒माऽह॑रत् तस्मि॒न्निन्द्र॑ उपह॒वमै॑च्छत
तं नोपा॑ह्वयत पु॒त्रं मेऽव॑धीरिति॒ स यज्ञ॑वेश॒सं कृ॒त्वा प्रा॒सहा
सोम॑मपिबत् तस्य॒ यद॒त्यशि॑ष्यत॒ तत् त्वष्टा॑ ऽऽह॒वनी॑यमुप
प्राव॑र्तयथ् स्वाहे॑न्द्रशत्रु॒-वर्द्ध॑स्वेति॒ यदव॑र्तयत् तद्-वृ॒त्रस्य॑ वृ॒त्रत्वं
यदब्र॑वीथ् स्वाहे॑न्द्रशत्रु॒-वर्द्ध॑स्वेति॒ तस्मा॑दस्ये- [] 8

TS 2.5.2.2

-न्द्रः॑ शत्रु॒रभव॑थ् स संभव॑न्नग्नीषोमा॒वभि॑ समभव॑थ् स
इषु॑मा॒त्रमिषु॑मा॒त्रं विष्व॑ङ्गुवर्द्धत॒ स इ॒मान् लो॒कान॑वृ॒णोद्-यदि॑मान्
लो॒कान॑वृ॒णोत् तद्-वृ॒त्रस्य॑ वृ॒त्रत्वं तस्मा॑दिन्द्रोऽबि॒भेथ् स
प्र॒जाप॑तिमुपा॒धाव-च्छ॑त्रुर्मेऽ ज॒नीति॑ तस्मै॒ वज्र॑ सिक्त्वा
प्राय॑च्छदे॒तेन॑ ज॒हीति॑ तेना॒भ्याय॑त॒ ताव॑ब्रूतामग्नीषोमौ मा - [] 9

TS 2.5.2.3

प्र हा-रावमन्तः स्व इति मम वै युव७स्थ इत्यब्रवीन् मामभ्येतमिति
 तौ भागधेयमैच्छेतां ताभ्या-मेतमग्नीषोमीय-मेकादशकपालं
 पूर्णमासे प्रायच्छत् तावब्रूतामभि सन्दष्टौ वै स्वो न शक्नुव ऐतुमिति
 स इन्द्र आत्मनः शीतरूरावजनयत् तच्छीतरूरयोर्जन्म य एव७
 शीतरूरयोर्जन्म वेद - [] 10

TS 2.5.2.4

नैन७ शीतरूरौ हत-स्ताभ्यामेनमभ्यनयत् तस्मा-
 ज्जज्जभ्यमानादग्नीषोमौ निरक्रामतां प्राणापानौ वा एनं तदजहितां
 प्राणो वै दक्षोऽपानः क्रतुस्तस्मा-ज्जज्जभ्यमानो ब्रूयान्मयि दक्षक्रतू
 इति प्राणापानावेवाऽऽत्मन् धत्ते सर्वमायुरेति स देवता
 वृत्रान् निर्हूय वार्त्रघ्न७ हविः पूर्णमासे निरवपद् घ्नन्ति वा एनं
 पूर्णमास आ - [] 11

TS 2.5.2.5

ऽमावास्यायां प्याययन्ति तस्माद्-वार्त्रघ्नी पूर्णमासे ऽनूच्येते
 वृधन्वती अमावास्यायां तथ् स७स्थाप्य वार्त्रघ्न७ हविर्वज्रमादाय

पुनर॒भ्याय॑त ते अ॒ब्रूतां॑ द्यावापृ॒थिवी॑ मा प्र हा-रावयोर्वै श्रित॑ इति॒ ते
अ॒ब्रूतां॑ वरं॑ वृ॒णाव॑है नक्ष॒त्रवि॑हिता-ऽहम॒सानी॒त्यसा॒वब्र॑वी-
च्चि॒त्रवि॑हिता- ऽहमिती॒यं तस्मा॒न्नक्ष॑त्रविहिताऽसौ चि॒त्रवि॑हिते॒यं
य॑ एवं द्यावापृ॒थिव्योर् - [] 12

TS 2.5.2.6

वरं॑ वेदै॒नं व॑रो गच्छति॒ स आ॒भ्यामे॒व प्र॒सूत॑ इन्द्रो वृ॒त्रम॑हन् ते
दे॒वा वृ॒त्रं ह॒त्वाऽग्नी॑षोमावब्रुवन्. ह॒व्यं नो॑ वह॒तमि॒ति
ताव॑ब्रूतामप॒तेज॑सौ वै त्यौ वृ॒त्रे वै त्यो॒स्तेज॑ इति॒ तेऽब्रु॑वन् क
इ॒दम॑च्छैतीति॒ गौरि॑त्यब्रुवन् गौर्वा॒व सर्व॑स्य मि॒त्रमि॒ति
साऽब्र॑वीद् - [] 13

TS 2.5.2.7

वरं॑ वृ॒णौ म॒य्ये॒व स॒तोभ॑येन भुन॒जाध्वा॑ इति॒ तद्-गौ॑राऽह॒रत्
तस्मा॑द्-गवि॒ स॒तोभ॑येन भुञ्जत ए॒तद्वा अ॒ग्नेस्ते॑जो यद् घृ॒तमे॒तत्
सोम॑स्य॒ यत् प॒यो य॒ ए॒वम॒ग्नीषो॑मयो स्तेजो वेद॑ तेज॒स्व्ये॒व भ॑वति
ब्र॒ह्मवा॒दिनो॑ वदन्ति कि॒न्दे॒वत्यं॑ पौर्ण॒मास॑मिति॒ प्राजा॑प॒त्यमि॒ति ब्रू॑यात्

तेनेन्द्रं ज्येष्ठं पुत्रं निरवासाययदिति तस्मा- () -ज्येष्ठं पुत्रं
धनेन निरवासाययन्ति ॥ 14

(अस्य - मा - वेदा - द्यावापृथिव्यो - रब्रवी -
दिति तस्मा - चत्वारि च) (A2)

TS 2.5.3.1

इन्द्रं वृत्रं जघ्निवाꣳसं मृधोऽभि प्रावेपन्त स एतं वैमृधं
पूर्णमासेऽनुनिर्वाप्यमपश्यत् तं निरवपत् तेन वै स मृधोऽपाहत
यद्-वैमृधः पूर्णमासेऽनुनिर्वाप्यो भवति मृध एव तेन यजमानो
ऽप हत इन्द्रो वृत्रꣳ हत्वा देवताभिश्चेन्द्रियेण च व्यार्द्धयत् स
एतमाग्नेय-मष्टाकपाल-ममावास्याया-मपश्यदैन्द्रं दधि - [] 15

TS 2.5.3.2

तं निरवपत् तेन वै स देवताश्चेन्द्रियं चावारुन्धयदाग्नेयो ऽष्टाकपालो
ऽमावास्यायां भवत्यैन्द्रं दधि देवताश्चैव तेनेन्द्रियं च यजमानोऽव
रुन्ध इन्द्रस्य वृत्रं जघ्नुष इन्द्रियं वीर्यं पृथिवीमनु व्यार्च्छत्
तदोषधयो वीरुधोऽभवन्त्स प्रजापतिमुपाधावद्-वृत्रं मे जघ्नुष
इन्द्रियं वीर्यं - [] 16

TS 2.5.3.3

पृथि॒वीम॒नु व्या॒रत् तदोष॑धयो वी॒रुधो॑ऽभूव॒न्निति॑ स प्र॒जाप॑तिः
 प॒शून्ब्र॑वीदे॒तदस्मै॑ सं न॒यते॑ति॒ तत् प॒शव॑ ओष॒धीभ्यो॑ ऽध्या॒त्मन्थ्
 स॒मन॑यन् तत् प्र॒त्यदु॒हन् यथ् स॒मन॑यन् तथ् सां॑ ना॒य्यस्य॑ सां॒नाय्य॑त्वं
 यत् प्र॒त्यदु॒हन् तत् प्र॑ति॒धुषः॑ प्र॒तिधु॑क्त्व॒ञ् सम॑नैषुः प्र॒त्यधु॑क्षन्
 न तु म॒यि श्र॑यत॒ इत्य॑ब्रवीदे॒तदस्मै॑ – [] 17

TS 2.5.3.4

शृ॒तं कुरु॑तेत्य॒ब्रवी॒त् तदस्मै॑ शृ॒त-म॑कुर्व॒न्निन्द्रि॑यं वा॒वास्मि॑न् वी॒र्यं॑
 तद॒श्रय॑न् तच्छृ॒तस्य॑ शृ॒तत्व॑ञ् सम॑नैषुः प्र॒त्यधु॑क्षञ्छृ॒तम॑क्रन् न तु मा
 धि॒नोती॑त्य॒ब्रवीदे॒तदस्मै॑ दधि॑ कुरु॑तेत्य॒ब्रवी॒त् तदस्मै॑ द॒द्ध्यकु॑र्वन्
 तदे॒नम॑धि॒नोत् तद्-द॒ध्नो द॑धित्वं ब्र॒ह्मवा॑दि॒नो वद॑न्ति द॒ध्नः
 पूर्॒वस्या॑व॒देयं॑ – [] 18

TS 2.5.3.5

दधि॑ हि पूर्॒वं क्रि॒यत॒ इत्य॑नादृत्य॒ तच्छृ॒तस्यै॒व पूर्॒वस्या॑व
 द्येदिन्द्रि॒यमे॒वास्मि॑न् वी॒र्यञ् श्रि॒त्वा द॒ध्नोप॑रि॒ष्टाद्धि॑नोति॒ यथा॑पूर्॒वमु॑पैति॒
 यत् पू॒तीकै॑र्वा पर्ण॑वल्कै॒र्वा ऽऽत॑ञ्ज्याथ् सौ॒म्यं तद्-यत् क्व॑लै राक्ष॒सं

तद्-यत् तण्डुलैर्वैश्वदेवं तद्-यदातञ्चनेन मानुषं तद्-यद्-दद्धना
तथ् सेन्द्रं दद्धना ऽऽ तनक्ति - [] 19

TS 2.5.3.6

सेन्द्रत्वाया-ग्निहोत्रोच्छेषण-मभ्यातनक्ति यज्ञस्य सन्तत्या इन्द्रो
वृत्रं हत्वा परां परावत-मगच्छ-दपाराधमिति मन्यमानस्तं देवताः
प्रैषमैच्छन्त्सौऽब्रवीत् प्रजापतिर्यः प्रथमोऽनुविन्दति तस्य प्रथमं
भागधेयमिति तं पितरोऽन्वविन्दन् तस्मात् पितृभ्यः पूर्वेद्युः क्रियते
सोऽमावास्यां प्रत्याऽऽ *गच्छत् तं देवा अभि समगच्छन्तामा

वै नो-[] 20

TS 2.5.3.7

ऽद्य वसु वसतीतीन्द्रो हि देवानां वसु तदमावास्याया अमावास्यत्वं
ब्रह्मवादिनो वदन्ति किं देवत्यं सांनाय्यमिति वैश्वदेवमिति ब्रूयाद्-
विश्वे हि तद्-देवा भागधेयमभि समगच्छन्तेत्यथो खल्वैन्द्रमित्येव
ब्रूयादिन्द्रं वाव ते तद्-भिषज्यन्तोऽभि समगच्छन्तेति ॥ 21

(दधि - मे जघ्नुष इन्द्रियं वीर्य - मित्यब्रवीदेतदस्मा -

अवदेयं - तनक्ति - नो - द्विचत्वारिंशच्च) (A3)

TS 2.5.4.1

ब्र॒ह्म॒वा॒दि॒नो॑ वदन्ति॒ स त्वे॑ द॒र्श॒पूर्ण॒मा॒सौ॑ यजेत॒ य ए॒नौ॑ सेन्द्रौ॒
यजे॒तेति॑ वैमृ॒धः पू॒र्णमा॑से ऽनुनिर्वा॒प्यो भ॑वति॒ तेन॑ पू॒र्णमा॑सः सेन्द्र॒
ऐन्द्रं॑ द॒द्ध्य॒मा॒वा॒स्यायां॑ तेना॒मा॒वा॒स्या सेन्द्रा॒ य ए॒वं वि॒द्वान्
द॒र्श॒पूर्ण॒मा॒सौ॑ यज॒ते सेन्द्रा॑वे॒वैनौ॑ यज॒ते श्वः॑श्चो॒ऽस्मा ई॒जाना॑य॒
वसी॑यो भवति॒ दे॒वा वै यद्-य॒ज्ञे ऽकु॑र्व॒तत॒दसु॑रा अकुर्व॒त ते

दे॒वा ए॒ता - [] 22

TS 2.5.4.2

-मि॒ष्टि-म॒पश्य॑न्ना॒ग्नावै॒ष्णव॑-मेका॒दश॑क॒पाल॑ꣳ सर॒स्वत्यै॑ च॒रुꣳ
सर॒स्वते॑ च॒रुं तां॑ पौ॒र्णमा॑सꣳ सꣳस्था॒प्यानु॑ नि॒रव॑पन् ततो॑ दे॒वा
अभ॑वन् परा॒ऽसु॒रा यो भ्रा॑तृ॒व्यवा॒न्थस्या॑थ स पौ॒र्णमा॑सꣳ
सꣳस्था॒प्यैता॑मि॒ष्टिम॑नु॒ निर्व॑पेत् पौ॒र्णमा॑से॒नैव॑ वज्रं॒ भ्रा॑तृ॒व्याय॑
प्र॒ह॒त्याऽऽग्नावै॒ष्णावे॑न दे॒वता॑श्च य॒ज्ञं च॒ भ्रा॑तृ॒व्यस्य॑ वृ॒द्धे मि॒थुना॑न्
प॒शून्थ॑ सा॒रस्व॑ता॒भ्यां या॑व॒दे॒वास्या॑स्ति॒ तथ् - [] 23

TS 2.5.4.3

सर्वं ँवृद्धे पौर्णमासीमेव यजेत भ्रातृव्यवान्नामावास्यां हत्वा भ्रातृव्यं
नाऽऽप्याययति साकंप्रस्थायीयेन यजेत पशुकामोयस्मै वा
अल्पेनाऽऽहरन्ति नाऽऽत्मना तृप्यति नान्यस्मै ददाति यस्मै महता
तृप्यत्यात्मना ददात्यन्यस्मै महता पूर्णं होतव्यं तृप्त एवैनमिन्द्रः
प्रजया पशुभिस्तर्पयति दारुपात्रेण जुहोति न हि मृन्मयमाहुतिमानश
औदुम्बरं – [] 24

TS 2.5.4.4

भवत्यूर्वा उदुम्बर ऊर्क् पशव ऊर्जैवास्मा ऊर्जं पशूनव रुन्धे
नागतश्रीर्महेन्द्रं यजेत त्रयो वै गतश्रियः शुश्रुवान् ग्रामणी
राजन्यस्तेषां महेन्द्रो देवता यो वै स्वां देवता-मतियजते
प्र स्वायै देवतायैच्यवते न परां प्राप्नोति पापीयान् भवति
सँवथ्सर-मिन्द्रं यजेत सँवथ्सरं हि व्रतं नाति स्वै – [] 25

TS 2.5.4.5

-वैनं देवतेज्यमाना भूत्या इन्धे वसीयान् भवति सँवथ्सरस्य
परस्तादग्नये व्रतपतये पुरोडाशमष्टाकपालं निर्वपेथ् सँवथ्सरमेवैनं

ॐ॒वृ॒त्रं॑ ज॒घ्नि॒वा॒ꣳस॒म॒ग्नि॒-व्र॒त॒प॒ति॒-व्र॒त॒मा॒ ल॒म्भ॒य॒ति॒ त॒तोऽधि॒ कामं॑
ॐ॒य॒जे॒त ॥ 26

(ए॒तां - त - दौ॒दु॒म्बर॑ꣳ - स्वा - त्रि॒ꣳश॒च्च॑) (A4)

TS 2.5.5.1

ना॒सो॒म॒या॒जी सं॑ न॒ये॒द॒ना॒ग॒तं॑ वा ए॒तस्य॑ प॒यो योऽसो॑म॒या॒जी
य॒द॒सो॒म॒या॒जी सं॑न॒ये॒त् परि॑मोष ए॒व सोऽनृ॑तं करोत्यथो प॒रै॒व सि॑च्यते
सो॒म॒या॒ज्यै॒व सं॑ न॒ये॒त् प॒यो वै सो॒मः प॒यः सा॑नाय्यं प॒यसै॒व प॒य
आ॒त्मन् ध॑त्ते वि वा ए॒तं प्र॒जया॑ प॒शुभि॑रर्द्धयति वर्द्धयत्यस्य
भ्रा॒तृ॒व्यं ॐ॒यस्य॑ ह॒विर्नि॑रुप्तं पु॒रस्ता॑च्च॒न्द्र॒मा - [] 27

TS 2.5.5.2

अ॒भ्यु॒दे॒ति त्रे॒धा तण्डु॑लान्. वि भ॒जे॒द्-ये म॑द्ध्य॒माः स्यु॑स्तान॒ग्नये॑
दा॒त्रे पु॒रो॒डा॒शम॑ष्टाकपालं कुर्याद्-ये स्थवि॑ष्ठास्तानिन्द्राय प्रदा॒त्रे
द॒धꣳ श्व॒रुं ॐ॒येऽणि॑ष्ठास्तान्. विष्ण॑वे शि॒पिवि॑ष्टाय शृ॒ते च॒रुम॑ग्निरे॒वास्मै॑
प्र॒जां प्र॒ज॒न॒य॒ति वृ॒द्धामि॑न्द्रः प्र यच्छति य॒ज्ञो वै विष्णुः॑ प॒शवः॑
शि॒पिर्य॑ज्ञ ए॒व प॒शुषु॑ प्रति तिष्ठति न द्वे - [] 28

TS 2.5.5.3

यजेत॑ यत्॑ पूर्॒वया॑ सं॒प्र॒ति यजे॑तो॒त्तर॑या छ॒म्बट् कुर्या॑द्-यदु॒त्तर॑या
सम्प्र॒ति यजे॑त॒ पूर्॒वया॑ छ॒म्बट् कुर्या॑न्नेष्टि॒र्भव॑ति न य॒ज्ञस्तद॑नु
ही॒तमु॒ख्यप॑गल्भो जा॒यत॑ ए॒कामे॒व यजे॑त प्र॒गल्भो॑ऽस्य जा॒यते॑ ऽना॒दृत्य॑
तद् द्वे ए॒व यजे॑त य॒ज्ञमु॒खमे॒व पूर्॒वया॑ ऽऽल॑भते य॒जत॑ उत्तर॒या दे॒वता॑
ए॒व पूर्॒वया॑ ऽवरु॒न्ध इन्द्रि॒य-मु॒त्तर॑या दे॒वलोक॑मे॒व - [] 29

TS 2.5.5.4

पूर्॒वया॑ऽभि॒जय॑ति म॒नुष्य॑लो॒कमु॒त्तर॑या भू॒यसो॑ य॒ज्ञक्र॒तूनु॑पै॒त्येषा॑
वै सु॒मना॑ ना॒मेष्टि॒र्यम॑द्ये॒जानं॑ प॒श्चाच्च॑न्द्र॒मा अ॒भ्युदे॑त्यस्मिन्ने॒वास्मै॑
लो॒केऽर्द्धु॑कं भव॑ति दा॒क्षाय॑णय॒ज्ञेन॑ सु॒वर्ग॑कामो यजे॑त पूर्ण॑मा॒से
सं न॑येन्-मै॒त्रावरु॑ण्या ऽऽमि॒क्षया॑ ऽमा॒वास्या॑यां यजे॑त पूर्ण॑मा॒से वै
दे॒वानां॑ सु॒तस्तेषा॑मे॒तम॑र्द्ध॒मासं॑ प्रसु॒तस्तेषां॑ मै॒त्रावरु॑णी
व॒शाऽमा॒वास्या॑या-म॒नूब॑न्ध्या यत् - [] 30

TS 2.5.5.5

पूर्वे॑द्यु र्य॒जते॑ वे॒दिमे॒व तत् क॑रोति यद् व॒थ्सान॑पाक॒रोति॑
सदो॑हवि॒र्द्धा॒ने ए॒व सं मि॑नोति यद्-य॒जते॑ दे॒वैरे॒व सु॒त्यां सं

पादयति॑ स ए॒तम॑र्द्धमा॒सꣳ स॒धमा॑दं दे॒वैः सोमं॑ पिबति॒ यन्-
 मै॒त्रावरु॑ण्या ऽऽमि॑क्षया ऽमा॒वास्या॑यां य॒जते॑ यै॒वासौ दे॒वानां॑
 व॒शाऽनू॑बन्ध्या सो ए॒वैषै॑तस्य सा॒क्षाद्-वा ए॒ष दे॒वान॒भ्यारो॑हति॒
 य ए॒षां य॒ज्ञ - [] 31

TS 2.5.5.6

-म॒भ्यारो॑हति यथा॒ खलु॑वै श्रे॒यान॒भ्यारू॑ढः का॒मय॑ते तथा॒ करो॑ति
 यद्य॒ववि॑द्ध्यति पापी॒यान् भव॑ति यदि॒ नाव॑विद्ध्यति स॒दृङ् व्या॒वृत्का॑म
 ए॒तेन॑ य॒ज्ञेन॑ यजेत क्षु॒रप॑वि॒र्ह्येष॑ य॒ज्ञस्ता॒जक् पु॒ण्यो वा भव॑ति प्र वा
 मी॒यते॑ तस्यै॒तद्ब्र॑तं ना॒नृतं॑ व॒देन्न॑ मा॒ꣳसम॑श्जीया॒न्न
 स्त्रि॒यमु॑पे॒यान् ना॒स्य प॑ल्पू॒लने॑न वा॒सः प॑ल्पू॒लये॑यु- ()- रे॒तद्धि
 दे॒वाः सर्वं॑ न कु॒र्वन्ति॑ ॥ 32 (च॒न्द्रमा॑ -द्वे -दे॒वलोक॑मे॒व - यद्-
 य॒ज्ञं- प॑ल्पू॒लये॑युः -षट् च) (A5)

TS 2.5.6.1

ए॒ष वै दे॒वर॒थो यद्-दर्॑.शपूर्णमा॒सौ यो दर्॑.शपूर्णमा॒सावि॑ष्ट्वा सोमे॒न
 य॒जते॑ रथ॒स्पष्ट॑ ए॒वाव॑साने॒ वरे॑ दे॒वाना॑मव॒स्यत्ये॒तानि॑ वा अ॒ङ्गाप॑रू॒षि
 सँव॑त्सरस्य॒ यद्-दर्॑.शपूर्णमा॒सौ य ए॒वं वि॒द्वान् दर्श॑पूर्णमा॒सौ

यज॑ते-ऽङ्गा॒परू॑ष्ये॒व सँ॑व॒थ्स॒रस्य॑ प्रति॒ दधा॑त्ये॒ते वै सँ॑व॒थ्स॒रस्य॑
चक्षु॑षी॒ यद्-दर्॑.श॒पूर्णमा॑सौ॒ य एवं॑ वि॒द्वान् दर्॑.श॒पूर्णमा॑सौ॒ यज॑ते
ताभ्या॑मे॒व सु॒वर्गं॑ लो॒कम॑नु॒ पश्य॑ - [] 33

TS 2.5.6.2

-त्येषा॑ वै दे॒वानां॑ वि॒क्रान्ति॑ र्यद्-दर्श॑पूर्णमा॒सौ य एवं॑ वि॒द्वान्
दर्श॑पूर्णमा॒सौ यज॑ते दे॒वानामे॒व वि॒क्रान्ति॑म॒नु वि॒ क्रम॑त ए॒ष वै
दे॒वयानः॑ पन्था॒ यद्-दर्॑.श॒पूर्णमा॑सौ॒ य एवं॑ वि॒द्वान् दर्॑.श॒पूर्णमा॑सौ
यज॑ते॒ य ए॒व दे॒वयानः॑ पन्था॒स्तꣳ स॒मारो॑ह॒त्येतौ॑ वै दे॒वानाꣳ ह॒री
यद्-दर्॑.श॒पूर्णमा॑सौ॒ य एवं॑ वि॒द्वान् दर्॑.श॒पूर्णमा॑सौ॒ यज॑ते॒ यावे॒व
दे॒वानाꣳ ह॒री ताभ्या॑ - [] 34

TS 2.5.6.3

-मे॒वैभ्यो॑ ह॒व्यं व॑ह॒त्येतद्-वै॑ दे॒वानामा॑स्यं॒ यद्-दर्॑.श॒पूर्णमा॑सौ॒ य
ए॒वं वि॒द्वान् दर्॑.श॒पूर्णमा॑सौ॒ यज॑ते सा॒क्षादे॒व दे॒वानामा॑स्ये॒ जुहो॑त्येष
वै ह॒विर्द्धानी॑ यो दर्॑.श॒पूर्णमा॑सया॒जी सा॒यंप्रा॑तर॒ग्निहो॑त्रं॒ जुहो॑ति
यज॑ते दर्॑.श॒पूर्णमा॑सा-व॒हर॑हर्-ह॒विर्द्धानि॑नाꣳ सु॒तो य एवं॑ वि॒द्वान्

दर्शपूर्णमासौ यजते हविर्धान्यस्मीति सर्वमेवास्य बर्हिष्यं दत्तं
भवति देवावा अहर् - [] 35

TS 2.5.6.4

यज्ञियं नाविन्दन् ते दर्शपूर्णमासावपुनन् तौ वा एतौ पूतौ मेद्ध्यौ
यद्-दर्शपूर्णमासौ य एवं विद्वान् दर्शपूर्णमासौ यजते पूतावेवैनौ
मेद्ध्यौ यजते नामावास्यायां च पौर्णमास्यां च स्त्रिय-मुपेयाद्-
यदुपेयान् निरिन्द्रियः स्यात् सोमस्य वै राज्ञोऽर्द्धमासस्य रात्रयः पत्नय
आसन् तासाममावास्यां च पौर्णमासीं च नोपैत् - [] 36

TS 2.5.6.5

ते एनमभि समनह्येतां तं यक्ष्म आच्छद्-राजानं यक्ष्म आरदिति
तद्-राजयक्ष्मस्य जन्म यत् पापीयानभवत् तत् पापयक्ष्मस्य
यज्जायाभ्यामविन्दत् तज्जायेन्यस्य य एवमेतेषां यक्ष्माणां जन्म
वेद नैनमेते यक्ष्माविन्दन्ति स एते एव नमस्यन्नुपाधावत् ते
अब्रूतां वरं वृणावहा आवं देवानां भागधे असावा - [] 37

TS 2.5.6.6

–ऽऽवदधि दे॒वा इ॒ज्यान्ता॒ इति॒ तस्मा॑त् स॒दृशी॑ना॒ꣳ रा॒त्रीणा॑ममा॒वास्या॑यां
च पौ॒र्णमा॒स्यां च दे॒वा इ॒ज्यन्त॒ एते॒ हि दे॒वानां॑ भा॒गधे॑ भा॒गधा॑ अ॒स्मै
मनु॑ष्या भवन्ति॒ य ए॒वं वै॒द भू॒तानि॒ क्षु॒धम॑घ्नन्थ॒ सद्यो॑ मनु॑ष्या
अ॒र्द्धमा॒से दे॒वा मा॒सि पि॒तरः॑ सँव॒त्सरे॒ वन॒स्पत॑य॒–स्तस्मा॑द॒हरह॑–
मनु॑ष्या अ॒शान॑–मिच्छन्ते ऽर्ध॒मासे॒ देवा॑ इ॒ज्यन्ते॒ मासि॑ पि॒तृभ्यः॑
क्रिय॑ते सँव॒त्सरे॒ वन॒स्पत॑यः फलं () गृ॒ह्णन्ति॒ य ए॒वं वै॒द ह॒न्ति
क्षु॒धं भ्रा॑तृव्यं ॥ 38

(पश्यति – ताभ्या – मह – रै – दसाव – फलꣳ – सप्त च) (A6)

TS 2.5.7.1

दे॒वा वै न॑र्चि न यजु॑ष्यश्रयन्त॒ ते सा॑मन्ने॒वाश्र॑यन्त॒ हिं करो॑ति
सा॒मैवा॒कर्.हि॑म् करो॒तिय॒त्रैव॑दे॒वा अ॑श्रयन्त॒ तत॑ ए॒वैना॒न् प्र यु॑ङ्क्ते
हिं करो॑ति वा॒च ए॒वैष॒ योगो॑ हिं करो॒ति प्र॒जा ए॒व तद्–य॑ज॒मानः॑
सृ॒जते॒ त्रिः प्र॑थ॒माम॑न्वा॒ह त्रि॑रु॒त्तमां॑ य॒ज्ञस्यै॒व तद् ब॒र्.सम् – [] 39

TS 2.5.7.2

न॒ह्यत्य॑प्र॒स्र॒साय॑ स॒न्तत॑म॒न्वाह॑ प्रा॒णाना॑म॒न्नाद्य॑स्य स॒न्तत्या॑ अथो
रक्ष॑साम॒पह॑त्यै रा॒थन्त॑रीं प्रथ॒माम॑न्वाह रा॒थन्त॑रो वा अ॒यं लो॒क इ॒ममे॒व
लो॒कम॑भि जयति त्रि॒र्वि गृ॑ह्णाति त्रय इ॒मे लो॒का इ॒माने॒व लो॒कान॑भि
जयति॑ बा॒र्हती॑मु॒त्तमा॑-म॒न्वाह॑ बा॒र्हतो॑ वा अ॒सौ लो॒कोऽमु॑मे॒व
लो॒कम॑भि जयति प्र वो - [] 40

TS 2.5.7.3

वाजा॑ इत्य॒निरु॑क्तां प्राजाप॒त्याम॑न्वाह य॒ज्ञो वै प्र॒जाप॑तिर्य॒ज्ञमे॒व
प्र॒जाप॑तिमा र॒भते॑ प्र वो वाजा॑ इत्य॒न्वाहान्नं॑ वै वाजोऽ॒न्नमे॒वाव रु॑न्धे
प्र वो वाजा॑ इत्य॒न्वाह॑ तस्मा॒त् प्रा॒चीन॑रेतो॒ धीय॑ते ऽ॒ग्न आ या॑हि
वी॒तय॑ इत्या॒ह तस्मा॒त् प्र॒तीचीः॑ प्र॒जा जा॑यन्ते प्र वो वाजा॑ - [] 41

TS 2.5.7.4

इत्य॒न्वाह॑ मा॒सा वै वाजा॑ अर्द्धमा॒सा अ॒भिद्य॑वो दे॒वा ह॒विष्म॑न्तो
गौर्धृ॒ताची॑ य॒ज्ञो दे॒वाज्जि॑गाति यज॒मानः॑ सु॒मन्यु॑रिद॒मसी॑द॒मसी॑त्ये॒व
य॒ज्ञस्य॑ प्रि॒यं धा॑माव रु॒न्धे यं का॑मये॒त सर्व॑मायु॒रिया॑दिति प्र वो वाजा॑

इति तस्यानूच्याग्न आ याहि वीतय इति सन्ततमुत्तर-मर्द्धर्चमा
लभेत - [] 42

TS 2.5.7.5

प्राणेनैवास्यापानं दाधार सर्वमायुरेति यो वा अरन्निꣳ सामिधेनीनां
वेदारत्नावेव भ्रातृव्यं कुरुतेऽर्द्धर्चो सं दधात्येष वा अरन्निः
सामिधेनीनां य एवं वेदारत्नावेव भ्रातृव्यं कुरुत ऋषेर्ऋषेर्वा एता
निर्मिता यथ सामिधेन्यस्ता यदसम्युक्ताः स्युः प्रजया पशुभि
र्यजमानस्य वि तिष्ठेरन्नर्द्धर्चो सं दधाति सं () युनक्त्येवैनास्ता
अस्मै संयुक्ता अवरुद्धाः सर्वामाशिषं दुहे ॥ 43 (बर्.सं - वो -

जायन्ते प्रवो वाजा - लभेत - दधाति सं - दश च) (A7)

TS 2.5.8.1

अयज्ञो वा एष योऽसामाग्ना आ याहि वीतय इत्याह रथन्तरस्यैष
वर्णस्तं त्वा समिद्धिरङ्गिर इत्याह वामदेव्यस्यैष वर्णो बृहदग्ने
सुवीर्यमित्याह बृहत एष वर्णो यदेतं तृचमन्वाह यज्ञमेव तथ
सामन्वन्तं करोत्यग्निरमुष्मिन् लोक आसीदादित्योऽस्मिन् ताविमौ
लोकावशान्ता - [] 44

TS 2.5.8.2

वास्तां॑ ते दे॒वा अ॒ब्रुव॑न्ने॒तेमौ॑ वि पर्यू॑हा॒मेत्य॒ग्न आ या॑हि वी॒तय॑
 इत्य॒स्मिन् लो॒के॑ऽग्निम॑दधु बृ॒हद॑ग्ने सु॒वीर्य॑मि॒त्यमु॒ष्मिन्
 लो॒क आ॑दि॒त्यं ततो॑ वा इ॒मौ लो॒काव॑शा॒म्यतां॑ यदे॒वम॒न्वाहा॒नयो॑
 लो॒कयोः॑ शा॒न्त्यै॒ शा॒म्यतो॑ऽस्मा इ॒मौ लो॒कौ य ए॒वं वे॒द पञ्च॑दश
 सा॒मिधे॑नीर॒न्वाह॑ पञ्च॑दश – [] 45

TS 2.5.8.3

वा अ॒र्द्धमा॒सस्य॑ रा॒त्रयो॑ऽर्द्धमा॒सशः॑ सँव॑त्सर आ॒प्यते॑ ता॒सां
 त्रीणि॑ च श॒तानि॑ ष॒ष्टिश्चा॒क्षरा॑णि ताव॒तीः सँव॑त्सरस्य रा॒त्रयो॑ऽक्षर॑श
 ए॒व सँव॑त्सरमा॒प्नोति॑ नृ॒मेधश्च॑ प॒रुच्छे॑पश्च ब्र॒ह्मवा॑द्य-मव॒देता-म॒स्मिन्
 दा॒रावा॑र्द्रँ॒ऽग्निं॑ ज॒नया॑व य॒तरो॑ नौ ब्र॒ह्मीया॑निति नृ॒मेधो॑ऽभ्यव॒दथ्
 स धू॒मम॑ज॒नय॑त् प॒रुच्छे॑पो ऽभ्यव॒दथ् सो॑ऽग्निम॑ज॒नय॑दृष
 इत्य॑ब्रवीद्-[] 46

TS 2.5.8.4

यथ् स॒माव॑द्वि॒द्व क॒था त्वम॒ग्निम॑जी॒जनो॑ नाहमि॒ति सा॒मिधे॑नीनामे॒वाहं
 व॑र्णं वे॒देत्य॑ब्रवीद्-यद् घृ॒तव॑त् प॒दम॑नू॒च्यते॑ स आ॒सां व॑र्ण॒स्तं त्वा

स॒मि॒द्धि॒रङ्गि॒र॒ इ॒त्या॒ह॒ सा॒मि॒धे॒नी॒ष्वे॒व॒ तज्ज्योति॑ र्जनयति स्त्रियस्तेन
यदृ॒चः॒ स्त्रिय॒स्तेन॒ यद्-गा॒य॒त्रियः॒ स्त्रिय॒स्तेन॒ यथ् सा॒मि॒धे॒न्यो
वृ॒ष॒ण्वती॑-मन्वा॒ह॒ - [] 47

TS 2.5.8.5

तेन॒ पु॒ऽस्व॒ती॒स्तेन॒ सेन्द्रा॒स्तेन॒ मि॒थु॒ना अ॒ग्नि॒र्दे॒वानां॑ दू॒त आसी॑दु॒शना॑
का॒व्योऽसु॒राणां॑ तौ प्र॒जाप॑तिं प्र॒ञ्ज॒मैता॑ऽ स प्र॒जाप॑तिर॒ग्निं दू॒तं
ँवृ॒णीम॒ह॒ इत्य॑भि पर्या॒वर्त॑त॒ ततो॑ दे॒वा अ॒भव॑न् पराऽसु॒रा य॒स्यै॒वं
ँवि॒दुषो॑ऽग्निं दू॒तं ँवृ॒णीम॒ह॒ इत्य॑न्वा॒ह॒ भव॑त्या॒त्मना॒ परा॑ऽस्य॒ भ्रातृ॑व्यो
भव॑त्य॒ध्वर॑वती॒मन्वा॒ह॒ भ्रातृ॑व्यमे॒वैतया॑ - [] 48

TS 2.5.8.6

-ध्व॑रति शो॒चि॒ष्के॑ श॒स्तमी॑म॒ह॒ इत्या॑ह प॒वि॒त्रमे॒वैतद्-य॑ज॒मान॑मे॒वैतया॑
प॒वय॑ति॒ समि॑द्धो अ॒ग्न आ॒हु॒तेत्या॑ह प॒रि॒धिमे॒वैतं॑ प॒रि द॑धा॒त्यस्क॑न्दाय॒
यद॑त ऊ॒र्ध्वम॑भ्याद॒ध्याद्-यथा॑ ब॒हिःप॒रि॒धि॒ स्क॑न्दति ता॒दृगे॒व तत्
त्रयो॑ वा अ॒ग्नयो॑ ह॒व्यवा॑हनो दे॒वानां॑ क॒व्यवा॑हनः पि॒तृणा॑ऽ स॒हर॑क्षा
अ॒सु॒राणां॑ त ए॒तर्ह्या॑ श॒ऽसन्ते॒ मां ँव॑रिष्यते॒ मा - [] 49

TS 2.5.8.7

–मिति वृणी॑द्ध्व॒ ह॒व्य॒वा॒ह॒न॒मि॒त्या॒ह॒ य ए॒व दे॒वा॒नां॒ तं वृ॑णीत
आ॒र्षे॒यं वृ॑णी॒ते ब॒न्धो॒रे॒व नै॒त्यथो॒ सन्त॑त्यै॒ पर॒स्ता॑र्वा॒चो वृ॑णी॒ते
तस्मा॑त् पर॒स्ता॑र्वा॒ज्चो म॒नुष्या॑न् पि॒तरोऽनु॒ प्र पि॑पते ॥ 50

(अ॒शा॒न्ता – वा॒ह पञ्च॑द॒शा – ब्र॒वी – द॒न्वा॒है – तया॑ – व॒रि॒ष्य॒ते
मा – मे॒का॒न्न॒त्रि॒ंश॒च्च) (A8)

TS 2.5.9.1

अ॒ग्ने॒ महा॑ ह॒व्यं अ॒सी॒त्या॒ह॒ म॒हान्. ह्ये॒ष यद॒ग्नि ब्रा॑ह्म॒णे॒त्या॒ह॒ ब्रा॒ह्म॒णो
ह्ये॒ष भा॒र॒ते॒त्या॒है॒ष हि दे॒वेभ्यो॑ ह॒व्यं भ॑रति दे॒वे॒द्ध इ॒त्या॒ह॒ दे॒वा
ह्ये॒तमै॒न्ध॒त म॒न्वि॒द्ध इ॒त्या॒ह॒ म॒नु॒र्ह्ये॒तमु॒त्त॒रो दे॒वेभ्य॑ ऐ॒न्ध॒र्षि॒ष्टु॒त
इ॒त्या॒ह॒र्ष॒यो ह्ये॒तम॑स्तु॒वन् वि॒प्रा॒नु॒म॒दि॒त इ॒त्या॒ह॒ – [] 51

TS 2.5.9.2

वि॒प्रा ह्ये॒ते यच्छु॑श्रु॒वा॒सः क॒वि॒श॒स्त इ॒त्या॒ह॒ क॒वयो॑ ह्ये॒ते
यच्छु॑श्रु॒वा॒सो ब्र॒ह्म॒स॒ंशित॑ इ॒त्या॒ह॒ ब्र॒ह्म॒स॒ंशितो॑ ह्ये॒ष घृ॒ता॒ह॒व॒न
इ॒त्या॒ह॒ घृ॒ता॒हु॒ति॒र्ह्यस्य॑ प्रि॒य॒त॒मा प्र॒णी॒र्य॒ज्ञा॒ना॒मि॒त्या॒ह॒ प्र॒णी॒र्ह्ये॒ष य॒ज्ञा॒ना॒ं

र॒थी-र॒ध्व॒राणा॒-मि॒त्याहै॒ष हि दे॒वर॒थोऽतू॒र्तो हो॒तेत्या॒ह न ह्ये॒तं

कश्च॒न - [] 52

TS 2.5.9.3

तर॒ति तू॒र्णिर्. ह॒व्य॒वाडि॒त्याह॒ सर्व॑ꣳह्ये॒ष तर॒त्यास्पा॒त्रं
जु॒हूर्दे॒वाना॒मि॒त्याह॒ जु॒हूर्ह्ये॒ष दे॒वानां॑ च॒म॒सो दे॒वपा॒न इ॒त्याह॒ च॒म॒सो
ह्ये॒ष दे॒वपा॒नोऽरा॑ꣳ इ॒वाग्ने॒ नेमि॒र्दे॒वाꣳ स्त्वं॑ परि॒भूर॒सीत्या॑ह॒ दे॒वान्
ह्ये॒ष परि॒भूर्य॑द्-ब्रू॒यादा॑ वह॒ दे॒वान् दे॒वय॑ते॒ यज॑मा॒नाये॒ति

भ्रातृ॒व्यम॑स्मै- [] 53

TS 2.5.9.4

ज॒नये॒दा वह॑ दे॒वान्. यज॑मा॒नाये॒त्याह॒ यज॑मा॒न-मे॒वैते॑न
व॒र्द्धय॑त्य॒ग्निम॑ग्न॒ आ वह॑ सो॒ममा॒ वहे॒त्याह॒ दे॒वता॑ ए॒व तद्-
य॒थापू॒र्वमु॑प॒ ह्वय॑त॒ आ चा॑ग्ने॒ दे॒वान्. वह॑ सु॒यजा॑ च॒ यज॑ जा॒तवे॒द
इ॒त्याहा॒ग्निमे॒व तथ् सꣳ श्य॑ति॒ सोऽस्य॑ सꣳशि॒तो दे॒वेभ्यो॑ ह॒व्यं
व॒ह॒त्य॒ग्निर्. हो॒ते - [] 54

TS 2.5.9.5

–त्याहा॒ग्निर्वै॑ दे॒वाना॒ञ् होता॒ य ए॒व दे॒वाना॒ञ् होता॒ तं वृ॑णीते॒स्मो
व॒यमित्या॑हाऽऽत्मान॑मे॒व स॒त्त्वं ग॑मयति सा॒धु ते॑ यज॒मान
दे॒वते॑त्याहाऽऽशि॒षमे॑वैता॒मा शा॑स्ते यद्ब्रू॒याद्–योऽग्नि॑ञ् होता॒रम॑वृ॒था
इत्य॒ग्निनो॑भ॒यतो॑ यज॒मानं॑ परि॒ गृह्णी॑यात् प्र॒मायु॑कः स्याद्–
यज॒मानदे॒वत्या॑ वै जु॒हूर्भ्रा॑तृव्यदे॒वत्यो॑प॒भृद् – [] 55

TS 2.5.9.6

यद्–द्वे॑ इ॒व ब्रू॒याद् भ्रा॑तृव्यम॒स्मै ज॑नयेद् घृ॒तव॑तीम॒ध्वर्यो॑
सु॒चमा॑ऽस्यस्वेत्या॒ह यज॑मान–मे॒वैते॑न॒ वर्ध॑यति दे॒वायु॑व॒मित्या॑ह
दे॒वान् ह्ये॑षाऽवति॒ विश्व॑वा॒रामि॑त्या॒ह विश्व॑ञ् ह्ये॑षाऽवती॒डाम॑है दे॒वाञ्
ई॒डे॒न्यान्॑ नम॒स्याम॑ नम॒स्यान्॑ य॒जाम॑ य॒ज्ञिया॑नित्या॒ह म॒नुष्या॑ वा
ई॒डे॒न्याः॑ पि॒तरो॑ नम॒स्या दे॒वा य॒ज्ञिया॑ दे॒वता॑ ए॒व () तद्–य॑थाभा॒गं
य॑जति ॥ 56 (वि॒प्रा॒नुम॑दि॒त इ॒त्याह॑ – च॒ना – ऽस्मै॑ – हो॒ता –
प॒भृद् – दे॒वता॑ ए॒व – त्री॑णि॒ च) (A9)

TS 2.5.10.1

त्री७ स्तृ॒चाननु॑ ब्रूयाद्-राज॒न्यस्य॑ त्रयो॒ वा अ॒न्ये रा॒ज॒न्यात्॑ पु॒रुषा॑
 ब्रा॒ह्म॒णो वै॒श्यः शू॒द्र॒स्ता॒ने॒वास्मा॑ अनु॒कान् करो॑ति पञ्च॒द॒शानु॑ ब्रूयाद्-
 रा॒ज॒न्यस्य॑ पञ्च॒द॒शो वै रा॒ज॒न्यः स्व॑ ए॒वैन॑७ स्तो॒मे प्र॑ति॒ष्ठाप॑यति
 त्रि॒ष्टुभा॑ परि॒ द॒ध्यादि॑न्द्रि॒यं वै त्रि॒ष्टुगि॑न्द्रि॒यका॑मः खलु॒ वै रा॒ज॒न्यो॑
 यज॑ते त्रि॒ष्टुभै॒वास्मा॑ इन्द्रि॒यं परि॑ गृह्णा॒ति यदि॑ का॒मये॑त-[] 57

TS 2.5.10.2

ब्र॒ह्मव॑र्च॒सम॑स्त्विति॒ गाय॑त्रि॒या परि॑ द॒ध्याद्-ब्र॒ह्मव॑र्च॒सं वै गाय॑त्री
 ब्र॒ह्मव॑र्च॒समे॒व भ॑वति स॒प्त॒द॒शानु॑ ब्रूयाद्-वै॒श्यस्य॑ स॒प्त॒द॒शो वै
 वै॒श्यः स्व॑ ए॒वैन॑७ स्तो॒मे प्र॑ति॒ष्ठाप॑यति॒जग॑त्या परि॒ द॒ध्याज्जा॑गता
 वै प॒शवः॑ प॒शुका॑मः खलु॒ वै वै॒श्यो यज॑ते जग॑त्यै॒वास्मै॑ प॒शून्
 परि॑ गृह्णा॒त्येक॑वि॒ंशति॑मनु॒ ब्रूयात्॑ प्र॒तिष्ठा॑का॒मस्यै॑कवि॒ंशः
 स्तो॒मानां॑ प्र॒तिष्ठा॑ प्र॒तिष्ठि॑त्यै - [] 58

TS 2.5.10.3

चतु॑र्वि॒ंशति॑मनु॒ ब्रूयाद्-ब्र॒ह्मव॑र्च॒सका॑मस्य॒ चतु॑र्वि॒ंशत्य॑क्षरा
 गाय॑त्री गाय॑त्री ब्र॒ह्मव॑र्च॒सं गाय॑त्रियै॒वास्मै॑ ब्र॒ह्मव॑र्च॒समे॒व रु॑न्धे

त्रि॒ंश॒त॒म॒नु॒ ब्रू॒या॒द॒न्न॒का॒म॒स्य॒ त्रि॒ंश॒द॒क्ष॒रा॒ वि॒रा॒ड॒न्नं॑ वि॒रा॒ड्
वि॒रा॒जै॒वा॒स्मा॑ अ॒न्ना॒द्य॒म॒व॒ रु॒न्धे॒ द्वा॒त्रि॒ंश॒त॒म॒नु॒ ब्रू॒या॒त् प्र॒ति॒ष्ठा॒का॒म॒स्य॒
द्वा॒त्रि॒ंश॒द॒क्ष॒रा॒ ऽनु॒ष्टु॒ग॒नु॒ष्टु॒प् छ॒न्द॒सां॑ प्र॒ति॒ष्ठा॒ प्र॒ति॒ष्ठि॒त्यै॒ षट्॒त्रि॒ंश॒त॒म॒नु॒
ब्रू॒या॒त् प॒शु॒का॒म॒स्य॒ षट्॒त्रि॒ंश॒द॒क्ष॒रा॒ बृ॒ह॒ती॒ बा॒र्ह॒ताः॑ प॒श॒वो॑
बृ॒ह॒त्यै॒वा॒स्मै॑ प॒शू - [] 59

TS 2.5.10.4

-न॒व॒ रु॒न्धे॒ च॒तु॒श्च॒त्वा॒रि॒ंश॒त॒म॒नु॒ ब्रू॒या॒दि॒न्द्रि॒य॒का॒म॒स्य॒
च॒तु॒श्च॒त्वा॒रि॒ंश॒द॒क्ष॒रा॒ त्रि॒ष्टु॒गि॒न्द्रि॒यं॑ त्रि॒ष्टु॒प् त्रि॒ष्टु॒भै॒वा॒स्मा॑ इ॒न्द्रि॒य॒म॒व॒
रु॒न्धे॒ ऽष्टा॒च॒त्वा॒रि॒ंश॒त॒म॒नु॒ ब्रू॒या॒त् प॒शु॒का॒म॒स्या॒ष्टा॒च॒त्वा॒रि॒ंश॒द॒क्ष॒रा॒
ज॒ग॒ती॒ जा॒ग॒ताः॑ प॒श॒वो॒ज॒ग॒त्यै॒वा॒स्मै॑ प॒शू॒न॒व॒ रु॒न्धे॒ स॒र्वा॒णि॒ छ॒न्दा॒
स्य॒नु॒ ब्रू॒या॒द्-ब॒हु॒या॒जि॒नः॑ स॒र्वा॒णि॒ वा॒ ए॒त॒स्य॒ छ॒न्दा॒स्य॒व॒रु॒द्धा॒नि॒ यो॒
ब॒हु॒या॒ज्य॒प॒रि॒मि॒त॒म॒नु॒ ब्रू॒या॒द॒प॒रि॒मि॒त॒स्या॒व॒रु॒ध्यै॑ ॥ 60

(का॒म॒र्ये॒त - प्र॒ति॒ष्ठि॒त्यै - प॒शू॒न्थ - स॒प्त॒च॒त्वा॒रि॒ंश॒च्च) (A10)

TS 2.5.11.1

नि॒वी॒तं॑ म॒नु॒ष्या॒णां॑ प्रा॒ची॒ना॒वी॒तं॑ पि॒त॒ृणा॒मु॒प॒वी॒तं॑ दे॒वा॒ना॒मु॒प॒ व्य॒य॒ते॑
दे॒व॒ल॒क्ष्म॒मे॒व॒ तत् कुरु॑ते ति॒ष्ठ॒न्न॒न्वा॒ह ति॒ष्ठ॒न् ह्या॑श्रु॒त॒तरं॑ व॒द॒ति॒

तिष्ठन्नन्वाह सुवर्गस्य लोकस्याभिजित्या आसीनो यजत्यस्मिन्नेव
लोके प्रति तिष्ठति यत् क्रौञ्चमन्वाहाऽऽसुरं तद्-यन्मन्द्रं मानुषं
तद्-यदन्तरा तथ् सदेवमन्तराऽनूच्य॑ सदेवत्वाय विद्वा॑सो वै- [] 61

TS 2.5.11.2

पुरा होतारोऽभूवन् तस्माद्-विधृता अद्ध्वानोऽभूवन् न पन्थानः
समरुक्षन्नन्तर्वेद्यन्यः पादो भवति बहिर्वेद्यन्योऽथान्वाहाद्ध्वनां
विधृत्यै पथामस॑रोहायाथो भूतं चैव भविष्यच्चाव रुन्धेऽथो
परिमितं चैवापरिमितं चाव रुन्धेऽथो ग्राम्या॑ श्रैव पशूना॑रण्या॑
श्चाव रुन्धेऽथो - [] 62

TS 2.5.11.3

देवलोकं चैव मनुष्यलोकं चाभि जयति देवा वै सामिधेनीरनूच्य
यज्ञं नान्वपश्यन्त्स प्रजापतिस्तूष्णी-माघारमा ऽघारयत् ततो वै
देवा यज्ञमन्वपश्यन्. यत् तूष्णीमाघार-माघारयति यज्ञस्यानुख्यात्या
अथो सामिधेनीरेवाभ्यनक्त्यलूक्षो भवति य एवं वेदाथो
तर्पयत्येवैना-स्तृप्यति प्रजया पशुभि - [] 63

TS 2.5.11.4

–र्य॑ ए॒वं ँ॑वे॒द यदे॒कया॑ ऽऽघा॒रये॒देकां॑ प्री॒णीया॒द्–यद् द्वाभ्यां॑ द्वे
 प्री॒णीया॒द्–यद् तिसृ॑भिरति॒ तद्रे॑चयेन् मन॒साऽऽ घा॑रयति॒ मन॒सा
 ह्यना॑प्तमाप्यते॒ तिर्य॑ञ्चमा॒ घा॑रयत्य॒छम्ब॑ट्कारं॒ वाक् च
 मन॑श्चाऽऽर्तीयेताम॒हं दे॒वेभ्यो॑ ह॒व्यं व॑हामीति॒ वाग॑ब्रवीद॒हं दे॒वेभ्य॑ इति॒
 मन॑स्तौ प्र॒जाप॑तिं प्र॒श्नमै॑ता॒ञ् सौऽब्र॑वीत् – [] 64

TS 2.5.11.5

प्र॒जाप॑तिर्दू॒तीरे॒व त्वं मन॑सोऽसि॒ यद्धि॑ मन॒सा ध्या॑यति॒ तद्–वा॒चा
 वद॑तीति॒ तत् खलु॑ तुभ्यं॒ न वा॒चा जु॑हवन्नित्यब्रवीत् तस्मान्मन॒सा
 प्र॒जाप॑तये जुह्वति॒मन॑ इ॒व हि प्र॒जाप॑तिः प्र॒जाप॑तेराप्त्यै॒ परि॑धीन्त्सं
 मा॒र्ष्टि पु॒नात्ये॒वैनान्त्रि॑र्म॒द्ध्यमं॑ त्रयो॒ वै प्रा॒णाः प्रा॒णाने॒वाभि॑ जयति॒
 त्रि॒र्दक्षि॑णार्॒द्ध्यं त्रय॑ – [] 65

TS 2.5.11.6

इ॒मे लो॒का इ॒माने॒व लो॒कान॑भि जयति॒ त्रिरु॑त्तरार्॒द्ध्यं त्रयो॒ वै दे॒वया॒नाः
 पन्था॑न॒स्ताने॒वाभि॑ जयति॒ त्रिरु॑प वाजयति॒ त्रयो॒ वै दे॒वलो॒का
 दे॒वलो॒काने॒वाभि॑ जयति॒ द्वाद॑श॒ सं प॑द्यन्ते॒ द्वाद॑श॒ मासाः॑

सँव॒थ्सरः॑सँव॒थ्सरमे॒व प्री॑णात्यथो सँव॒थ्सरमे॒वास्मा॒उप॑ दधाति
सुव॒र्गस्य॑ लो॒कस्य॑ सम॒ष्ट्या आ॒घार॒मा घा॑रयति ति॒र इ॒व – [] 66

TS 2.5.11.7

वै सु॒वर्गो॑ लो॒कः सु॒वर्गमे॒वास्मै॑ लो॒कं प्र रो॑चयत्यृजु॒मा
घा॑रयत्यृजु॒रिव॑ हि प्रा॒णः सन्त॑त॒मा घा॑रयति प्रा॒णाना॑मन्नाद्यस्य
सन्त॑त्या अथो रक्ष॑सामप॒हत्यै॑ यं का॒मये॑त प्र॒मायु॑कः स्या॒दिति॑
जि॒ह्वं तस्याऽऽघा॑रयेत् प्रा॒णमे॒वास्मा॑ज्जि॒ह्वं न॑यति ता॒जक्
प्र मी॑यते॒शिरो॒ वा ए॒तद्-य॒ज्ञस्य॑ यदा॒घार आ॒त्मा ध्रु॒वा – [] 67

TS 2.5.11.8

ऽऽघा॑रमा॒घार्य॑ ध्रु॒वाꣳ सम॑नक्त्या॒त्मन्ने॒व य॒ज्ञस्य॑ शि॒रः प्र॑ति
दधा॑त्यग्नि॒र्दे॒वानां॑ दू॒त आ॒सीद् दै॒व्योऽसु॑राणां तौ प्र॒जाप॑तिं प्र॒श्नमै॑ताꣳ
स प्र॒जाप॑ति ब्रा॒ह्मण॑-मब्रवीदे॒तद्-वि ब्रू॑हीत्या श्राव॒येती॒दं दे॒वाः
शृणु॑तेति॒ वाव॑ तदब्रवीद॒ग्नि दे॒वो हो॑तेति॒ य ए॒व दे॒वानां॑ तमवृणीत॒
ततो॑ दे॒वा – [] 68

TS 2.5.11.9

अ॒भ॒वन्॑ प॒राऽसु॒रा य॒स्यै॒वं वि॒दुषः॑ प्र॒वरं॑ प्र॒वृ॒णते॑ भ॒व॒त्या॒त्म॒ना
 ॥ प॒राऽस्य॑ भ्रा॒तृ॒व्यो भ॒वति॑ यद्-ब्रा॒ह्म॒णश्चा॒ब्रा॒ह्म॒णश्च॑ प्र॒श्न॒मे॒यातां॑
 ब्रा॒ह्म॒णाया॑धि ब्रू॒याद् यद्-ब्रा॒ह्म॒णाया॑द्ध्य॒याहाऽऽ॒त्म॒ने ऽद्ध्य॒याह
 यद्-ब्रा॒ह्म॒णं प॒राहाऽऽ॒त्मानं॑ प॒रा ऽह॑ तस्मा॑द् ब्रा॒ह्म॒णो न प॒रोच्यः॑ ॥ 69

(वा - आ॒र॒ण्याञ्चाव॑ रु॒न्धेऽथो॑ - प॒शुभिः॑ - सोऽब्र॑वीद् -
 दक्षि॑णा॒र्ध्यं त्रय॑ - इव - ध्रु॒वा - दे॒वा - श्र॑त्वा॒रि॒ञ्शच्च॑) (A11)

TS 2.5.12.1

आ॒यु॒ष्ट > [1], आ॒यु॒र्दा अ॒ग्न > [2], आ॒ प्या॑यस्व > [3], सं ते > [4],
 ऽव॑ ते हे॒ड > [5], उ॒दु॒त्त॒मं > [6], प्र॒णो दे॒व्या > [7], नो॑ दि॒वो > [8],
 ऽग्ना॑ वि॒ष्णू > [9], अ॒ग्नावि॒ष्णू > [10], इ॒मं मे॑ वरु॒ण > [11], तत्त्वा॑ या > [12],
 म्यु॒ दु॒त्यम् > [13], चि॒त्रम् > [14] ॥

अ॒पां न॒पा॒दा ह्य॒स्थादु॒प॒स्थं जि॒ह्म॒नामू॒र्ध्वो वि॒द्युतं॑ व॒सानः॑ ।
 तस्य॑ ज्येष्ठं म॒हि॒मानं॑ व॒ह॒न्ती॒र्. हि॒र॒ण्य॒व॒र्णाः प॒रि य॒न्ति य॒ह्वीः॑ ॥

स-[] 70

TS 2.5.12.2

–म॒न्या य॒न्त्युप॑ य॒न्त्य॒न्याः स॒मा॒न॒मूर्व॑ न॒द्यः पृ॑णन्ति ।
त॒मू शुचि॑ शुच॒यो दी॒दिवा॑ ऽस॒मपां॑ नपा॒तं परि॑तस्थु॒रापः॑ ।
तम॑स्मे॒रा युव॑तयो॒ युवा॑नं म॒र्म॒ज्यमा॑नाः परि॒ य॒न्त्यापः॑ ॥
स शु॒क्रेण॑ शि॒क्वना॑ रेव॒दग्नि॑र्दी॒दाया॑नि॒द्धो घृ॒तनि॑र्णिग॒प्सु ॥
इन्द्रा॑व॒रुण॑यो॒रह॑ ऽस॒म्राजो॑रव॒ आ वृ॑णे ।
ता नो॑ मृ॒डात॑ ईदृ॒शे ॥
इन्द्रा॑व॒रुणा॑ यु॒वम॑द्ध्व॒राय॑ नो – [] 71

TS 2.5.12.3

वि॒शे ज॒नाय॑ म॒हि श॒र्म य॑च्छ॒तं ।
दी॒र्घप्र॑य॒ज्युम॑ति॒ यो व॑नु॒ष्यति॑ व॒यं ज॑येम॒ पृ॒तना॑सु दू॒ढ्यः॑ ॥
आ नो॑मि॒त्राव॑रुणा>¹⁵, प्र॒बा॒हवा॑>¹⁶ ॥
त्वं नो॑ अ॒ग्ने व॑रुण॒स्य वि॒द्वान् दे॒वस्य॑ हे॒डोऽव॑ या॒सिसी॑ष्ठाः ।
यजि॑ष्ठो व॒ह्नि॒तमः॑ शोशु॒चानो॑ वि॒श्वा द्वे॒षा ऽसि॑ प्र मु॒मुग्ध्य॑स्मत् ॥

स त्वं नो अग्ने॒ऽवमो॑ भवो॒ती नेदि॑ष्ठो अ॒स्या उ॒षसो॑ व्यु॒ष्टौ ।

अव॑ यक्ष्व नो वरु॒णः - [] 72

TS 2.5.12.4

ररा॒णो वी॒हि मृ॒डीक॑ सु॒हवो॑ न ए॒धि ॥

प्रप्रा॒यम॒ग्निर्भ॑रतस्य॒ शृ॒ण्वे वि यथ् सूर्यो॑ न रोचते बृ॒हद्भाः॑ ।

अ॒भि यः पू॒रुं पृ॑तनासु तस्थौ दी॒दाय॑ दै॒व्यो अ॒ति॒थिः शि॒वो नः॑ ॥

प्र ते॑ यक्षि प्र त इ॒यमि॑ मन्म भुवो॒ यथा॑ वन्द्यो नो ह॒वेषु॑ ।

धन्व॑न्निव प्र॒पा अ॒सि त्वम॑ग्न इ॒यक्ष्वे॑ पू॒रवे॑ प्र॒त्न राज॑न् ॥ 73

TS 2.5.12.5

वि पाजसा > [17], वि ज्योतिषा > [18] ॥

स त्वम॑ग्ने प्र॒तीके॑न प्र॒त्योष॑ यातुधा॒न्यः ।

उ॒रुक्ष॑र्येषु दी॒द्यत् ॥

तः सु॒प्रती॑कः सु॒दृशः॑ स्वञ्चमवि॒द्वाऽसो॑ वि॒दुष्ट॑रः सपे॒म ।

स यक्ष॑-द्वि॒श्वा व॒युना॑नि वि॒द्वान् प्र ह॒व्यम॒ग्निर॒मृते॑षु वोचत् ॥

अ॒हो॒मु॒चे॑ > ¹⁹, वि॒वे॒ष॒ य॒न्मा॒ > ²⁰, वि॒ न॒ इ॒न्द्रे॑ > ²¹, न्द्र॒ क्ष॒त्र॒ > ²²
मि॒न्द्रि॒याणि॑ श॒त॒क्र॒तो॑ > ²³, ऽनु॒ ते॒ दा॒यि॑ > ²⁴ ॥ 74 (य॒ह्वीः॒ स॒ -
म॒द॒ध्व॒राय॑ नो॒ - व॒रु॒ण॒ - रा॒ज॒ - श्रु॒तुश्च॒त्वा॒रि॒श्च॒) (A12)

=====

Prasna Korvai with starting Padams of 1 to 12 Anuvaakams :-

(वि॒श्वरू॒प - स्त्व॑ष्टे - न्द्रं॑ वृ॒त्रं - ब्र॑ह्मवा॒दिनः॑ स त्वै -
ना॒सो॒मया॒ज्ये - ष वै दे॒वर॒थो - दे॒वा वै न॑र्चि ना - य॒ज्ञो -
ऽग्ने॑ म॒हान् - त्रीन् - नि॒वीत॑ - मा॒यु॒ष्टे - द्वाद॑श)

Korvai with starting Padams of 1, 11, 21 Series of Panchaatis :-

(वि॒श्वरू॒पो - नैन॑श् शी॒तरू॒रा - व॒द्य व॒सु - पू॒र्वेद्यु॑ - वा॒जा इत्य॑ -
ग्ने॑ म॒हान् - नि॒वीत॑ - म॒न्या य॒न्ति - च॒तुः स॒प्ततिः॑)

First and Last Padam of Fifth Prasnam of Kandam 2:-

(वि॒श्वरू॒पो - ऽनु॑ ते दा॒यि)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां द्वितीयकाण्डे पञ्चमः प्रश्नः समाप्तः ॥

2.5.1 Appendix

2.5.12.1 – आयुष्ट >¹, आयुर्दा अग्ने >²

आयुष्टे विश्वतो दधदयमग्नि वरेण्यः ।

पुनस्ते प्राण आयति परा यक्ष्मं सुवामि ते ।

आयुर्दा अग्ने हविषो जुषाणो घृतप्रतीको घृतयोनिरेधि ।

घृतं पीत्वा मधु चारु गव्यं पितेव पुत्रमभि रक्षतादिमं ।

(Appearing in TS –1.3.14.4)

2.5.12.1 – आप्यायस्व >³, सं ते >⁴

आप्यायस्व समेतु ते विश्वतः सोम वृष्णियं ।

भवा वाजस्य संगथे ।

सं ते पयांसि समु यन्तु वाजाः सं वृष्णियान् यभिमातिषाहः ।

आप्यायमानो अमृताय सोम दिवि श्रवांस्युत्तमानि धिष्व ॥

(Appearing in TS- 4-2-7-4)

2.5.12.1 – अव॑ ते हे॒डु>⁵, उ॒दु॒त्त॒मं>⁶

अ॒व ते हे॒डो वरु॑ण॒ नमो॑भि॒रव॑ य॒ज्ञेभि॑रीमहे ह॒विर्भिः॑ ।
क्षय॑न्न॒स्मभ्य॑मसुर॒ प्रचे॑तो॒ राज॑न्नेना॒सि शि॑श्रथः कृ॒तानि॑ ॥

उ॒दु॒त्त॒मं वरु॑ण॒ पाश॑म॒स्मद॒वाऽध॑मं वि॒मद्ध्य॑म॒ श्रथा॑य ।
अथा॑ व॒यमा॑दित्य॒ व्रते॑ तवाऽना॒गसो॑ अ॒दित॑ये स्याम ॥

(Appearing in TS- 1.5.11.3)

2.5.12.1 – प्र॒णो दे॒व्या>⁷, नो॑ दि॒वो>⁸

प्र॒णो दे॒वी सर॑स्वती॒ वाजे॑भिर्वा॒जिनी॑वती । धी॒नाम॑वि॒त्र्यव॑तु ॥

आ नो॑ दि॒वो बृ॒हतः॑ पर्व॒तादा॑ सर॒स्वती॑ यज॒ता ग॑न्तु य॒ज्ञं ।
हव॑ं दे॒वी जु॒जुषा॑णा घृ॒ताची॑ श॒ग्मां नो॑ वाच॒मुश॑ती शृ॒णोतु॑ ॥

(Appearing in TS - 1.8.22.1)

2.5.12.1 – अ॒ग्न॒वि॒ष्णू॑ > ⁹, अ॒ग्न॒वि॒ष्णू॑ > ¹⁰

अ॒ग्न॒वि॒ष्णू॑ म॒हि त॒द्वां म॒हि॒त्वं वी॒तं घृ॒तस्य॑ गु॒ह्यानि॑ ना॒म ।
दमे॑दमे स॒प्त र॒त्ना द॒धाना॑ प्र॒ति वां जि॒ह्वा घृ॒तमा च॑र॒ण्येत् ॥

अ॒ग्न॒वि॒ष्णू॑ म॒हि धा॒म प्रि॒यं वां वी॒थो घृ॒तस्य॑ गु॒ह्या जुषा॑णा ।
दमे॑दमे सु॒ष्टुती॑र्वावृ॒धाना॑ प्र॒ति वां जि॒ह्वा घृ॒तमुच्च॑र॒ण्येत् ॥

(Appearing in TS- 1.8.22.1)

2.5.12.1 – इ॒मं मे॑ वरु॒ण > ¹¹, त॒त् त्वा॑ या > ¹²

इ॒मं मे॑ वरु॒ण श्रु॒धी ह॒वम॒द्या च॑ मृ॒डय॑ । त्वा॒मव॒स्युरा॑ च॒के ॥

त॒त्त्वा या॒मि ब्र॒ह्मणा॑ व॒न्दमा॒नस्त॒दा शा॒स्ते य॒जमा॒नो ह॒विर्भिः॑ ।
अहे॑डमा॒नो वरु॒णेह॑ बो॒द्ध्यु॒रुश॑स् मा न आ॒युः प्र॒मोषीः॑ ॥

(Appearing in TS- 2.1.11.6)

2.5.12.1 – म्यु दु॒त्यं>¹³, चि॒त्रं >¹⁴

उ॒दु॒ त्यं॑ जा॒तवे॑दसं दे॒वं व॑हन्ति के॒तवः॑ । दृ॒शे वि॒श्वाय॑ सूर्यं ॥

चि॒त्रं दे॒वाना॑-मु॒दगा॑दनी॒कं चक्षु॑ मि॒त्रस्य॑ वरु॒णस्या॑ग्नेः ।
आ॒ऽप्रा द्या॒वापृ॑थि॒वी अ॒न्तरि॑क्ष॒ञ् सूर्य॑ आ॒त्मा जग॑तस्त॒स्थुष॑श्च ॥

(Appearing in TS- 1.4.43.1)

2.5.12.3 – आ नो॑ मि॒त्रावरु॑णा>¹⁵, प्र बा॒हवा॑>¹⁶

आ नो॑ मि॒त्रावरु॑णा घृ॒तैर्गव्यू॑तिमु॒क्षतं॑ । म॒ध्वा रजा॑ञ्सि सु॒क्रतू॑ ॥

प्र बा॒हवा॑ सि॒सृतं॑ जी॒वसे॑ न आ नो॑ गव्यू॒तिमु॒क्षतं॑ घृ॒तेन॑ ।
आ नो॑ जने॑ श्रवय॒तं यु॑वाना श्रु॒तं मे॑ मि॒त्रावरु॑णा ह॒वेमा॑ ॥

(Appearing in TS- 1.8.22.3)

2.5.12.5 वि पाजसा> 17

वि पाजसापृथुना शोशुचानो बाधस्व द्विषो रक्षसो अमीवाः ।
सुशर्मणो बृहतः शर्मणि स्यामग्नेरहं सुहवस्य प्रणीतौ ॥

(Appearing in TS- 4.1.5.1)

2.5.12.5 वि ज्योतिषा> 18

विज्योतिषा बृहता भात्यग्निरावि-र्विश्वानि कृणुते महित्वा ।
प्राऽदेवी-र्मायाः सहते-दुरेवाः शिशीते शृङ्गे रक्षसे विनिक्षे ॥

(Appearing in TS- 1.2.14.7)

2.5.12.5 अहोमुचे> 19, विवेष यन्मा> 20

अहोमुचे प्रभरेमा मनीषा मोषिष्ठ-दान्ने सुमतिं गृणानाः ।
इदमिन्द्र प्रति हव्यं गृभाय सत्याः सन्तु यजमानस्य कामाः ॥
विवेष यन्मा धिषणा जजान स्तवै पुरा पार्यादिन्द्र महः ।
अहसो यत्र पीपरद्यथा नो नावेव यान्त मुभये हवन्ते ॥

(Appearing in TS- 1.6.12.3)

2.5.12.5 वि॒न इ॒न्द्रे> [21], न्द्र॒ क्ष॒त्र> [22]

वि॒ न इ॒न्द्र मृ॒धो ज॒हि नी॒चा य॒च्छ पृ॒तन्य॑तः ।

अ॒ध॒स्प॒दं त॒मीं कृ॒धि यो अ॒स्मा अ॒भि॒दा॒सति॑ ॥

इ॒न्द्र क्ष॒त्रम॒भि वा॒ममो॒जो ऽजा॑य॒था वृ॒षभ॑ च॒र्षणी॑नां ।

अपा॑ऽनु॒दो ज॒नम॑मि॒त्र य॒न्त मु॒रुं दे॒वेभ्यो॑ अ॒कृ॒णो॒रु लो॒कं ॥

(Appearing in TS- 1.6.12.4)

2.5.12.5 इ॒न्द्रि॒याणि॑ श॒तक्र॑तो> [23], ऽनु॒ ते दा॒यि> [24]

इ॒न्द्रि॒याणि॑ श॒तक्र॑तो या ते ज॒नेषु॑ प॒ञ्च॒सु ।

इ॒न्द्र ता॒नि त आ वृ॑णे ॥

अ॒नु ते दा॒यि म॒ह इ॒न्द्रि॒याय॑ स॒त्राते॑ वि॒श्वम॑नु वृ॒त्रह॑त्ये ॥

अ॒नु क्ष॒त्रम॑नु स॒हो य॒ज॒त्रेन्द्र॑ दे॒वेभि॑रनु ते नृ॒षह्ये॑ ॥

(Appearing in TS- 1.6.12.1)

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

2.6 द्वितीयकाण्डे षष्ठः प्रश्नः – अवशिष्टकर्माभिधानं

TS 2.6.1.1

स॒मि॒धो॑ य॒जति॑ व॒स॒न्तमे॒वर्तू॑नाम॒व रु॒न्धे॑ त॒नू॒नपा॑तं॒ यँ॒जति॑ ग्री॒ष्ममे॒वाव॑
रु॒न्ध इ॒डो॑ य॒जति॑ व॒र्षा ए॒वाव॑ रु॒न्धे॑ ब॒र्हि॒र्य॑जति॒ शर॑दमे॒वाव॑ रु॒न्धे॑
स्वा॒हाका॑रं॒ यँ॒जति॑ हे॒म॒न्तमे॒वाव॑ रु॒न्धे॑ तस्मा॒त् स्वा॒हाकृ॑ता हे॒मन्
प॒शवो॑ ऽव॒ सी॒दन्ति॑ स॒मि॒धो॑ य॒जत्यु॑ष॒स ए॒व दे॒वता॑नाम॒व रु॒न्धे॑
त॒नू॒नपा॑तं॒ यँ॒जति॑ य॒ज्ञमे॒वाव॑ रु॒न्धे॑ – [] 1

TS 2.6.1.2

इ॒डो॑ य॒जति॑ प॒शू॒नेवा॑व रु॒न्धे॑ ब॒र्हि॒र्य॑जति॒ प्र॒जामे॒वाव॑ रु॒न्धे॑ स॒मा॒नय॑त
उ॒प॒भृ॒तस्ते॒जो॒ वा आ॒ज्यं॑ प्र॒जा ब॒र्हिः॑ प्र॒जास्वे॒व ते॒जो॑ द॒धाति॑
स्वा॒हाका॑रं॒ यँ॒जति॑ वा॒चमे॒वाव॑ रु॒न्धे॑ द॒श सं प॑द्यन्ते॒ दशा॑क्षरा
वि॒राड॑न्नं॒ वि॒राड् वि॒राजै॒वान्नाद्य॑म॒व रु॒न्धे॑ स॒मि॒धो॑ य॒जत्य॒स्मिन्ने॒व
लो॒के प्र॑ति तिष्ठति॒ तनू॑नपा॒तं यँ॒जति॑ – [] 2

TS 2.6.1.3

य॒ज्ञ ए॒वान्तरि॑क्षे॒ प्रति॑ ति॒ष्ठती॒डो य॑जति प॒शुष्वे॒व प्रति॑ तिष्ठति
 ब॒र्हि॒र्यज॑ति य ए॒व दे॒वयानाः॑ पन्था॒नस्तेष्वे॒व प्रति॑ तिष्ठति स्वाहाका॒रं
 य॑जति सु॒वर्ग ए॒व लो॒के प्रति॑ तिष्ठत्ये॒तावन्तो॑ वै दे॒वलो॒कास्तेष्वे॒व
 यथा॑पूर्वं प्रति तिष्ठति दे॒वासुरा॑ ए॒षु लो॒केष्वस्पर्द्ध॑न्त ते दे॒वाः
 प्र॒याजै॑-रे॒भ्यो लो॒केभ्यो॑ ऽसुरा॒न् प्राणु॑दन्त तत् प्र॒याजानां॑ - [] 3

TS 2.6.1.4

प्र॒याज॒त्वं य॑स्यै॒वं वि॒दुषः॑ प्र॒याजा इ॒ज्यन्ते॒ प्रैभ्यो॑ लो॒केभ्यो॑
 भ्रातृ॑व्यान्नुद॒ते ऽभि॒क्रामं॑ जुहोत्य॒भिजित्यै॑ यो वै प्र॒याजानां॑ मिथु॒नं
 वे॒द प्र प्र॒जया॑ प॒शुभि॑ मिथु॒नैर्जा॑यते स॒मिधो॑ ब॒ह्वीरि॑व यजति
 तनू॑नपा॒तमे॒कमि॑व मिथु॒नं तदि॒डो ब॒ह्वीरि॑व यजति ब॒र्हि-रे॒कमि॑व
 मिथु॒नं तदे॒तद्-वै प्र॒याजानां॑ मिथु॒नं य॑ एवं वे॒द प्र - [] 4

TS 2.6.1.5

प्र॒जया॑ प॒शुभि॑ मिथु॒नैर्जा॑यते दे॒वानां॑ वा अ॒निष्टा दे॒वता॑
 आस॒न्नथा॑सुरा य॒ज्ञ-म॒जिघा॑स्सन् ते दे॒वा गा॒यत्रीं॑ व्यौह॒न्
 पञ्चा॑क्षराणि प्रा॒चीनानि॑ त्रीणि प्र॒तीची॑नानि ततो॒ वर्म॑ य॒ज्ञाया॑भव॒द्वर्म॑

यज॑मानाय॒ यत् प्र॑या॒जानू॒याजा॒ इ॒ज्यन्ते॒ वर्मे॑व तद्य॒ज्ञाय॑ क्रियते
 वर्म॑ यज॑मानाय॒ भ्रातृ॑व्याभिभूत्यै॒ तस्मा॑द्-वरू॒थं पु॒रस्ता॑द्-वर्षी॒यः
 प॒श्चाद्ध॑सीयो दे॒वा वै पु॒रा रक्षो॑भ्य - [] 5

TS 2.6.1.6

इति॑ स्वा॒हाका॒रेण॑ प्र॒याजे॑षु य॒ज्ञं स॒ंस्था॑प्यमपश्यन् तञ्च
 स्वा॒हाका॒रेण॑ प्र॒याजे॑षु स॒मस्था॑पयन् वि वा ए॒तद्-य॒ज्ञं छि॑न्दन्ति यथ्
 स्वा॒हाका॒रेण॑ प्र॒याजे॑षु स॒ंस्था॑पयन्ति प्र॒याजा॑निष्ट्वा ह॒वीं ऽप्य॑भि
 धा॒रय॑ति य॒ज्ञस्य॒ सन्त॑त्या अथो ह॒विरे॒वाक॑रथो यथापूर्वमुपैति पि॒ता
 वै प्र॒याजाः प्र॒जा ऽनू॒याजा॒ यत् प्र॒याजा॑निष्ट्वा ह॒वीं ऽप्य॑भिधा॒रय॑ति
 पितै॑व तत् पु॒त्रेण॒ साधा॑रणं - [] 6

TS 2.6.1.7

कुरु॑ते तस्मा॑दाहु॒र्यश्चै॒वं वै॒द यश्च॒ न क॒था पु॒त्रस्य॒ केवलं॑
 क॒था सा॑धा॒रणं पि॒तुरि॒त्यस्क॑न्नमे॒व तद्-यत् प्र॒याजे॑ष्विष्टेषु॒ स्कन्द॑ति
 गा॒यत्र्यै॑व तेन॒ गर्भं॑ धत्ते सा प्र॒जां प॒शून् यज॑मानाय प्र जनयति ॥ 7
 (य॒जति॑ य॒ज्ञा मे॒वाव॑ रुन्धे - त॒नून॑पातं य॒जति॑ - प्र॒याजा॑ना
 मे॒वं वै॒द प्र - रक्षो॑भ्यः - सा॑धा॒रणं - पञ्च॑त्रिंशच्च) (A1)

TS 2.6.2.1

चक्षु॑षी॒ वा ए॒ते य॒ज्ञस्य॑ यदाज्य॑भा॒गौ यदाज्य॑भा॒गौ यज॑ति
चक्षु॑षी ए॒व तद्-य॒ज्ञस्य॑ प्र॒ति द॑धाति पूर्वा॒र्द्धे जु॑होति तस्मात्
पूर्वा॒र्द्धे चक्षु॑षी प्र॒बाहु॑ग्-जुहोति तस्मात् प्र॒बाहु॑क् चक्षु॑षी दे॒वलो॒कं
ँवा अ॒ग्निना॑ यज॑मानो ऽनु पश्यति पि॒तृलो॒कं सोमे॑नोत्तरा॒र्द्धे
ऽग्नये॑ जुहोति दक्षिणा॒र्द्धे सोमा॑यै॒वमि॒व हीमौ॑ लो॒काव॒नयो॑
लो॒कयो॑रनु॒ख्यात्यै॑ राजा॒नौ वा ए॒तौ दे॒वता॑नां - [] 8

TS 2.6.2.2

ँयद॒ग्नीषो॑मावन्तरा दे॒वता॑ इज्येते दे॒वता॑नां वि॒धृत्यै॑ तस्माद्-रा॒ज्ञा
मनु॑ष्या वि॒धृता ब्र॑ह्मवा॒दिनो॑ वदन्ति किं तद्-य॒ज्ञे यज॑मानः कुरुते
येना॒न्यतो॑दतश्च प॒शून् दा॒धारो॑भयतो॒दत-श्चेत्यृ॑च-म॒नूच्याऽऽज्य॑भागस्य
जुषा॑णेन यजति तेना॒न्यतो॑दतो दा॒धारर्च॑म॒नूच्य॑ ह॒विष
ऋ॒चा यज॑ति तेनो॑भयतो॒दतो दा॒धार मूर्द्ध॑न्वती पु॒रोनु॒वाक्या॑ भवति
मूर्द्धा॑नमे॒वैनं॑ स॒माना॑नां करोति - [] 9

TS 2.6.2.3

नियु॒त्वत्या॑ यजति॑ भ्रातृ॑व्यस्यै॒व प॒शून् नि यु॑वते के॒शिन॑ꣳह
 दा॒भ्यं के॒शी सा॒त्यका॑मिरुवाच स॒प्तप॑दां ते शक्वरीꣳ श्वो य॒ज्ञे
 प्रयो॒क्तासे॒ यस्यै॑ वी॒र्येण॑ प्र जा॒तान् भ्रातृ॑व्यान्नुदते॒ प्रति॑ जनि॒ष्यमा॑णान्
 यस्यै॑ वी॒र्येणो॒भयो॑ लो॒कयो॑ ज्योति॑ र्धत्ते यस्यै॑ वी॒र्येण॑
 पूर्वा॒र्धेना॑न॒ड्वान् भु॑नक्ति जघना॒र्धेन॑ धे॒नुरिति॑ पु॒रस्ता॑ल्लक्ष्मा
 पुरो॑नुवा॒क्या भ॑वति जा॒ताने॒व भ्रातृ॑व्यान् प्र णुदत
 उप॑रि॒ष्टाल्लक्ष्मा॑ – [] 10

TS 2.6.2.4

या॒ज्या जनि॒ष्यमा॑णाने॒व प्रति॑ नुदते पु॒रस्ता॑ल्लक्ष्मा पुरो॑नुवा॒क्या
 भवत्य॒स्मिन्ने॒व लो॒के ज्योति॑र्धत्त उप॑रि॒ष्टाल्लक्ष्मा॑ या॒ज्या ऽमु॒ष्मिन्ने॒व
 लो॒के ज्योति॑र्धत्ते ज्योति॑ष्मन्तावस्मा इ॒मौ लो॒कौ भ॑वतो॒ य ए॒वं वैद॑
 पु॒रस्ता॑ल्लक्ष्मा पुरो॑नुवा॒क्या भ॑वति तस्मात् पूर्वा॒र्धेना॑न॒ड्वान्
 भु॑नक्त्युप॑रि॒ष्टाल्लक्ष्मा॑ या॒ज्या तस्मा॑ज्जघना॒र्धेन॑ धे॒नुर्य ए॒वं वैद॑ भुङ्क्ते
 ए॒नमे॒तौ व॒ज्र आ॒ज्यं व॒ज्र आ॒ज्यभा॑गौ – [] 11

TS 2.6.2.5

वज्रो॑ वषट्कारस्त्रिवृ॑तमे॒व वज्रं॑ सम्भृत्य॑ भ्रातृ॑व्याय॒ प्र
हर॑त्यछम्बट्कार-मप॒गूर्य॑ वषट् करोति॑ स्तृत्यै॑ गाय॒त्री पु॒रोनु॒वाक्या॑
भवति॑ त्रिष्टु॒ग् या॒ज्या ब्र॒ह्मन्ने॒व क्ष॒त्रम॒न्वारं॑भयति॒ तस्माद्ब्रा॒ह्मणो॑
मुख्यो॑ मुख्यो॑ भवति॒ य एवं॑ वेद॒ प्रैवैनं॑ पु॒रोनु॒वाक्यया॑ ऽऽह
प्र ण॑यति॒ या॒ज्यया॑ ग॒मयति॑ वषट्कारेणै॒वैनं॑ पु॒रोनु॒वाक्यया॑ दत्ते
प्र य॑च्छति॒ या॒ज्यया॑ प्रति - [] 12

TS 2.6.2.6

वषट्कारेण॑ स्थापयति॒ त्रि॒पदा॑ पु॒रोनु॒वाक्या॑ भवति॒ त्रय॑ इ॒मे लो॒का
ए॒ष्वेव॑ लो॒केषु॑ प्रति॒ तिष्ठति॑ चतु॒ष्पदा॑ या॒ज्या चतु॒ष्पद॑ ए॒व प॒शून॑व रुन्धे
द्व्यक्ष॑रो वषट्कारो॒ द्वि॒पाद्-य॑जमानः प॒शुष्वे॒वोप॑रिष्ठात् प्रति॒ तिष्ठति॑
गाय॒त्री पु॒रोनु॒वाक्या॑ भवति॒ त्रिष्टु॒ग् या॒ज्यैषा॑ वै स॒प्तप॑दा शक्वरी
यद्-वा॑ ए॒तया॑ दे॒वा अ॑शि॒क्षन् तद॑शक्नुवन्. य एवं॑ वेद
शक्नो॑त्येव () यच्छि॑क्षति ॥ 13

(दे॒वता॑नां - करो॑त्यु - परि॑ष्टाल्लक्ष्मा - ऽऽज्य॑भागौ - प्रति॑ -
शक्नो॑त्येव - द्वे च॑) (A2)

TS 2.6.3.1

प्र॒जाप॑ति॒ दे॒वेभ्यो॑ य॒ज्ञान् व्यादि॑श॒त् स आ॒त्मन्नाज्य॑मधत्त॒ तं दे॒वा
अ॒ब्रुव॑न्नेष॒ वाव॑ य॒ज्ञो यदा॑ज्यम॒प्येव॑ नो ऽत्रा॒स्त्विति॑ सो॒ ऽब्रवी॑द्-य॒ज्ञान्.
व आ॒ज्यभा॑गावुप॒ स्तृणा॑न॒भि घा॑रयानि॒ति तस्मा॑द्-यज॒न्त्याज्य॑भा॒गावुप॑
स्तृ॒णन्त्य॑भि॒ घा॑रयन्ति॒ ब्रह्म॑वा॒दिनो॑ वदन्ति॒ कस्मा॑त् स॒त्याद्-
या॒तया॑मा॒न्यन्या॑नि॒ हवी॑ऽष्यया॒तयाम॑-मा॒ज्यमि॑ति प्राजाप॒त्य - [] 14

TS 2.6.3.2

-मि॒ति ब्रू॑या॒दया॑तयामा॒ हि दे॒वानां॑ प्र॒जाप॑तिरि॒ति छन्दा॑ऽसि
दे॒वेभ्यो॑ ऽपा॒क्राम॑न् न वो॒ ऽभा॒गानि॑ ह॒व्यं वक्ष्या॑म॒ इति॑ तेभ्य
ए॒त-च॑चतुरव॒त्त-म॑धारयन् पुरो॒नुवा॑क्यायै या॒ज्यायै॑ दे॒वता॑यै
वष॑ट्का॒राय॑ यच्चतुरव॒त्तं जु॒होति॑ छन्दा॑ऽस्येव॒ तत् प्री॑णाति॒ तान्य॑स्य
प्री॒तानि॑ दे॒वेभ्यो॑ ह॒व्यं वह॑न्त्यङ्गि॒रसो॑ वा इ॒त उत्त॑माः सु॒वर्गं
लो॒कमा॑यन् तदृष॑यो य॒ज्ञवा॒स्त्वभ्य॑वायन् ते - [] 15

TS 2.6.3.3

ऽप॑श्यन् पुरो॒डाशं॑ कूर्मं भू॒तऽस॑र्पन्तं तम॒ब्रुव॑न्निन्द्रा॒य ध्रि॑यस्व
बृ॒हस्प॑तये ध्रि॒यस्व॑ वि॒श्वेभ्यो॑ दे॒वेभ्यो॑ ध्रि॒यस्वेति॑ स नादि॑ध्रयत्

तम॑ब्रुवन्न॒ग्नये॑ ध्रिय॒स्वेति॑ सो॒ ऽग्नये॑ ऽदि॒ध्रय॑त॒ यदा॑ग्नेयो-
 ऽष्टा॑कपालो-ऽमावा॒स्यायां॑ च पौर्ण॒मास्यां॑ चाच्यु॒तो भव॑ति
 सुव॑र्गस्य॒ लो॒कस्या॒भिजि॑त्यै तम॑ब्रुवन् क॒था ऽहा॑स्था इत्यनु॒पाक्तो॑
 ऽभू॒वमित्य॑ब्रवीद्-यथा॑ ऽक्षो॑ ऽनु॒पाक्तो॑ - [] 16

TS 2.6.3.4

ऽवा॒च्छत्ये॒वमवा॑ऽऽर॒मित्यु॑परि॒ष्टा-द॒भ्यज्या॒धस्ता॑-दुपा॑नक्ति सुव॒र्गस्य॑
 लो॒कस्य॑ सम॒ष्ट्यै सर्वा॑णि क॒पालान्य॑भि प्रथयति तावतः
 पुरो॑डाशानमुष्मिन् ँलो॒के ऽभि॑ जयति॒ यो विद॑ग्धः स नैर्ऋ॒तो यो
 ऽशृ॑तः स रौ॒द्रो यः शृ॑तः स सदे॒वस्तस्मा॑दविदहता शृ॒तंकृ॑त्यः
 सदे॒वत्वाय॑ भस्म॑ना॒ ऽभि वा॑सयति॒ तस्मान्मा॑सेनास्थि॒ छन्नं॑
 वे॒देना॒भि वा॑सयति॒ तस्मात् - [] 17

TS 2.6.3.5

केशैः॑ शिरः॑ छन्नं प्रच्यु॒तं वा ए॒तद॒स्माल् लो॒काद॑गतं देवलो॒कं
 यच्छृ॑तं ह॒विरन॑भिघारित-मभि॒घार्योद्-वा॑सयति देव॒त्रैवैन॑द्-गमयति॒
 यद्ये॒कं क॒पालं॑ नश्येदे॒को मा॑सः सँव॒त्सर॑स्यानवे॒तः स्याद॑थ यज॑मानः

प्रमी॑येत॒ यद् द्वे॑ नश्येतां॒ द्वौ मा॑सौ सँव॒थ्सर॑स्यानवेतौ॒ स्याता॑मथ॒
यज॑मानः प्रमी॑येत स॒ङ्ख्या॑योद्-वास॑यति॒ यज॑मानस्य - [] 18

TS 2.6.3.6

गो॑पी॒थाय॒ यदि॒ नश्ये॑दा॒श्विनं॑ द्वि॒कपालं॑ निर्व॑पेद् द्यावा॑पृथि॒व्य-
मेक॑कपालम॒श्विनौ॒ वै दे॒वानां॑ भि॒षजौ॒ ताभ्या॑मेवास्मै॒ भेष॑जं
करो॑ति द्यावा॑पृथि॒व्य एक॑कपालो भवत्य॒नयो॒र्वा ए॒तन्न॑श्यति॒ यन्न॑श्य-
त्य॒नयो॒रेवैन॑द्-विन्दति॒ प्रति॑ष्ठित्यै ॥ 19

(प्र॒जा॒पत्यं॑ - ते - ऽक्षो॑ऽनु॒पाक्तो॑ - वे॒देना॒भि वा॑सयति॒ तस्मा॑द् -
यज॑मानस्य - द्वा॒त्रिं॑शच्च) (A3)

TS 2.6.4.1

दे॒वस्य॑ त्वा स॒वितुः॑ प्र॒सव॑ इति॒ स्फ्य॑मा दत्ते॒ प्रसू॑त्या अ॒श्विनौ॑
र्बा॒हुभ्या॑मि॒त्याहा॒श्विनौ॑ हि दे॒वाना॑म॒ध्वर्यू॑ आस्तां॒ पूष्णो॑
हस्ता॑भ्यामि॒त्याह॒ यत्यै॑ श॒तभृ॑ष्टिर॒सि वा॑नस्प॒त्यो द्वि॑षतो॒ वध॑ इत्या॒ह
वज्र॑मे॒व तथ् स॑श्यति॒ भ्रातृ॑व्याय॒ प्रह॑रिष्यन्थ् स्त॒म्बय॑जुर्. ह॒रत्ये॑
ता॒वती॒ वै पृ॑थि॒वी या॑वती॒ वेदि॑स्तस्या॒ एता॑वत॒ एव॑
भ्रातृ॑व्यं निर्भ॑जति - [] 20

TS 2.6.4.2

तस्मान्नाभा॒गं निर्भ॑जन्ति॒ त्रि॒र॒हर॑ति॒ त्रय॑ इ॒मे लो॒का ए॒भ्य ए॒वैनं॑
लो॒केभ्यो॑ निर्भ॑जति॒ तूष्णीं॑ चतु॒र्थं ह॑रत्य॒परि॑मितादे॒वैनं॑
निर्भ॑जत्यु॒द्धन्ति॒ यदे॒वास्या॑ अमे॒द्ध्यं तदप॑ ह॒न्त्युद्ध॑न्ति
तस्मा॒दोष॑धयः॒ परा॑ भवन्ति॒ मूलं॑ छिन॒त्ति भ्रातृ॑व्यस्यै॒व मूलं॑ छिन॒त्ति
पितृ॑दे॒वत्या ऽति॑खा॒तेय॑तीं खन॒ति प्र॒जाप॑तिना – [] 21

TS 2.6.4.3

यज्ञ॒मुखेन॑ संमि॒तामा॑ प्रति॒ष्ठायै॑ खन॒ति यज॑मानमे॒व प्रति॑ष्ठां गमयति
दक्षि॑णतो॒ वर्षी॑यसीं करोति॒ देव॑यजनस्यै॒व रूप॑म॒कः पु॒रीष॑वतीं करोति
प्र॒जा वै प॒शवः॑ पु॒रीषं॑ प्र॒जयै॒वैनं॑ प॒शुभिः॑ पु॒रीष॑वन्तं करोत्यु॒त्तरं॑ परि॒ग्राहं॑
परि॑ गृह्णात्ये॒तावती॑ वै पृथि॒वी या॑वती वेदि॒स्तस्या॑ ए॒तावत॑ ए॒व भ्रातृ॑व्यं
निर्भ॑ज्याऽऽत्मन॒ उत्तरं॑ परि॒ग्राहं॑ परि॑ गृह्णाति॒ क्रूर॑मि॒व वा – [] 22

TS 2.6.4.4

ए॒तत् करो॑ति॒ यद्वेदिं॑ करोति॒ धा अ॑सि स्व॒धा अ॒सीति॑ योयु॒प्यते॑ शान्त्यै
प्रोक्ष॑णीरा सादय॒त्यापो॑ वै रक्षो॒घ्नी रक्ष॑साम॒पहत्यै॑ स्म्यस्य॒वर्त्मन्॑
साद॑यति॒ यज्ञ॑स्य सन्तत्यै॒यं द्वि॒ष्यात् तं॑ ध्याये॒च्छुचै॑वैनं—मर्पयति ॥ 23

(भजति - प्रजापतिने- व वै - त्रयस्त्रिंशच्च) (A4)

TS 2.6.5.1

ब्रह्मवादिनो वदन्त्यद्भिर्. हवींषि प्रौक्षीः केनाप इति ब्रह्मणेति
 ब्रूयादद्भि-र्ह्व हवींषि प्रोक्षति ब्रह्मणा ऽप इद्ध्माबर्हिः प्रोक्षति
 मेद्ध्यमेवैनत् करोति वेदिं प्रोक्षत्यृक्षा वा एषा ऽलोमका ऽमेद्ध्या
 यद्-वेदिर्मेद्ध्या-मेवैनां करोति दिवे त्वा ऽन्तरिक्षाय त्वा पृथिव्यै
 त्वेति बर्हिःसाद्य प्रो - [] 24

TS 2.6.5.2

-क्षत्येभ्य एवैनल्लोकेभ्यः प्रोक्षति क्रूरमिव वा एतत् करोति यत्
 खनत्यपो नि नयति शान्त्यै पुरस्तात् प्रस्तरं गृह्णाति मुख्यमेवैनं
 करोतीयन्तं गृह्णाति प्रजापतिना यज्ञमुखेन संमितं बर्हिः स्तृणाति
 प्रजा वै बर्हिः पृथिवी वेदिः प्रजा एव पृथिव्यां
 प्रति ष्ठापयत्यनतिदृश्जं स्तृणाति प्रजयैवैनं पशुभिरनतिदृश्जं
 करो- [] 25

TS 2.6.5.3

–त्युत्तरं ब॒र्हिषः॑ प्र॒स्तर॑ꣳ सा॒दय॑ति प्र॒जा वै ब॒र्हि र्यज॑मानः
 प्र॒स्तरो॑यज॒मान–मे॒वाय॑ज॒माना–दु॒त्तरं॑ करो॒ति तस्मा॑द्–
 यज॑मानो ऽय॒जमाना॑दु॒त्तरो॑ ऽन्तर्द॑धाति॒ व्यावृ॑त्या अ॒नक्ति॑ ह॒विष्कृत॑मे॒वैनꣳ
 सु॒वर्गं॑ लो॒कं ग॑मयति॒ त्रेधा॑ ऽन॒क्ति त्रय॑ इ॒मे लो॒का ए॒भ्य ए॒वैनं॑
 लो॒केभ्यो॑ ऽन॒क्ति न॒ प्रति॑ शृ॒णाति॒यत् प्र॑तिशृ॒णीया–द॒नूर्द्ध्वं॑ भा॒वुकं॑
 यज॑मानस्य स्यादु॒परी॑व प्र॒ हर॑ – [] 26

TS 2.6.5.4

–त्यु॒परी॑व हि सु॒वर्गो॑ लो॒को नि॑ यच्छति॒ वृष्टि॑मे॒वास्मै॑ नि॒ यच्छति॑
 ना॒त्यग्रं॑ प्र॒ हरे॑द्–यद॒त्यग्रं॑ प्र॒ हरे॑द्–त्यासा॒रिण्य॑द्द्व॒र्यो–ना॑शु॒का स्या॒न्न
 पु॒रस्ता॑त् प्र॒त्यस्ये॑द्–यत् पु॒रस्ता॑त् प्र॒त्यस्ये॑थ् सु॒वर्गाल्लो॒काद्–यज॑मानं
 प्र॒ति नु॑देत् प्रा॒ञ्चं प्र॒ हर॑ति॒ यज॑मानमे॒व सु॒वर्गं॑ लो॒कं ग॑मयति॒ न
 वि॒ष्वञ्चं॑ वि॒ युया॑द्–यद्–वि॒ष्वञ्चं॑ वि॒युया॑थ् – [] 27

TS 2.6.5.5

स्त्र्य॑स्य जा॒येतो॑र्द्ध्वमुद्–यो॒त्यू॑र्द्ध्वमि॒व हि पु॒ꣳसः पु॒माने॑वा॒स्य जा॒यते॑
 यथ् स्फ्ये॑न वो॒पवे॑षेण॒ वा यो॒युप्ये॑त स्तृ॒तिरे॑वा॒स्य सा॑ ह॒स्तेन॑ यो॒युप्ये॑ते

यज॑मानस्य गोपी॒थाय॑ ब्र॒ह्मवा॑दिनो॒ वद॑न्ति किं य॒ज्ञस्य॑ यज॒मान॑
इति॑ प्र॒स्तर॑ इति॒ तस्य॑ क्व सुव॒र्गो लो॒क इत्या॑हवनीय॒ इति॑ ब्रूयाद्-
यद्यत् प्र॒स्तर॑माहवनीये॑ प्र॒हरति॑ यज॒मानमे॒व - [] 28

TS 2.6.5.6

सुव॒र्गं लो॒कं ग॑मयति॒ वि वा ए॒तद्-यज॑मानो लि॒शते॒ यत् प्र॒स्तरं॑
यो॒युप्य॑न्ते ब॒र्हि॒रनु॑ प्र॒ हरति॑ शान्त्या॒ अनार॑म्भण॒ इव॑ वा ए॒तर्ह्य॑द्ध्व॒र्युः
स ई॒श्वरो॑ वे॒पनो॑ भ॒वितो॑र्द्ध्रुवा ऽसी॒तीमा॒मभि॑ मृ॒शती॒यं वै
ध्रुवा॑ ऽस्यामे॒व प्रति॑ तिष्ठति॒ न वे॒पनो॑ भ॒वत्य॑गा(३)न॒ग्नीदि॒त्याह॑
यद्-ब्रू॒याद्-ग॒न्नि॒रित्य॑ () -ग॒नाव॒ग्निं ग॑मये॒न्नि र्यज॑मानं
सुव॒र्गाल्लो॒काद्-भ॒जेद॑ग॒न्नित्ये॒व ब्रू॒याद्-यज॑मानमे॒व सुव॒र्गं
लो॒कं ग॑मयति ॥ 29

(आ॒साद्य॒ प्रा - न॑तिदृ॒श्जं करो॑ति - हरति - वि॒युयाद् -
यज॑मानमे॒वा-ग्निरि॑ति - स॒प्तद॑श च) (A5)

TS 2.6.6.1

अ॒ग्नेस्त्रयो॑ ज्याया॒सो भ्रा॑तर आस॒न् ते दे॒वेभ्यो॑ ह॒व्यं व॑हन्तः
प्रा॒मीय॑न्त सौ ऽग्निर॒बिभे॑दित्थं वाव॒स्य आ॒र्तिमा॑ऽऽ *रि॒ष्यती॒ति स

नि॒लाय॑त॒ सो ऽपः॑ प्रा॒वि॒शत् तं दे॒वताः॑ प्रै॒षमै॑च्छन् तं म॒थ्स्यः॑
 प्रा॒ब्रवी॑त् तम॑शप॒द्धिया॑धिया॒ त्वा व॑द्ध्य॒ासुर्यो॑ मा प्रा॒वोच॑ इति
 तस्मा॑न्म॒थ्स्यं॑ धि॒याधिया॑ घ्नन्ति श॒प्तो – [] 30

TS 2.6.6.2

हि तम॑न्ववि॒न्दन् तम॑ब्रुव॒न्नुप॑ न आ॒ वर्त॑स्व ह॒व्यं नो॑ व॒हेति॑
 सो ऽब्र॑वीद्-वरं॑ वृ॒णै यदे॒व गृही॑तस्याहु॒तस्य॑ ब॒हिःप॑रि॒धि स्क्व॑न्दात्
 तन्मे॒ भ्रात॑ृणां भा॒गधे॑यम॒सदिति॑ तस्मा॑द्-यद् गृही॑तस्याहु॒तस्य॑
 ब॒हिःप॑रि॒धि स्क्व॑न्दति॒ तेषां॑ तद्-भा॒गधे॑यं ता॒नेव॑ तेन॒ प्रीणा॑ति परि॒धीन्
 परि॑ दधाति॒ रक्ष॑साम॒पहत्यै॑ स॒ ऽस्पर्श॑यति – [] 31

TS 2.6.6.3

रक्ष॑साम॒नन्व॑व॒चारा॑य न पु॒रस्ता॑त् परि॑ दधा॒त्यादि॒त्यो ह्ये॒वोद्य॑न् पु॒रस्ता॑द्-
 रक्षा॑ऽस्यप॒हन्त्यु॑र्द्ध्वे स॒मिधा॑वा दधा॒त्युपरि॑ष्टादे॒व रक्षा॑ऽस्यप॒ हन्ति॑
 यजु॑षा ऽन्यां॑ तू॒ष्णीम॑न्यां मिथु॒नत्वा॑य द्वे आ॒ दधा॑ति द्वि॒पाद्-यज॑मानः
 प्रति॑ष्ठित्यै ब्र॒ह्मवा॑दिनो॒ वद॑न्ति स त्वै॑ यजेत॒ यो य॒ज्ञस्याऽऽर्त्या॑ वसी॒यान्थ॑
 स्या॑दिति॒ भूप॑तये॒ स्वाहा॑ भुवन॒पतये॑ स्वाहा॒ भूतानां॑ – [] 32

TS 2.6.6.4

पतये॑ स्वाहेति॑ स्क्॒न्नमनु॑ मन्त्रयेत॑ य॒ज्ञस्यै॒व तदा॑र्त्या यज॑मानो
वसी॑यान् भवति॑ भूयसी॒र्. हि दे॒वताः॑ प्री॒णाति॑ जा॒मि वा ए॒तद्-
य॒ज्ञस्य॑ क्रियते॒ यद॒न्वञ्चौ॑ पुरो॒डाशा॑वुपा॒शुयाज॑-मन्त्रा
यज॑त्यजा॒मित्वा॒याथो॑ मिथु॒नत्वा॒याग्नि॑रमु॒ष्मिन् ँ॒लोक॑ आसीद्-य॒मो
ऽस्मिन्॑ ते दे॒वा अ॑ब्रुवन्ने॒तेमौ॑ वि पर्यू॒हामे॒त्यन्ना॑द्येन दे॒वा अ॒ग्नि- [] 33

TS 2.6.6.5

-मु॒पामन्त्र॑यन्त रा॒ज्येन॑ पि॒तरो॑ य॒मं तस्मा॑द॒ग्नि दे॒वाना॑मन्ना॒दो य॒मः
पित॑रणा॒ राजा॑ य ए॒वं वैद॑ प्र रा॒ज्यमन्ना॑द्य-मा॒प्नोति॑ तस्मा॑ ए॒तद्-
भा॒गधे॑यं प्राय॑च्छन् यद॒ग्नये॑ स्विष्ट॒कृते॑ ऽव॒द्यन्ति॑ यद॒ग्नये॑ स्विष्ट॒कृते॑
ऽव॒द्यति॑ भा॒गधे॑येनै॒व तद्-रु॒द्रः स॑म॒र्द्धय॑ति स॒कृत्स॑कृ॒दव॑ द्यति
स॒कृदिव॑ हि रु॒द्र उत्तरा॑र्द्धाद॒व द्यत्ये॑षा वै रु॒द्रस्य॑ - [] 34

TS 2.6.6.6

दि॒ख् स्वा॒यामे॒व दि॒शि रु॒द्रं नि॒रव॑दयते द्वि॒रभि॑ घा॒रय॑ति
चतु॑रव॒त्तस्या॑ऽऽप॒त्यैप॒शवो॑ वै पूर्वा॑ आहु॒तय॑ ए॒ष रु॒द्रो यद॑ग्निर्यत्
पूर्वा॑ आहु॒तीर॑भि जुहु॒याद्-रु॒द्राय॑ प॒शून॑पि द॒ध्याद॑प॒शुर्य॑ज॒मानः॑

स्यादतिहाय पूर्वा आहुतीर्जुहोति पशूनां गोपीथाय ॥ 35

(शप्तः - स्पर्शयति - भूतानां - मग्निं - रुद्रस्य -
सप्तत्रिंशच्च) (A6)

TS 2.6.7.1

मनुः पृथिव्या यज्ञियमैच्छथ् स घृतं निषिक्तमविन्दथ् सो ऽब्रवीत् को
ऽस्येश्वरो यज्ञे ऽपि कर्तोरिति तावब्रूतां मित्रावरुणौ गो-रेवाऽऽवमीश्वरौ
कर्तौः स्व इति तौ ततो गां समैरयतां सा यत्रयत्र न्यक्रामत्
ततो घृतमपीड्यत तस्माद्-घृतपद्युच्यते तदस्यै
जन्मोपहूतं रथन्तरं सह पृथिव्येत्याहे - [] 36

TS 2.6.7.2

-यं वै रथन्तरमिमामेव सहान्नाद्-येनोप ह्वयत उपहूतं वामदेव्यं
सहान्तरिक्षेणेत्याह पशवो वै वामदेव्यं पशूनेव सहान्तरिक्षेणोप ह्वयत
उपहूतं बृहथ् सह दिवेत्याहैरं वै बृहदिरामेव सह दिवोप ह्वयत
उपहूताः सप्त होत्रा इत्याह होत्रा एवोप ह्वयत उपहूता धेनुः-[] 37

TS 2.6.7.3

स॒हर्ष॑भे॒त्याह॑ मि॒थुन॑मे॒वोप॑ ह॒यत॑ उप॒हूतो॑ भ॒क्षः॑ स॒खेत्या॑ह
 सोम॑पी॒थमे॒वोप॑ ह॒यत॑ उप॒हूताँ॑(4) हो इ॒त्याहाऽऽत्मान॑मे॒वोप॑ ह॒यत॑
 आ॒त्मा ह्यु॑प॒हूतानां॑ व॒सिष्ठ॑ इ॒डामु॑प॒ ह॒यते॑ प॒शवो॑ वा इ॒डा प॒शूने॒वोप॑
 ह॒यते॑ च॒तुरु॑प॒ ह॒यते॑ च॒तुष्पा॑दो हि प॒शवो॑ मा॒नवी॒त्याह॑

मनु॒र्ह्येता॑- [] 38

TS 2.6.7.4

-म॒ग्रे ऽप॑श्यद्-घृ॒तप॒दीत्या॑ह॒ य दे॒वास्यै॑ प॒दाद्-घृ॒तम॑पी॒ड्यत॑
 तस्मा॑दे॒वमा॑ह॒ मैत्रा॑व॒रुणी॒त्याह॑ मि॒त्राव॑रु॒णौ ह्ये॒नाꣳ स॒मैर॑यतां
 ब्र॒ह्म दे॒वकृ॑त॒-मु॑प॒हूत॑मि॒त्याह॑ ब्र॒ह्मैवो॑प॒ ह॒यते॑ दै॒व्या अ॑ध्व॒र्यव॑
 उप॒हूता॑ उप॒हूता॑ मनु॒ष्या इ॒त्याह॑ दे॒वमनु॑ष्या॒नेवो॑प॒ ह॒यते॑ य इ॒मं
 य॒ज्ञम॑वा॒न् ये य॒ज्ञप॑तिं॒ व॒र्द्धा॑नि॒त्याह॑ - [] 39

TS 2.6.7.5

य॒ज्ञाय॑ चै॒व य॑ज॒मानाय॑ चाऽऽशि॒षमा॑ शा॒स्त उप॑हू॒ते द्या॑वापृ॒थिवी॑
 इ॒त्याह॑ द्या॒वापृ॒थिवी॑ ए॒वोप॑ ह॒यते॑ पू॒र्वजे॑ ऋ॒ताव॑री इ॒त्याह॑ पू॒र्वजे॑ ह्ये॒ते
 ऋ॒ताव॑री दे॒वी दे॒वपु॑त्रे इ॒त्याह॑ दे॒वी ह्ये॒ते दे॒वपु॑त्रे उप॒हूतो॑ ऽयं

य॒ज॒मा॒न इ॒त्याह॒ यज॒मा॒नमे॒वोप॒ ह्वय॒त उत्तर॒स्यां दे॒वय॒ज्याया॒मुप॒हूतो॒
भू॒यसि॒ हवि॒ष्करण॒ उप॒हूतो दि॒व्ये धाम॒न्नुप॒हूत - [] 40

TS 2.6.7.6

इ॒त्याह॒ प्र॒जा वा उत्तरा॑ दे॒वय॒ज्या प॒शवो॑ भू॒यो हवि॒ष्करण॑ सु॒वर्गो॑
लो॒को दि॒व्यं धामे॒दम-सी॒दमसी॒त्येव॑ य॒ज्ञस्य॑ प्रि॒यं धामो॑प ह्वय॒ते
वि॒श्वम॒स्य प्रि॒य-मु॒पहू॒तमि॒त्याहा-छं॑बट्कारमे॒वोप॒ ह्वय॒ते ॥ 41

(आ॒ह - धे॒नु- रेतां॑ - वै॒र्धानि॒त्याह॑ - धाम॒न्नुप॒हूत -
श्चतु॑स्त्रिं॒शच्च॑) (A7)

TS 2.6.8.1

प॒शवो॑ वा इ॒डा स्व॒यमा॑ द॒त्ते का॒ममे॒वाऽऽत्म॑ना प॒शूना॑मा द॒त्ते न ह्य॑न्यः
का॒मं प॒शूनां॑ प्र॒यच्छ॑ति वा॒चस्प॑तये त्वा हु॒तं प्रा॒ज्ञामी॒त्याह॑ वा॒चमे॒व
भा॒गधे॑येन प्रीणाति स॒दस॑स्प॒तये॒ त्वा हु॒तं प्रा॒ज्ञामी॒त्याह॑ स्व॒गाकृ॑त्यै
चतु॑रव॒त्तं भ॑वति ह॒विर्वै चतु॑रव॒त्तं प॒शवश्च॑तु॒रव॒त्तं य॒द्धोता॑
प्रा॒ज्ञीया॒द्धोता॑ - [] 42

TS 2.6.8.2

ऽऽर्ति॑मा॒च्छे॒द्-यद॒ग्नौ जु॒हुयाद्-रु॒द्राय॑ प॒शून॑पि द॒ध्याद॑प॒शुर्य॑ज॒मानः॑
 स्याद्-वा॒चस्प॑तये त्वा हु॒तं प्रा॒श्जामी॑त्याह प॒रोक्ष॑मे॒वैन-ज्जु॑होति
 सद॑सस्प॒तये त्वा हु॒तं प्रा॒श्जामी॑त्याह स्व॒गाकृ॑त्यै प्रा॒श्जन्ति॑ ती॒र्थ ए॒व
 प्रा॒श्जन्ति॑ दक्षि॒णां द॑दाति ती॒र्थ ए॒व दक्षि॒णां द॑दाति वि

वा ए॒तद्-य॒ज्ञं - [] 43

TS 2.6.8.3

छि॒न्दन्ति॑ यन्म॒द्ध्यतः॑ प्रा॒श्जन्त्य॒द्भि-र्मा॑र्जयन्त॒ आपो॑ वै सर्वा॑ दे॒वता॑
 दे॒वता॑भिरे॒व य॒ज्ञं सं त॑न्वन्ति दे॒वा वै य॒ज्ञाद्-रु॒द्रम॑न्त-रा॒यन्थ् स
 य॒ज्ञम॑वि॒द्ध्यत् तं दे॒वा अ॒भि स॑म॒गच्छ॑न्त॒ कल्प॑तां न इ॒दमि॑ति
 ते ऽब्रु॑वन्थ् स्वि॒ष्टं वै न इ॒दं भ॑विष्यति॒ यदि॑म॒ रा॒धयि॑ष्याम॒ इति॑ तथ्
 स्वि॒ष्टकृ॑तः स्वि॒ष्टकृ॑त्त्वं तस्या ऽऽवि॒द्धं नि - [] 44

TS 2.6.8.4

-र॒कृन्त॑न्. यवे॒न स॑मि॒तं तस्मा॑द्-यव॒मात्र॑म॒व द्ये॑द्-यज्ज्यायो ऽव॒द्-
 ये॒द्-रो॒पये॑त् तद्-य॒ज्ञस्य॑ यदु॒प च॑ स्तृणीयाद॒भि
 च घा॒रये॑दु॒भयतः॑ स॒श्वायि॑ कुर्याद॒वदा॑या॒भि घा॑रयति॒ द्विः सं प॑द्यते

द्वि॒पाद्-य॒ज॒मा॒नः॑ प्र॒ति॒ष्ठि॒त्यै॑ यत् ति॒र॒श्ची॒न-म॒ति॒ह॒रे॒द॒न॒भि॒वि॒द्धं॑
 य॒ज्ञ॒स्या॒भि वि॒द्ध्ये॒द॒ग्रे॒ण॑ परि॑ ह॒रति॑ ती॒र्थे॒नै॒व परि॑ ह॒रति॑ तत् पू॒ष्णे
 पर्य॑हरन् तत् - [] 45

TS 2.6.8.5

पू॒षा प्रा॒श्य द॒तो ऽरु॒णत् तस्मा॑त् पू॒षा प्र॒पि॒ष्टभा॑गो ऽद॒न्त॒को
 हि तं दे॒वा अ॒ब्रुव॑न् वि वा अ॒य-मा॒र्द्ध्य॒प्रा॒शि॒त्रि॒यो वा अ॒यम॑भू॒दिति॑
 तद्-बृ॒ह॒स्प॒तये॑ पर्य॑हरन्थ् सो ऽबि॒भेद्-बृ॒ह॒स्प॒ति॒रि॒त्थं वा॒व स्य
 आ॒र्ति॒माऽऽ *रि॒ष्य॒तीति॑ स ए॒तं म॒न्त्र॒मप॑श्यथ् सूर्य॑स्य त्वा चक्षु॑षा प्रति॑
 प॒श्या॒मीत्य॑ब्रवी॒न्न हि सूर्य॑स्य चक्षुः - [] 46

TS 2.6.8.6

किं च॒न हि॒न॒स्ति॒ सो ऽबि॒भेत् प्र॒ति॒गृ॒ह्णन्तं॑ मा हि॒ऽसि॒ष्य॒तीति॑
 दे॒वस्य॑ त्वा स॒वि॒तुः प्र॒स॒वे ऽश्वि॒नो ब॒हु॒भ्यां पू॒ष्णो ह॒स्ता॒भ्यां
 प्र॒ति गृ॒ह्णा॒मीत्य॑ब्रवीथ् स॒वि॒तृप्र॑सूत ए॒वैन॑द्ब्रह्म॒णा दे॒वता॑भिः
 प्र॒त्य॒गृ॒ह्णाथ् सो ऽबि॒भेत् प्रा॒श्न॒जन्तं॑ मा हि॒ऽसि॒ष्य॒तीत्य॒ग्ने॒स्त्वा
 ऽऽस्ये॑न प्रा॒श्ना॒मीत्य॑ब्रवी॒न्न ह्य॒ग्ने॒रा॒स्यं किञ्च॒न
 हि॒न॒स्ति॒ सो ऽबि॒भेत् - [] 47

TS 2.6.8.7

प्रा॒शितं॑ मा हि॒ ऽसि॒ष्य॒तीति॑ ब्रा॒ह्म॒णस्यो॒दरे॒णेत्य॑ ब्रवी॒न्न हि॑ ब्रा॒ह्म॒णस्यो॒दरं॑
किं॑ च॒न हि॒नस्ति॑ बृ॒हस्प॑ते॒र्ब्रह्म॑णेति॒ स हि॑ ब्र॒ह्मि॒ष्ठो ऽप॒ वा ए॒तस्मात्॑
प्रा॒णाः क्रा॑मन्ति॒ यः प्रा॑शि॒त्रं प्रा॒ज्ञा॒त्यद्भि॑-र्मा॒र्जयि॑त्वा प्रा॒णान्थ्
सं मृ॑शते॒ ऽमृतं॑ वै प्रा॒णा अ॒मृत॑मापः प्रा॒णाने॒व यथा॑स्था॒नमुप॑
ह्वय॑ते ॥ 48

(प्रा॒ज्ञीया॒द्धोता॑ - य॒ज्ञं - नि - र॒हर॑न्त - च॒क्षु - रा॒स्यं किञ्च॑न
हि॒नस्ति॑ सोऽ॒बिभे॑ - च॒तुश्च॑त्वारि॒ंशच्च॑) (A8)

TS 2.6.9.1

अ॒ग्नी॒ध आ॑ द॒धा-त्य॑ग्नि॒मुखा॑-ने॒वर्तून्॑ प्री॒णाति॑ स॒मिध॑मा
द॒धात्यु॑त्तरा॒सा-मा॑हु॒तीनां॑ प्र॒तिष्ठि॑त्या॒ अथो॑ स॒मिद्व॑त्ये॒व जु॑होति
प॒रिधी॑न्थ् सं मा॒र्ष्टि पु॒नात्ये॒वैनान्थ्॑ स॒कृथ्स॑कृथ् सं मा॒र्ष्टि प॒राडि॑व
ह्ये॒तर्.हि॑ य॒ज्ञश्च॑तुः सं प॒द्यते॑ च॒तुष्पा॑दः प॒शवः॑ प॒शूने॒वाव रु॑न्धे ब्र॒ह्मन्
प्र स्था॑स्याम॒ इत्या॑हा॒त्र वा ए॒तर्.हि॑ य॒ज्ञः श्रि॒तो - [] 49

TS 2.6.9.2

यत्र॑ ब्र॒ह्मा यत्रै॑व य॒ज्ञः श्रि॒तस्त॑त ए॒वैन॑मा र॒भते॑ य॒द्धस्ते॑न
 प्र॒मी॒वै॒द्वेप॑नः स्या॒द्यच्छी॒र्ष्णा शी॑र्ष॒क्तिमा॑न्थ्-स्या॒द्-यत् तू॒ष्णी-
 मासी॑तासंप्र॒प्तो य॒ज्ञः स्या॒त् प्र ति॒ष्ठेत्ये॒व ब्रू॑याद्-वा॒चि वै य॒ज्ञः श्रि॒तो
 यत्रै॑व य॒ज्ञः श्रि॒तस्त॑त ए॒वैन॑ सं प्र य॒च्छति॑ दे॒व स॑वि॒तरे॒तत् ते

प्रा - [] 50

TS 2.6.9.3

-ऽऽहे॑त्याह प्र॒सू॒त्यै बृ॒हस्प॑ति ब्र॒ह्मे॑त्याह स हि ब्र॒ह्मि॑ष्ठः स य॒ज्ञं
 पा॒हि स य॒ज्ञप॑तिं पा॒हि स मां पा॒हीत्या॑ह य॒ज्ञाय॑ यज॒माना॑याऽऽत्म॒ने
 तेभ्य॑ ए॒वाऽऽशि॑ष॒मा शा॒स्ते ऽना॑र्त्या आ॒श्राव्या॑ऽऽह दे॒वान् य॒जेति॑
 ब्र॒ह्मवा॑दि॒नो वद॑न्ती॒ष्टा दे॒वता॑ अथ॑ क॒तम॑ ए॒ते दे॒वा इति॑ छ॒न्दा॒सीति॑

ब्रूयाद्-गाय॒त्रीं त्रि॒ष्टुभं॑ - [] 51

TS 2.6.9.4

जग॑ती-मि॒त्यथो॑ ख॒ल्वाहु॑र्ब्रा॒ह्मणा॑ वै छ॒न्दा॒सीति॑ ता॒नेव॑ तद्-य॒जति॑
 दे॒वानां॑ वा॒ इष्टा॑ दे॒वता॑ आ॒सन्न॑था॒ग्निर्नो॑द॒ज्वल॑त् तं दे॒वा
 आ॒हुती॑भि-र॒नूया॑जे॒ष्वन्व॑वि॒न्दन् यद॑नूया॒जान् यज॑त्य॒ग्निमे॒व तथ्

समिन्ध ए॒तदु॒र्वे॑ ना॒माऽऽसु॒र आ॒सी॒त् स ए॒तर्हि॑

य॒ज्ञस्याऽऽशि॒षम॒वृ॒ङ्क्ते॑ यद् ब्रू॒यादे॒त – [] 52

TS 2.6.9.5

–दु॒ द्यावा॑पृथि॒वी भ॒द्र–म॒भू॒दित्ये॒तदु॒–मे॒वाऽऽसु॒रं य॒ज्ञस्याऽऽशि॒षं
गम॑येदि॒दं द्यावा॑पृथि॒वी भ॒द्रम॒भू॒दित्ये॒व ब्रू॒याद्–य॒ज॒मा॒नमे॒व
य॒ज्ञस्याऽऽशि॒षं गम॑य॒त्यार्ध॑म॒ सू॒क्तवा॒कमु॒त न॑मोवा॒क–
मि॒त्याहे॒दम॒रा॒थस्मे॒ति वा॒वैत॑दा॒होप॑श्रि॒तो दि॒वः पृ॒थि॒व्यो॒रित्या॑ह
द्यावा॑पृथि॒व्योर्हि॑ य॒ज्ञ उप॑श्रि॒त ओ॒मन्व॑ती ते ऽस्मिन् य॒ज्ञे य॒ज॒मा॒न
द्यावा॑पृथि॒वी – [] 53

TS 2.6.9.6

स्ता॒मि॒त्याहाऽऽशि॒षमे॒वैता॑मा शा॒स्ते यद्–ब्रू॒यात् सू॒पाव॑सा॒ना च
स्व॒द्ध्यव॑सा॒ना चे॒ति प्र॒मायु॑को य॒ज॒मा॒नः स्याद्–य॒दा हि प्र॒मी॒य॒ते
ऽथे॒मामु॑पाव॒स्यति॑ सू॒पच॑र॒णा च॑ स्व॒धिच॑र॒णा चे॒त्ये॒व ब्रू॒याद्–
व॒री॒यसी॑मे॒वास्मै॑ ग॒व्यू॒ति॒मा शा॒स्ते न॑ प्र॒मायु॑को भव॒ति
तयो॑रा॒वि॒द्यग्नि॑रि॒दं ह॒विर॑जुष॒तेत्या॑ह या अ॒याक्ष॑म – [] 54

TS 2.6.9.7

दे॒वता॒स्ता अ॒रीर॒धामे॒ति वा॒वैत॒दाह॒ यन्न॑ नि॒र्दिशे॒त् प्र॒तिवे॒शं
 य॒ज्ञस्या॒ऽऽशी॒र्गच्छे॒दा शा॒स्ते ऽयं॑ य॒जमा॒नो ऽसा॒वित्या॑ह नि॒र्दिश्यै॒वैन॑
 सु॒वर्गं लो॒कं ग॒मय॒त्यायु॒रा शा॒स्ते सु॒प्रजा॒स्त्वमा॑ शा॒स्त
 इत्या॑हाऽऽशि॒षमे॒वै तामा॑ शा॒स्ते स॒जात॒वन॒स्यामा॑ शा॒स्त इत्या॑ह प्रा॒णा
 वै स॒जाताः प्रा॒णाने॒व – [] 55

TS 2.6.9.8

ना॒न्तरे॑ति तद॒ग्निर्दे॒वो दे॒वेभ्यो॑ व॒नते॑ व॒यम॒ग्नेर्मा॒नुषा॑ इत्या॑हा॒ग्निर्दे॒वेभ्यो॑
 व॒नुते॑ व॒यं म॒नुष्ये॑भ्य इति॒ वावै॑त॒दाहे॒ह ग॒तिर्वा॒मस्ये॒दं च॒ नमो॑
 दे॒वेभ्य॑ इत्या॑ह याश्चै॒व दे॒वता॑ य॒जति॑ याश्च॒ न ताभ्य॑ ए॒वोभ्यी॑भ्यो
 नम॑स्करोत्या॒त्मनो॑ ऽना॒त्यै ॥ 56

(श्रितः – ते प्र – त्रिष्टुभ – मेतद् – द्यावापृथिवी – या अयाक्ष्म –
 प्राणानेव – षट्चत्वारिंशच्च) (A9)

TS 2.6.10.1

दे॒वा वै य॒ज्ञस्य॑ स्व॒गाक॒र्तारं॑ ना॒विन्दन्॑ ते श॒युं बा॒र्हस्प॒त्यम॑ब्रुवन्नि॒मं
 नो॑ य॒ज्ञः स्व॒गा कु॒र्विति॑ सो ऽब्र॒वीद्-वरं॑ वृ॒णै यदे॒वाब्रा॑ह्म॒णोक्तो॑-

ऽश्रद्धानो यजातै सा मे यज्ञस्याऽऽशीरसदिति तस्माद्-

यद् ब्राह्मणोक्तो ऽश्रद्धानो यजते शँयुमेव तस्य बार्हस्पत्यं यज्ञस्याऽऽशीर्गच्छत्येतन्ममेत्यब्रवीत् किं मे प्रजाया - [] 57

TS 2.6.10.2

इति यो ऽपगुरातै शतेन यातयाद्यो निहनथ् सहस्रेण यातयाद्-यो लोहितं करवद्-यावतः प्रस्कद्य पाँसून्थ् सं गृह्णात् तावतः सँवथ्सरान् पितृलोकं न प्र जानादिति तस्माद्-ब्राह्मणाय नाप गुरेत न नि हन्यान्न लोहितं कुर्यादेतावता हैनसा भवति तच्छँयो-रा वृणीमह इत्याह यज्ञमेव तथ् स्वगा करोति त - [] 58

TS 2.6.10.3

-च्छँयोरा वृणीमह इत्याह शँयुमेव बार्हस्पत्यं भागधेयेन समर्द्धयति गातुं यज्ञाय गातुं यज्ञपतय इत्याहा ऽऽशिषमेवै तामा शास्ते सोमं यजति रेत एव तद्-दधाति त्वष्टारं यजति रेत एव हितं त्वष्टा रूपाणि वि करोति देवानां पत्नीर्यजति मिथुनत्वायाग्निं गृहपतिं यजति प्रतिष्ठित्यै जामि वा एतद्-यज्ञस्य क्रियते - [] 59

TS 2.6.10.4

यदा॑ज्ये॒न प्र॒याजा॑ इ॒ज्यन्त॑ आ॒ज्ये॒न प॒त्नीसँ॑याजा ऋ॒चम॑नूच्य
 प॒त्नीसँ॑याजा॒ना-मृ॒चा य॒जत्य॑जामि॒त्वाया॑थो मि॒थुन॑त्वाय प॒ङ्क्ति॑प्राय॒णो वै
 य॒ज्ञः प॒ङ्क्त्यु॑दय॒नः पञ्च॑ प्र॒याजा॑ इ॒ज्यन्ते॑ च॒त्वारः॑ प॒त्नीसँ॑याजाः
 स॒मिष्ट॑य॒जुः पञ्च॑मं प॒ङ्क्ति॑मे॒वानु॑ प्र॒यन्ति॑ प॒ङ्क्ति॑मनूद्-यन्ति ॥ 60

(प्र॒जायाः॑ - करो॒ति तत् - क्रि॒यते॑ - त्रय॑स्त्रि॒ंशच्च॑) (A10)

TS 2.6.11.1

यु॒क्ष्वा हि॑ दे॒वहू॑तमा॒ञ् अश्वा॑ञ् अ॒ग्ने र॒थीरि॑व ।
 नि॒ होता॑ पू॒र्व्यः स॒दः ॥
 उ॒त नो॑ दे॒व दे॒वाञ् अ॒च्छा॑ वो॒चो वि॒दुष्ट॑रः ।
 श्रद्-वि॒श्वा वा॒र्या कृ॑धि ॥
 त्वञ् ह॒ यद्-य॑वि॒ष्ट्य स॒हसः॑ सू॒नवा॑हुत ।
 ऋ॒तावा॑ य॒ज्ञियो॑ भुवः ॥
 अ॒यम॒ग्निः स॒हस्रि॑णो वा॒जस्य॑ श॒तिन॒स्पतिः॑ ।
 मूर्द॑धा क॒वी रयी॑णां ॥

तं ने॒मि॒मृ॒भवो॑ य॒थाऽऽ नम॑स्व स॒हू॒ति॒भिः ।

ने॒दी॒यो य॒ज्ञ - [] 61

TS 2.6.11.2

—म॒ङ्गि॒रः ॥

तस्मै॑ नू॒न—म॒भि॒द्य॒वे वा॒चा वि॒रूप॑ नित्यया ।

वृ॒ष्णे चो॒दस्व॑ सु॒ष्टु॒तिं ॥

कमु॑ ष्वि॒दस्य॑ से॒नया॑ ऽग्ने—र॒पा॒क॒चक्ष॑सः ।

प॒णिं गो॒षु स्त॒राम॑हे ॥

मा नो॑ दे॒वानां॑ वि॒शः प्र॒स्ना॒ती॒रि॒वो॒स्राः ।

कृ॒शं न हा॑सु॒र॒घ्नियाः॑ ॥

मा नः॑ स॒मस्य॑ दू॒ढ्यः परि॑द्वेष॒सो अ॒ह॒तिः ।

ऊ॒र्मि॒र्न ना॒व॒मा व॑धीत् ॥

नम॑स्ते अ॒ग्न ओ॒ज॒से गृ॑णन्ति दे॒व कृ॑ष्टयः ।

अ॒मै - [] 62

TS 2.6.11.3

—र॒मि॒त्र—म॒र्दय ॥
कु॒वि॒त् सु॒ नो॒ गवि॑ष्ट॒ये ऽग्ने॑ सँ॒वे॒षि॒षो र॒यिं ।
उ॒रु॒कृ॒दु॒रु ण॑ स्कृ॒धि ॥
मा॒ नो॒ अ॒स्मिन् महा॑ध॒ने परा॑ व॒ग्भारि॑भृद्—य॒था ।
सँ॒वर्ग॑ꣳ सꣳ र॒यिं ज॒य ॥
अ॒न्यम॒स्मद्भिया॑ इ॒यम॒ग्ने सि॑ष॒क्तु दु॒च्छु॒ना ॥
व॒र्द्धा॑ नो॒ अम॑व॒च्छवः॑ ॥
यस्या॑जु॒षन् नम॑स्वि॒नः शमी॑म॒दुर्म॑खस्य वा ।
तं घे॒द॒ग्निर्वृ॑धा ऽव॒ति ॥
पर॑स्या॒ अधि॑ — [] 63

TS 2.6.11.4

सँ॒वतो॑ ऽव॒राꣳ अ॒भ्या तर॑ ।
यत्रा॑हमस्मि॒ ताꣳ अव॑ ॥
वि॒द्वा हि ते॑ पु॒रा व॒यम॒ग्ने पि॒तुर्य॑था ऽव॒सः ।
अ॒था ते॑ सु॒म्नमी॑महे ॥

य उग्र इव शर्यहा तिग्मशृङ्गो न वःसगः ।

अग्ने पुरो रुरोजिथ ॥

सखायः सं वः सम्यञ्चमिषः स्तोमं चाग्नये ।

वर्षिष्ठाय क्षितीनामूर्जो नप्त्रे सहस्वते ॥

सःसमिद्-युवसे वृषन्न () -ग्ने विश्वान्यर्य आ ।

इड-स्पदे स-मिध्यसे स नो वसून्या भर ।

प्रजापते >[1], स वेद>[2], सोमापूषणे>[3], मौ देवौ>[4] ॥ 64

(यज्ञ - ममै - रधि - वृष - नेकान्नविःशतिश्च) (A11)

TS 2.6.12.1

उशन्तस्त्वा हवामह उशन्तः स-मिधीमहि ।

उशन्नुशत आ वह पितृन्. हविषे अत्तवे ॥

त्वः सोम प्रचिकितो मनीषा त्वः रजिष्ठमनु नेषि पन्थां ।

तव प्रणीती पितरो न इन्दो देवेषु रत्नमभजन्त धीराः ॥

त्वया हि नः पितरः सोम पूर्वे कर्माणि चक्रुः पवमान धीराः ।

वन्वन्नवातः परिधीः रपोर्णु वीरेभिरश्वैर्मघवा भवा - [] 65

TS 2.6.12.2

नः ॥

त्व॒ सोम॑ पि॒तृभिः॑ सँ॒वि॒दा॒नो ऽनु॑ द्यावा॑पृथि॒वी आ त॑तन्थ ।

तस्मै॑ त इ॒न्दो ह॒विषा॑ वि॒धेम वय॑ स्याम॒ पत॑यो रयी॒णां ॥

अग्नि॑ष्वात्ताः पि॒तर ए॒ह ग॑च्छत॒ सदः॑सदः॒ सद॑त सु॒प्रणी॑तयः ।

अ॒त्ता ह॒वीषि॑ प्र॒यत॑ानि ब॒र्हिष्य॑था रयि॑ सर्व॒वीरं॑ दधा॒तन ॥

ब॒र्हिष॑दः पि॒तर ऊ॒त्यर्वा॑गि॒मा वो ह॒व्या च॑कृ॒मा जु॑षद्ध्वं ॥

त आ ग॒ताव॑सा श॒न्तमे॒नाथा॑स्मभ्य॒ - [] 66

TS 2.6.12.3

शं यो॑-र॒रपो॑ दधा॒त ॥

आ ऽहं॑ पि॒तृन्थ॑ सु॒वि॒दत्रा॑ अ॒वि॒त्सि॒ नपा॑तं च वि॒क्रम॑णं च वि॒ष्णोः॑ ।

ब॒र्हिष॑दो ये स्व॒धया॑ सु॒तस्य॑ भज॒न्त पि॒त्वस्त॑ इहाऽऽ ग॒मि॒ष्ठाः ॥

उप॑हू॒ताः पि॒तरः॑ सो॒म्यासो॑ ब॒र्हिष्ये॑षु नि॒धिषु॑ प्रि॒येषु॑ ।

त आ ग॑मन्तु॒ त इ॒ह श्रु॑व॒न्त्वधि॑ ब्रुवन्तु॒ ते अ॑व॒न्त्वस्मा॑न् ॥

उदी॑रता-म॒वर॒ उ॒त् प॒रास॑ उ॒न्मद्ध्य॑माः पि॒तरः॑ सो॒म्यासः॑ ।

असुं॑ - [] 67

TS 2.6.12.4

ॐ ई॒यु-र॒वृ॒का ऋ॒त॒ज्ञा॒स्ते नो॑ ऽव॒न्तु पि॒तरो॑ ह॒वेषु॑ ॥
 इ॒दं पि॒तृ॒भ्यो नमो॑ अ॒स्त्वद्य॑ ये पूर्वा॒सो य उप॑रास ई॒युः ।
 ये पा॒र्थि॒वे रज॑स्याऽऽ निष॒त्ता ये वा नू॒न् सुवृ॑जना॒सु वि॒क्षु ॥
अथा॑ यथा नः पि॒तरः॑ प॒रासः॑ प्र॒त्नासो॑ अ॒ग्न ऋ॒त-मा॑शुषा॒णाः ।
 शु॒ची॒दय॑न् दी॒धिति॑-मु॒क्थशा॑सः **क्षामा॑** भि॒न्दन्तो॑ अ॒रुणी॑रप॒ व्रन् ॥
 यद॒ग्ने - [] 68

TS 2.6.12.5

क॒व्यवा॑हन पि॒तृन् यक्ष्य॑तावृ॒धः ।
 प्र च ह॒व्यानि॑ वक्ष्यसि दे॒वेभ्य॑श्च पि॒तृभ्य॑ आ ॥
 त्वम॒ग्न ई॒डितो॑ जा॒तवे॒दो ऽवा॑ङ्ढ॒व्यानि॑ सु॒रभी॑णि कृ॒त्वा ।
 प्रा॒दाः पि॒तृभ्यः॑ स्व॒धया॑ ते अ॒क्षन्न॒द्धि त्वं दे॒व प्र॑यता ह॒वीर्षि॑ ॥
 मा॒तली॑ क॒व्यैर्य॑मो अ॒ङ्गिरो॑भि बृ॒हस्प॑तिर्. ऋ॒क्वभि॑ वावृ॒धानः॑ ।
 या॒श्च दे॒वा वावृ॑धुर्ये च दे॒वान्थ् स्वा॒हा ऽन्ये॑ स्व॒धया॑ ऽन्ये॑ मद॒न्ति ॥ 69

TS 2.6.12.6

इ॒मं॑ य॒म प्र॒स्तर॑-मा हि सी॒दाङ्गि॑रोभिः पि॒तृभिः॑ सँ॒विदा॑नः ।
 आ त्वा॑ मन्त्राः॑ कवि॒शस्ता॑ वह॒न्त्वे॒ना रा॑जन् ह॒विषा॑ मादयस्व ॥
 अङ्गि॑रोभि॒रा ग॑हि य॒ज्ञिये॑भि॒र्यम॑ वैरू॒पै-रि॒ह मा॑दयस्व ।
 वि॒वस्व॑न्त॒ हुवे॑ यः पि॒ता ते॒ ऽस्मिन्॑ य॒ज्ञे ब॒र्हिष्या॑ऽऽ नि॒षद्य॑ ॥
 अङ्गि॑रसो नः पि॒तरो॑ नव॒ग्वा अ॑थ॒र्वाणो॑ भृ॒गवः॑ सो॒म्यासः॑ ।
 तेषां॑ व॒यं सु॑म॒तौ य॒ज्ञिया॑ना॒मपि॑ भ॒द्रे सौ॑म॒नसे॑ () स्या॒म ॥ 70

(भ॒वा - स्म॒भ्य - म॒सुं - यँ॑द॒ग्ने - म॒दन्ति॑ - सौ॒म॒न॒स -
 ए॒कं॑ च) (A12)

Prasna Korvai with starting Padams of 1 to 12 Anuvaakams :-

(स॒मि॒ध - श्र॒क्षु॒षी - प्र॒जा॒प॒ति॒रा॒ज्यं - दे॒व॒स्य॒ स्फ्यं - ब्र॒ह्म॒वा॒दि॒नो
ऽद्भि - र॒ग्ने॒स्त्रयो - म॒नुः पृ॒थि॒व्याः - प॒श॒वो - ऽग्नी॒धे - दे॒वा वै
य॒ज्ञ॒स्य - यु॒क्ष्वो - श॒न्त॒स्त्वा - द्वा॒दश)

Korvai with starting Padams of 1, 11, 21 Series of Panchaatis :-

(स॒मि॒धो - या॒ज्या - तस्मा॒न्नभा॒गꣳ - हि तम॒न्वि- त्याह
प्र॒जा वा - आ॒हेत्या॒ह - यु॒क्ष्वा हि - स॒प्त॒तिः)

First and Last Padam of Sixth Prasnam of Kandam 2 :-

(स॒मि॒धः - सौम॒न॒से स्याम)

Kanda Korvai with starting Padams of Six Prasnas of Kandam 2 :-

(वा॒य॒व्यं - प्र॒जा॒प॒ति - रा॒दि॒त्ये॒भ्यो - दे॒वा - वि॒श्वरू॒पः -
स॒मि॒धः - षट्)

॥ हरिः ओं ॥

॥ कृष्ण यजुर्वेदीय तैत्तिरीय संहितायां द्वितीयकाण्डे षष्ठः प्रश्नः समाप्तः ॥

॥ इति द्वितीयं काण्डं ॥

2.6.1 Appendix

2.6.11.4 – प्रजापते>¹

प्रजापते न त्वदेतान्यन्यो विश्वा जातानि परि ता बभूव ।
यत्कामास्ते जुहुमस्तन्नो अस्तु वयं स्याम पतयो रयीणाम् ॥
(Appearing in TS-1.8.14.2)

2.6.11.4 – स वेद>²

स वेद पुत्रः पितरं स मातरं स सूनुर्भुवथ् स भुवत् पुनर्मघः ।
स द्यामौर्णोदन्तरिक्षं स सुवः स विश्वा भुवो अभवथ् स
आ*ऽभवत् ॥ (Appearing in TS - 2.2.12.1)

2.6.11.4 – सोमा पूषणे>³ , मौ देवौ>⁴

सोमापूषणा जनना रयीणां जनना दिवो जनना पृथिव्याः ।
जातौ विश्वस्य भुवनस्य गोपौ देवा अकृण्वन्नमृतस्य नाभिं ॥

इमौ देवौ जायमानौ जुषन्तेमौ तमांसि गूहतामजुष्टा ।
आभ्यामिन्द्रः पक्वमामास्वन्तः सोमापूषभ्यां जनदुस्रियासु ॥
(Appearing in TS- 1.8.22.5)

Summary breakup of Padam - in Kaandam 2.1 to 2.6

			Prasnam No.2.1	Prasnam No.2.2	Prasnam No.2.3	Prasnam No.2.4	Prasnam No.2.5	Prasnam No.2.6	Prasnam No.2.1 to2.6
Particulars		Example (in Pada PaaTam)	No. of Padams as per Pada PaaTa m	No. of Padams as per Pada PaaTa m	No. of Padams as per Pada PaaTa m	No. of Padams as per Pada PaaTa m	No. of Padams as per Pada PaaTa m	No. of Padams as per Pada PaaTa m	No. of Padams as per Pada PaaTa m
सामान्य पदानि	Ord	इषे । त्वा । ऊर्जे ।	2493	2524	2320	1924	2753	2609	14623
उपसर्ग पदानि	PRE	एति = (आ+इति) । उपेति = (उप+इति) । प्रेति = (प्र+इति) ।	279	283	216	178	270	249	1475
वेष्टन पदानि	PS	उपायवः = उपायव इत्युप - आयवः । बाहुभ्याम् = बाहुभ्यामिति बाहु - भ्याम्) ।	498	681	402	295	601	538	3015
प्रग्रह पदानि	PG	ते = (ते इति) । त्वे = (त्वे इति) । चक्षुषी = (चक्षुषी इति) । विष्णो = विष्णो इति ।	5	22	12	7	32	23	101
प्रग्रह वेष्टन पदानि	PGS	अधिषवणे = अधिषवणे इत्यधि - सवने । 'इन्द्राग्नी = इन्द्राग्नी इतीन्द्र - अग्नी	3	16	15	2	9	14	59
TOTAL			3278	3526	2965	2406	3665	3433	19273

Details of Anuvakam, Panchati and Padam for Kandam 2

	Anuvakam	Panchati	Padams
Prasna 1	11	65	3278
Prasna 2	12	71	3526
Prasna 3	14	56	2965
Prasna 4	14	48	2406
Prasna 5	12	74	3665
Prasna 6	12	70	3433
Totals	75	384	19273